

ओं नमः परमात्मने, श्री महागणपतये नमः

श्री गुरुभ्यो नमः

हरिः ओं

उदकशान्ति मन्त्र पाठः

(AnuShangam with Continuous Text)

Version Notes:

1. This is now the current Version 4.2 dated July 31, 2022.
2. This replaces the earlier version 4.1 dated December 31, 2020
3. In this Version, the Source references of various Mantras have been indicated

TS	-	Taittiriya Samhita
TB	-	Taittiriya Brahamanam
TA	-	Taittiriya Aranyakam
EAK	-	Ekaagni Kaandam
RV	-	Rig Veda Samhita
4. Corrections found and reported till 15th July 2022 have been incorporated.
5. Convention improvements in Nasal, representation of Svarabhakti and sound extensions have been incorporated
6. Some Paragraph numbering has been changed to match with Mantra Source Reference.
7. This is special version, **with and without anushangam but the anushanam texts for continuous rendering with Sandhis** , has prepared at the request of some Veda Learning Groups.
8. This version is specially compiled **with continuous text** at the request of Veda learning groups.

Contents

1.1 वेदारंभे सर्वसाधारण्येन जप्याः मन्त्राः.....	5
1.2 वेदाधया.....	5
1.3 रक्षोघ्नं.....	6
1.4 इन्द्र सूक्तं.....	8
1.5 ये देवाः.....	12
1.6 ये देवाः (अनुषङ्गं).....	13
1.7 आयुष्कामेष्टि मन्त्राः.....	14
1.8 आयुष्कामेष्टि मन्त्राः (अनुषङ्गं).....	14
1.9 अंहोमुच मन्त्राः.....	15
1.10 अंहोमुच मन्त्राः (अनुषङ्गं).....	15
1.11 शास्तृ सूक्तं (आप्यं).....	16
1.12 राष्ट्रभृतं.....	17
1.13 राष्ट्रभृतं (अनुषङ्गं).....	19
1.14 राष्ट्रभृतं (अनुषङ्गं) जयाति.....	22
1.15 सर्प सूक्तं.....	25
1.16 पंचचोडाः.....	25
1.17 पंचचोडाः (अनुषङ्गं).....	27
1.18 अप्रतिरथः.....	28
1.19 चमकं तृतीय अनुवाकः.....	30
1.20 विहव्यम्.....	31
1.21 मृगारः.....	32
1.22 सर्पाहुती मन्त्राः.....	36
1.23 सर्पाहुती मन्त्राः (अनुषङ्गं).....	36
1.24 गन्धर्वाहुतीः.....	38
1.25 गन्धर्वाहुतीः (अनुषङ्गं).....	38

1.26 अज्यानि मन्त्राः	40
1.27 अथर्वशीर्ष	41
1.28 प्रत्यंगिरसः	42
1.29 अन्न सूक्तं	47
1.30 वाख् सूक्तं	48
1.31 श्रद्धा सूक्तं	49
1.32 ब्रह्म सूक्तं	50
1.33 गो सूक्तं	51
1.34 सूर्या चन्द्रमसा सूक्तं	53
1.35 नासदासीय सूक्तं	56
1.36 भाग्य सूक्तं	57
1.37 नक्षत्र सूक्तं(वाक्यं)	59
1.38 नक्षत्र उपहोम मन्त्राः	75
1.39 वरुण सूक्तं	83
1.40 पवमान सूक्तं	84
1.41 नक्षत्र सूक्तं (नक्षत्र जप मन्त्राः)	88

=====

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

1.1 वेदारंभे सर्वसाधारण्येन जप्याः मन्त्राः

ओं भूः । तथ्स॑वि॒तुर् व॑रेण्यं । ओं भुवः॑ भर्गो॑ दे॒वस्य॑ धीमहि ।

ओ॒म् सुवः॑ । धियो॑ यो॒नः प्र॑चोदयात् ।

ओं भूः । तथ्स॑वि॒तुर् व॑रेण्यं । भर्गो॑ दे॒वस्य॑ धीमहि ।

ओं भुवः॑ । धियो॑ यो॒नः प्र॑चोदयात् ।

ओ॒म् सुवः॑ । तथ्स॑वि॒तुर् व॑रेण्यं भर्गो॑ दे॒वस्य॑ धीमहि ।

धियो॑ यो॒नः प्र॑चोदयात् ।

ओं शान्तिः॑ शान्तिः॑ शान्तिः॑ ।

1.2 वेदाधया

अ॒ग्निमी॑ळे पु॒रोहि॑तं य॒ज्ञस्य॑ दे॒वमृ॑त्विजं । हो॒तारं॑ रत्न॒ धा॑तमं ।

इ॒षे त्वो॒र्जे॒त्वा वा॑यव॒स्स्थो पा॑यव॒स्थ दे॒वो व॑स्सवि॒ता प्रा॑र्पयतु
श्रेष्ठ॑तमाय॒ कर्म॑णे ।

अ॒ग्न॒ आ॒या॒हि॒ वी॒त॒ये॒ गृ॒णा॒नो॒ ह॒व्य॒दा॒त॒ये॒ । नि॒हो॒ता॒ स॒त्वि॒स्र॒ ब॒र्हि॒षि॒ ।

श॒न्नो॒ दे॒वी॒र॒भि॒ष्ट॒य॒ आ॒पो॒ भ॒व॒न्तु॒ पी॒त॒ये॒ ॥

शं॑ यो॒र॒भि॒स्र॒व॒न्तु॒ नः॑ ॥ १ (१)

1.3 रक्षोघ्नं

TS 1.2.14.1 to TS 1.2.14.7 for Para 1 to 8

कृ॒णु॒ष्व॒ पा॒जः॒ प्र॒सि॒ति॒न्न॒ पृ॒थ्वीं॑ या॒हि॒ रा॒जे॒वा॒म॒वा॒ꣳ इ॒भे॒न॒ ।

वृ॒ष्वी॒म॒नु॒ प्र॒सि॒तिं॑ द्रू॒णा॒नो॒ऽस्ता॒ऽसि॒ वि॒द्ध्य॒ र॒क्ष॒स॒ स्त॒पि॒ष्ठैः॑ ।

त॒व॒ भ्र॒मा॒स॒ आ॒शु॒या॒ प॒त॑न्त्य॒नु॒ स्पृ॒श॒ धृ॒ष॒ता॒ शो॒शु॒चा॒नः॑ ।

त॒पूꣳष्य॒ग्ने॒ जु॒ह्वा॒ प॒त॑ंगान॒स॒न्दि॒तो॒ वि॒सृ॒ज॒ वि॒ष्व॒गु॒ल्काः॑ ।

प्र॒ति॒ स्पृ॒शो॒ वि॒ सृ॒ज॒ तू॒र्णि॒त॒मो॒ भ॒वा॒ पा॒यु॒र्वि॒शो॒ अ॒स्या॒ अ॒द॒ब्धः॑ ॥ २

यो॒ नो॒ दू॒रे॒ अ॒घ॒शꣳसो॒ यो॒ अ॒न्त्य॒ग्ने॒ मा॒क्रि॒ष्टे॒ व्य॒थि॒रा॒ द॒ध॒र्षी॒त् ।

उ॒द॒ग्ने॒ ति॒ष्ठ॒ प्र॒त्या॒त॒नु॒ष्व॒न्य॒मि॒त्राꣳ ओ॒ष॒ता॒त्ति॒ग्म॒हे॒ते॒ ।

यो॒ नो॒ अ॒रा॒तिꣳ स॒मि॒धा॒न॒ च॒क्रे॒ नी॒चा॒ तं॑ ध॒क्ष्य॒त॒स॒न्न॒ शु॒ष्कं॑ ॥

ऊ॒र्ध्वो॒ भ॒व॒ प्र॒ति॒ वि॒द्ध्य॒ा॒द्ध्य॒स्म॒दा॒वि॒ष्कृ॒णु॒ष्व॒ दै॒व्या॑न्य॒ग्ने॒ ।

अ॒व॒ स्थि॒रा॒ त॒नु॒हि॒ या॒तु॒जू॒नां॑ जा॒मि॒म॒जा॒मिं॑ प्र॒ मृ॒णी॒हि॒ श॒न्नून्॑ ॥ ३

स॒ ते॒ जा॒ना॒ति॒ सु॒म॒तिं॑ य॒वि॒ष्ठ॒ य॒ ई॒व॒ते॒ ब्र॒ह्म॒णे॒ गा॒तु॒मै॒रत्॑ ।

वि॒श्वा॑न्य॒स्मै॒ सु॒दि॒ना॒नि॒ रा॒यो॒ द्यु॒म्ना॒न्य॒र्यो॒ वि॒ दुरो॑ अ॒भि॒द्यौ॑त् ।

से॒दग्ने॑ अस्तु सु॒भग॑ स्सु॒दानु॑र् यस्त्वा॒ नित्ये॑न ह॒विषा॒ य उ॒क्थैः ।
 पि॒प्री॑षति स्व आयु॒षि दुरो॑णे विश्वे॒दस्मै॑ सु॒दिना॒ साऽस॑दिष्टिः ।
 अर्चा॑मि ते सु॒मतिं॑ घोष्य॒र्वाख् सन्ते॑ वा॒वाता॑ जरता-मि॒यंगीः ॥ 4

स्वश्वा॑स्त्वा सु॒रथा॑ म॒र्जये॑-मा॒स्मे क्ष॒त्राणि॑ धा॒रये॑रनु द्यून् ।
 इ॒ह त्वा॒ भूर्या॑ चरे दु॒प त्मन्॑ दोषावस्तर दी॒दिवा॑ऽस-मनु॒द्यून् ।
 क्री॒डन्त॑स्त्वा सु॒मन॑स स्सपे॒माभि॑ द्यु॒म्ना त॑स्थिवा॒ऽसो ज॑नानां ।
 यस्त्वा स्वश्च॑ स्सु॒हिर॑ण्यो अ॒ग्न उप॑याति वसु॒मता॑ रथेन ।
 तस्य॑ त्रा॒ता भव॑सि तस्य॑ सखा॒ यस्त आ॑तिथ्य-मा॒नुष॑ग् जुजोषत् ॥ 5

म॒हो रु॑जामि ब॒न्धुता॑ वचो॒भिस्त॑न्मा पि॒तुर्गो॑तमा॒दन्वि॑याय ।
 त्व॒न्नो अ॒स्य व॑चस-श्चि॒किद्धि॑ हो॒तर्य॑विष्ठ सु॒क्रतो॑ द॒मूनाः॑ ।
 अ॒स्वप्न॑ज स्त॒रण॑य स्सु॒शेवा॑ अ॒तन्द्रा॑सोऽवृ॒का अ॑श्रमिष्ठाः ।
 ते पा॒यवः॑ स॒द्ध्रिय॑ञ्चो निषद्याग्ने तव नः पा॒न्त्वमू॑र ।
 ये पा॒यवो॑ मा॒मते॑यं ते अ॒ग्ने प॑श्यन्तो अ॒न्धं दुरि॑तादरक्षन् ।
 र॒रक्ष॑ तान्थ् सु॒कृतो॑ वि॒श्ववे॑दा दि॒प्सन्त॑ इद्-रि॒पवो॑ ना ह दे॒भुः ॥ 6

त्वया वयं सधन्यस्त्वोता स्तव प्रणीत्यश्याम वाजान् ।
 उभाशं सा सूदय सत्यता तेऽनुष्ठुया कृणुह्यहयाण ।
 अया ते अग्ने समिधा विधेम प्रतिस्तोमं शस्यमानं गृभाय ।
 दहाशसो रक्षसः पाह्यस्मान् द्रुहो निदो मित्रमहो अवद्यात् ।
 रक्षोहणं वाजिन-माजिघर्मि मित्रं प्रथिष्ठ-मुप यामि शर्म ।
 शिशानो अग्निः क्रतुभि स्समिद्ध-स्सनो दिवा स रिषः
 पातु नक्तं ॥ 7

वि ज्योतिषा बृहता भात्यग्निराविर् विश्वानि कृणुते महित्वा ।
 प्रादेवीर्माया स्सहते दुरेवा शिशितीते शृंगे रक्षसे विनिक्षे ।
 उत स्वानासो दिवि षन्त्वग्ने स्तिग्मायुधा रक्षसे हन्तवा उ ॥ 8 (2)

1.4इन्द्र सूक्तं

TS 1.6.12.1 to TS 1.6.12.6, for para 9 to 14

इन्द्रं वो विश्वतस्परि हवामहे जनेभ्यः । अस्माकमस्तु केवलः ।
 इन्द्रं नरो नेमधिता हवन्ते यत्पार्या युनजते धियस्ताः ।
 शूरो नृषाता शवसश्चका न आ गोमति व्रजे भजा त्वन्नः ।
 इन्द्रियाणि शतक्रतो या ते जनेषु पञ्चसु । इन्द्र तानि त आ वृणे ।
 अनुते दायि मह इन्द्रियाय सन्ना ते विश्वमनु वृत्रहत्ये ॥ 9

अनु॑ क्ष॒त्रम॒नु स॒हो य॒ज॒त्रेन्द्र॑ दे॒वेभि॒रनु॑ ते नृ॒षह्ये॑ ।
 आ यस्मि॑न्त् स॒प्त वा॒सवा॑ स्तिष्ठ॑न्ति स्वा॒रुहो॑ यथा ।
 ऋषि॑र् ह दी॒र्घश्रु॑त्तम इन्द्र॑स्य घ॒र्मो अ॒तिथिः॑ ।
 आमा॑सु प॒क्वमै॑रय आ सूर्य॑ꣳ रो॒हयो॑ दि॒वि ।
 घ॒र्मन्न॑ सा॒मन्त॑प॒ता सु॒वृक्ति॑भिर् जुष्टं॑ गि॒र्वण॑से गि॒रः ।
 इन्द्र॑मिद् गा॒थिनो॑ बृ॒हदिन्द्र॑-म॒र्केभि॑-र॒र्किणः॑ ।
 इन्द्रं॑ वा॒णीर॑नूष॒त ॥ 10

गा॒यन्ति॑ त्वा गा॒य॒त्रिणो॑ ऽर्च॑त्य॒र्क-म॒र्किणः॑ ।
 ब्र॒ह्माण॑स्त्वा श॒तक्र॑त॒वुद् वꣳ श॑मि॒व ये॒मिरे॑ ।
 अꣳहो॑मु॒चे प्र॑ भ॒रेमा॑ म॒नीषा॑ मो॒षिष्ठ॑दाव॒न्ने सु॑म॒तिं गृ॑णा॒नाः ।
 इ॒दमिन्द्र॑ प्र॒ति ह॒व्यं गृ॑भा॒य स॒त्या स्स॑न्तु य॒ज॒मा॒नस्य॑ का॒माः ।
 वि॒वेष॑यन्मा॒ धिष॑णा ज॒जान॑ स्त॒वै पु॒रा पा॒र्यादिन्द्र॑-म॒हः ।
 अꣳह॑सो य॒त्र पी॒पर॑द्-यथा॒ नो ना॒वेव॑ या॒न्तमु॒भये॑ ह॒वन्ते॑ ॥ 11

प्र स॒म्राजं॑ प्र॒थम॑-म॒ध्वरा॑णा-मꣳहो॑मु॒चं वृ॑ष॒भं य॑ज्ञि॒यानां॑ ।
 अ॒पा॒न्नपा॑तम॒श्विना॑ ह॒यन्त॑-म॒स्मिन्न॑र इन्द्रि॒यं ध॑त्त॒मोजः॑ ।

वि॒ न इन्द्र॑ मृ॒धो जहि॑ नी॒चा यच्छ॑ पृ॒तन्य॑तः ।
 अध॒स्पदं॑ त॒मीं कृ॒धि यो अ॒स्माँ अभि॑दा॒सति॑ ।
 इन्द्र॑क्षत्रमभि॒ वाम॑मोजो ऽजा॒यथा॑ वृष॒भ चर्ष॑णीनां ।
 अपा॑नुदो॒ जन॑-ममि॒त्रय॑न्त-मु॒रुं दे॒वेभ्यो॑ अकृ॒णोरु॑ लोकं ।
 मृ॒गो न भी॑मः कु॒चरो॑ गि॒रिष्ठाः॑ प॒राव॑त आ ज॒गामा॑ प॒रस्याः॑ ॥ 12

सृ॒कँ स॒ञ्शाय॑ प॒विमि॑न्द्र ति॒ग्मं वि॒शत्रू॑न् ताडि॒ वि मृ॒धो नु॑दस्व ।
 वि॒शत्रू॑न् वि मृ॒धो नु॑द वि वृ॒त्रस्य॑ ह॒नू रु॑ज ।
 वि॒मन्यु॑मिन्द्र॒ भामि॑तो ऽमि॒त्रस्या॑भि दा॒सतः॑ ।
 त्रा॒तार॑मिन्द्र-मवि॒तार॑ मिन्द्रँ ह॒वेह॑वे सु॒हवँ॑ शू॒रमि॑न्द्रं ।
 हु॒वे नु॑ श॒क्रं पु॒रुहू॑तमिन्द्रँ स्व॒स्ति नो॑ म॒घवा॑ धा॒त्विन्द्रः॑ ॥ 13

मा ते॑ अ॒स्याँ स॒हसा॑वन् परि॒ष्टाव॑घाय॒ भूम॑ ह॒रिवः॑ प॒रादै॑ ।
 त्रा॒यस्व॑ नो ऽवृ॒केभि॑र् वरू॒थै स्त॑व प्रि॒यास॑ स्सू॒रिषु॑ स्याम ।
 अ॒नव॑स्ते रथम॒श्वाय॑ तक्षन् त्व॒ष्टा व॑ज्रं पु॒रुहू॑त द्यु॒मन्तं॑ ।
 ब्र॒ह्माण॑ इन्द्रं म॒हय॑न्तो अ॒र्कै-र॑वर्द्धयन्न॒हये॑ ह॒न्त॒वा उ॑ ।
 वृ॒ष्णे य॑त्ते वृष॒णो अ॒र्कम॑र्चानिन्द्र॒ ग्रावा॑णो अ॒दिति॑ स्स॒जोषाः॑ ।
 अ॒नश्वा॑सो ये प॒वयो॑ऽर॒था इ॒न्द्रेषि॑ता अ॒भ्यव॑र्तन्त द॒स्यून् ॥ 14 (3)

T.A.6.1.9 for para 15a, TS1.4.41.1 & TS1.4.42.1 for para 15b

य॒त इ॒न्द्र भ॒याम॒हे ततो॑ नो॒ अभ॒यं कृ॒धि ।
 म॒घवन्॑ च्छ॒ग्धि तव॑ तन्न॒ ऊ॒तये॑ वि॒ द्विषो॑ वि॒ मृ॒धो ज॒हि ।
 स्व॒स्ति॒दा वि॒शस्प॑तिर्वृ॒त्रहा॑ वि॒मृ॒धो व॒शी ।
 वृ॒षेन्द्रः॑ पु॒र॒ण॒तु न॒ स्व॒स्ति॒दा अभ॒यं क॒रः । 15a

म॒हा॒ꣳ इ॒न्द्रो व॒ज्र॒बाहु॑ षोड॒शी श॒र्म य॒च्छतु॑ ।
 स्व॒स्ति नो॑ म॒घवा॑ करो॒तु ह॒न्तु पा॒प्मानं॑ योऽ॒स्मान् द्वेष्टि॑ ।
 स॒जोषा॑ इ॒न्द्र स॒ग॒णो म॒रुद्भि॑ स्सोमं॒ पिब॑ वृ॒त्रह॑न्च्छूर॒ वि॒द्वान् ।
 ज॒हि श॒त्रूꣳर॒प मृ॒धो नु॒द॒स्वाथा॑ ऽभ॒यं कृ॑णुहि वि॒श्वतो॑ नः ॥ 15b (4)

1.5 ये देवाः**TS 1.8.7.1 for para 16**

ये दे॒वाः पु॒र॒ स्स॒दोऽग्नि॑ नै॒त्रा॑,
 दक्षि॑ण॒सदो॑ यम॒नै॒त्रा॑,
 पश्चा॑त्स॒द॒ स्स॒वि॒तृ नै॒त्रा॑,
 उत्त॑र॒सदो॑ वरु॒णनै॒त्रा॑,
 उप॑रि॒षदो॑ बृ॒हस्प॑ति॒ नै॒त्रा॑,
 रक्षो॑ह॒ण स्ते॒नः पा॒न्तु ते॑ नोऽव॒न्तु ते॒भ्यो नम॑स्ते॒भ्य॒ स्स्वाहा॑
 -ऽग्न॑ये रक्षो॒घ्ने स्वाहा॑,
 यमा॑य स॒वि॒त्रे ,
 वरु॑णाय बृ॒हस्प॑तये
 दु॒वस्व॑ते रक्षो॒घ्ने स्वाहा॑ ॥ 16 (5)

1.6 ये देवाः (अनुषङ्गः)

ये दे॒वाः पु॒र॒स्सदो॑ऽग्नि॒ नै॒त्रा र॒क्षो॒ह॒ण॒स्तेनः॑ पा॒न्तु ते नो॑ऽव॒न्तु
 तेभ्यो॑ नम॒स्तेभ्य॑ स्स्वाहा
 ये दे॒वा दक्षि॑ण॒सदो॑ यम॒ नै॒त्रा र॒क्षो॒ह॒ण॒स्तेनः॑ पा॒न्तु ते नो॑ऽव॒न्तु
 तेभ्यो॑ नम॒स्तेभ्य॑ स्स्वाहा
 ये दे॒वाः प॒श्चा॒त्सद॑ स्सवि॒तृ नै॒त्रा र॒क्षो॒ह॒ण॒स्तेनः॑ पा॒न्तु ते नो॑ऽव॒न्तु
 तेभ्यो॑ नम॒स्तेभ्य॑ स्स्वाहा
 ये दे॒वा उत्त॑र॒सदो॑ वरु॒णने॒त्रा र॒क्षो॒ह॒ण॒स्तेनः॑ पा॒न्तु ते नो॑ऽव॒न्तु
 तेभ्यो॑ नम॒स्तेभ्य॑ स्स्वाहा
 ये दे॒वा उप॑रि॒षदो॑ बृ॒ह॒स्पति॑ ने॒त्रा र॒क्षो॒ह॒ण॒स्तेनः॑ पा॒न्तु ते नो॑ऽव॒न्तु
 तेभ्यो॑ नम॒स्तेभ्य॑ स्स्वाहा
 ऽग्नये॑ र॒क्षो॒घ्ने स्वाहा॑
 यमाय॑ र॒क्षो॒घ्ने स्वाहा॑,
 सवि॑त्रे र॒क्षो॒घ्ने स्वाहा॑
 वरु॑णाय र॒क्षो॒घ्ने स्वाहा॑
 बृ॒ह॒स्पतये॑ दु॒व॒स्वते र॒क्षो॒घ्ने स्वाहा॑ ॥ 16A (5A)

1.7 आयुष्कामेष्टि मन्त्राः**TS 2.3.10.3 for para no.17**

अ॒ग्निरायु॑ष्मान्त्स वन॑स्पति॒भिः-रायु॑ष्मान् तेन॒त्वाऽऽयु॑षाऽऽयु॑ष्मन्तं करोमि,
 सोम॑ आयु॑ष्मान्त्स ओष॑धीभिर्,
 यज्ञ॑ आयु॑ष्मान्त्स दक्षि॑णाभिर्,
 ब्र॒ह्मायु॑ष्मत्तद् ब्रा॒ह्मणै॑-रायु॑ष्मद्,
 दे॒वा आयु॑ष्मन्तस्ते ऽमृ॑तेनायु॑ष्मन्तस्तेन॒त्वा
 ऽऽयु॑षाऽऽयु॑ष्मन्तं करोमि ॥ 17 (6)

1.8 आयुष्कामेष्टि मन्त्राः (अनुषङ्गः)

अ॒ग्निरायु॑ष्मान्त्स वन॑स्पति॒भिः-रायु॑ष्मान् तेन॒त्वा ऽऽयु॑षाऽऽयु॑ष्मन्तं करोमि
 सोम॑ आयु॑ष्मान्त्स ओष॑धीभि॒रायु॑ष्मान् तेन॒त्वाऽऽयु॑षाऽऽयु॑ष्मन्तं करोमि
 यज्ञ॑ आयु॑ष्मान्त्स दक्षि॑णाभि॒रायु॑ष्मान् तेन॒त्वा ऽऽयु॑षाऽऽयु॑ष्मन्तं करोमि
 ब्र॒ह्मायु॑ष्मत्तद् ब्रा॒ह्मणै॑-रायु॑ष्मत् तेन॒त्वा ऽऽयु॑षाऽऽयु॑ष्मन्तं करोमि
 दे॒वा आयु॑ष्मन्तस्ते ऽमृ॑तेनायु॑ष्मन्तस्तेन॒त्वा
 ऽऽयु॑षाऽऽयु॑ष्मन्तं करोमि ॥ 17A(6A)

1.9 अंहोमुच मन्त्राः**TS 2.3.13.1, for para No. 18**

या॒ वा॒मिन्द्रा॑वरुणा॒ यत॑व्या॒ तनू॑स्तयेम-म॒ह॒सो॑ मुञ्च॒तं॑ ,
 या॒ वा॒मिन्द्रा॑वरुणा॒ सह॑स्या, रक्ष॒स्या, तेज॑स्या,
 तनू॑स्तयेम-म॒ह॒सो॑ मुञ्च॒तं॑,
 यो॒ वा॒मिन्द्रा॑वरुणाव॒ग्नौ॑ स्राम॒स्तं वा॑मेतेना॒ वय॑जे,
 यो॒ वा॒मिन्द्रा॑वरुणा॒ द्विपा॑त्सु॒ पशु॑षु, चतु॒ष्पात्सु॑,
 गो॒ष्ठे, गृ॒हे- , ष्व॒प्सोष॑धीषु, वन॒स्पति॑षु,
 स्राम॒स्तं वा॑मेतेनाव॒ यजे॑ ॥ 18 (7)

1.10 अंहोमुच मन्त्राः (अनुषङ्गः)

या॒ वा॒मिन्द्रा॑वरुणा॒ यत॑व्या॒ तनू॑स्तयेम-म॒ह॒सो॑ मुञ्च॒तं॑
 या॒ वा॒मिन्द्रा॑वरुणा॒ सह॑स्या॒ तनू॑स्तयेम-म॒ह॒सो॑ मुञ्च॒तं॑
 या॒ वा॒मिन्द्रा॑वरुणा॒ रक्ष॑स्या॒ तनू॑स्तयेम-म॒ह॒सो॑ मुञ्च॒तं॑
 या॒ वा॒मिन्द्रा॑वरुणा॒ तेज॑स्या॒ तनू॑स्तयेम-म॒ह॒सो॑ मुञ्च॒तं॑
 यो॒ वा॒मिन्द्रा॑वरुणाव॒ग्नौ॑ स्राम॒स्तं वा॑मेतेनाव॒ यजे॑
 यो॒ वा॒मिन्द्रा॑वरुणा॒ द्विपा॑त्सु॒ पशु॑षु स्राम॒स्तं वा॑मेतेनाव॒ यजे॑
 यो॒ वा॒मिन्द्रा॑वरुणा॒ चतु॒ष्पात्सु॒॑ पशु॑षु स्राम॒स्तं वा॑मेतेनाव॒ यजे॑

यो॑ वा॒मिन्द्रा॑वरुणा गो॒ष्ठे स्रा॒मस्तं॑ वा॒-मे॒तेना॑व यजे
 यो॑ वा॒मिन्द्रा॑वरुणा गृ॒हेषु॑ स्रा॒मस्तं॑ वा॒-मे॒तेना॑व यजे
 यो॑ वा॒मिन्द्रा॑वरुणाऽप्सु स्रा॒मस्तं॑ वा॒-मे॒तेना॑व यजे
 यो॑ वा॒मिन्द्रा॑वरुणौष॒धीषु॑ स्रा॒मस्तं॑ वा॒-मे॒तेना॑व यजे
 यो॑ वा॒मिन्द्रा॑वरुणा वन॒स्पति॑षु स्रा॒मस्तं॑ वा॒-मे॒तेना॑व यजे ॥ (18A) (7A)

1.11 शास्तृ सूक्तं (आप्यं)

TS 5.7.4.3 for para 19

अ॒ग्ने य॑श॒स्विन् य॑श॒से-म॑म॒र्पये॑न्द्रा॒वती॑-म॒पचि॑ती मि॒हाव॑ह ।
 अ॒यं मूर्ध्ना॑ पर॒मेष्ठी॑ सु॒वर्चा॑ स्स॒माना॑नामु॒त्तम॑ इ॒लोको॑ अस्तु ।
 भ॒द्रं प॑श्यन्त॒ उप॑ से॒दुर॒ग्रे तपो॑ दी॒क्षामृ॑षय॒ स्सुव॑र्विदः ।
 ततः॑ क्ष॒त्रं ब॑लमोजश्च॒ जातं॑ तद॒स्मै दे॒वा अ॒भि स॑न्नमन्तु ।
 धा॒ता वि॒धाता॑ पर॒मोत॑ स॒न्दृक् प्र॒जाप॑तिः पर॒मेष्ठी॑ वि॒राजा॑ ।
 स्तो॒मा-श्च॒न्दा॑सि नि॒विदो॑ म आ॒हुरे॑त॒स्मै रा॒ष्ट्रम॑भि स॒न्नमा॑म ।
 अ॒भ्याव॑र्त्त॒ध्व-मु॒पमे॑त सा॒कम॑य॒ शा॒स्ताऽधि॑पतिर्वो अस्तु ।
 अ॒स्य वि॒ज्ञान॑म॒नु स॑ र॒भध्व॑मि॒मं प॒श्चाद॑नु जी॒वाथ॑ सर्वे ॥ 19 (8)

1.12 राष्ट्रभृतं

TS 3.4.7.1, for para No. 20

ऋ॒ता॒षा॒ड् ऋ॒त॒धा॒मा॒ऽग्नि॑र् गन्ध॒र्व॒स्त-स्यौष॑धयो॒ऽप्सर॑स
 ऊ॒र्जो॒ नाम॒ स इ॒दं ब्र॑ह्म॒ क्षत्रं॑ पा॒तु ता इ॒दं ब्र॑ह्म॒ क्षत्रं॑ पा॒न्तु॑
 तस्मै॒ स्वाहा॒ ताभ्य॒ स्स्वाहा॑ ,

स॒ऽहि॒तो वि॒श्वसा॑मा॒ सूर्यो॑ गन्ध॒र्व-स्त॑स्य मरी॒चयो॑ऽप्सर॑स आ॒युव॑ ,
 स्सु॒षु॒म्न स्सूर्य॑रश्मि-श्चन्द्र॑मा॒ गन्ध॒र्व-स्त॑स्य नक्ष॑त्राण्यप्सर॑सो
 बे॒कुर॑यो,

भु॒ज्यु स्सु॑प॒र्णो य॒ज्ञो गन्ध॒र्व-स्त॑स्य दक्षि॑णा अ॒प्सर॑सः स्त॒वाः,
 प्र॒जाप॑तिर् वि॒श्वक॑र्मा॒ मनो॑ गन्ध॒र्व स्त॑स्य॒र्ख्सा॑मान्यप्सर॑सो व॒ह्य,
 इ॒षि॒रो वि॒श्वव्य॑चा॒ वातो॑ गन्ध॒र्व-स्त॑स्यापो॒ऽप्सर॑सो मु॒दा,
 भु॒वन॑स्य प॒ते यस्य॑त॒ उपरि॑ गृ॒हा इ॒ह च॑ ।

स नो॑ रा॒स्वाज्या॑नि॒ऽ रा॒यस्पोष॑ऽ सु॒वीर्य॑ऽ स॒म्व॑त्स॒रीणा॑ऽ स्व॒स्तिं ।
 पर॑मे॒ष्ठ्यधि॑पतिर् मृ॒त्युर् गन्ध॒र्व-स्त॑स्य वि॒श्वम॑प्सर॑सो भु॒व,

स्सु॑क्षि॒थि स्सु॑भूति॒र् भद्र॑कृ॒त् सुव॑र्वान् प॒र्जन्यो॑ गन्ध॒र्व-स्तस्य॑
वि॒द्युतो॑ ऽप्सर॒सो रुचो॑,

दू॒रे हे॑ति॒र-मृ॒डयो॑ मृ॒त्युर् गन्ध॑र्व-स्तस्य॑ प्र॒जा अ॑प्सर॒सो भी॒रुवः॑,
चा॒रुः कृ॑पणका॒शी कामो॑ गन्ध॑र्व-स्तस्या॒धयो॑ ऽप्सर॒स इ॒शोच॑यन्ती॒र्,
नाम॑ स इ॒दं ब्र॑ह्म क्ष॒त्रं पा॑तु ता इ॒दं ब्र॑ह्म क्ष॒त्रं पा॑न्तु तस्मै॒ स्वाहा॑
ताभ्य॑ स्स्वाहा॑,

स नो॑ भुव॒नस्य॑ प॒ते यस्य॑त उ॒परि॑ गृ॒हा इ॒ह च॑ ।

उ॒रु ब्र॑ह्म॒णेऽस्मै॑ क्ष॒त्राय॑ म॒हि श॒र्म यच्छ॑ ॥ 20 (9)

1.13 राष्ट्रभृतं (अनुषङ्गं)

ऋ॒ता॒षा॒ड् ऋ॒त॒धा॒मा॒ग्नि॒र् गन्ध॒र्व स्स इ॒दं ब्र॒ह्म क्ष॒त्रं पा॒तु
तस्मै॒ स्वाहा॒

तस्यौष॑धयोऽप्सर॑स ऊ॒र्जो॒ नाम॒ ता इ॒दं ब्र॒ह्म क्ष॒त्रं पा॒न्तु
ताभ्य॒ स्स्वाहा॒

स॒हि॒तो वि॒श्वसा॑मा॒ सूर्यो॑ गन्ध॒र्व स्स इ॒दं ब्र॒ह्म क्ष॒त्रं पा॒तु
तस्मै॒ स्वाहा॒

तस्य॑ मरी॑चयोऽप्सर॑स आ॒युवो॑ नाम॒ ता इ॒दं ब्र॒ह्म
क्ष॒त्रं पा॒न्तु ताभ्य॒ स्स्वाहा॒

सुषु॑म्न स्सूर्य॑रश्मिश्च॒न्द्रमा॑ गन्ध॒र्व स्स इ॒दं ब्र॒ह्म क्ष॒त्रं पा॒तु
तस्मै॒ स्वाहा॒

तस्य॑ नक्ष॑त्राण्यप्सर॑सो बे॒कुरयो॑ नाम॒ ता इ॒दं
ब्र॒ह्म क्ष॒त्रं पा॒न्तु ताभ्य॒ स्स्वाहा॒

भु॒ज्यु स्सु॑पर्णो॒ यज्ञो॑ गन्ध॒र्व स्स इ॒दं ब्र॒ह्म क्ष॒त्रं पा॒तु
तस्मै॒ स्वाहा॒

तस्य॑ दक्षि॑णा अ॒प्सर॑स स्त॒वा ना॒म ता इ॒दं ब्र॑ह्म क्ष॒त्रं पा॒न्तु॑
ताभ्य॑ स्स्वाहा॑

प्र॒जाप॑तिर् वि॒श्वक॑र्मा म॒नो ग॒न्धर्व॑स्स इ॒दं ब्र॑ह्म क्ष॒त्रं पा॒तु॑
तस्मै॑ स्वाहा॑

तस्य॑ र॒ख्सा॑मान्य-ऽप्सर॑सो व॒ह्यो ना॒म ता इ॒दं
ब्र॑ह्म क्ष॒त्रं पा॒न्तु॑ ताभ्य॑ स्स्वाहे॑

षि॒रो वि॒श्वव्य॑चा वा॒तो ग॒न्धर्व॑स्स इ॒दं ब्र॑ह्म क्ष॒त्रं पा॒तु॑
तस्मै॑ स्वाहा॑

तस्या॑पो-ऽप्सर॑सो मु॒दा ना॒म ता इ॒दं ब्र॑ह्म क्ष॒त्रं
पा॒न्तु॑ ताभ्य॑ स्स्वाहा॑

भु॒वन॑स्य प॒ते यस्य॑त उ॒परि॑ गृ॒हा इ॒ह च॑ ।

स नो॑ रा॒स्वाज्या॑निꣳ रा॒यस्पोष॑ꣳ सु॒वीर्य॑ꣳ स॒म्व॑त्स॒रीणाꣳ
स्व॒स्तिꣳ स्वाहा॑

पर॒मे॒ष्ठ्यधि॑पति॒र् मृ॒त्युर् गन्ध॑र्वस्स इ॒दं ब्र॒ह्म क्ष॒त्रं पा॒तु
तस्मै॒ स्वाहा॒

तस्य॑ वि॒श्वम॑प्सर॒सो भु॒वो ना॒म ता इ॒दं ब्र॒ह्म क्ष॒त्रं पा॒न्तु
ताभ्य॑ स्स्वाहा॒

सु॒क्षि॒थि स्सु॑भूति॒र् भद्र॑कृ॒थ् सु॒व॒र्वान् प॒र्जन्यो॑ गन्ध॑र्वस्स
इ॒दं ब्र॒ह्म क्ष॒त्रं पा॒तु तस्मै॒ स्वाहा॒

तस्य॑ वि॒द्युतो॑ऽप्सर॒सो रु॒चो ना॒म ता इ॒दं ब्र॒ह्म क्ष॒त्रं पा॒न्तु
ताभ्य॑ स्स्वाहा॒

दू॒रे हे॑ति॒र् मृ॒डयो॑ मृ॒त्युर् गन्ध॑र्वस्स इ॒दं ब्र॒ह्म क्ष॒त्रं पा॒तु
तस्मै॒ स्वाहा॒

तस्य॑ प्र॒जा अ॑प्सर॒सो भी॒रुवो॑ ना॒म ता इ॒दं ब्र॒ह्म क्ष॒त्रं पा॒न्तु
ताभ्य॑ स्स्वाहा॒

चा॒रुः कृ॑पणका॒शी का॒मो गन्ध॑र्वस्स इ॒दं ब्र॒ह्म क्ष॒त्रं पा॒तु
तस्मै॒ स्वाहा॒

तस्या॑धयो॑ ऽप्सर॑स इ॒शोच॑यन्ती॒र् नाम॒ ता इ॒दं ब्र॑ह्म॒ क्ष॒त्रं
 ॥
 पान्तु॑ ताभ्य॒ स्वाहा॑

स नो॑ भुवन॑स्यप॒ते यस्य॑त॒ उपरि॑ गृ॒हा इ॒ह च॑ ।

उरु॑ ब्रह्म॑णे॒ऽस्मै क्ष॒त्राय॒ महि॑ शर्म॒ यच्छ॑ स्वाहा॑ ॥ (20A) (9A)

1.14 राष्ट्रभृतं (अनुषङ्गं) जयाति

We have included this type also as this is followed at some schools.

ऋ॒ताषा॑ड् ऋ॒तधा॑मा॒ऽग्नि॑र्-गन्ध॑र्व-स्त॒स्यौष॑धयो-॒ऽप्सर॑स ऊ॒र्जो
 नाम॒ स इ॒दं ब्र॑ह्म॒ क्ष॒त्रं पा॑तु॒ ता इ॒दं ब्र॑ह्म॒ क्ष॒त्रं पा॑न्तु॒
 तस्मै॑ स्वाहा॒ ताभ्य॑ स्वाहा॑

स॒ं॒हि॒तो वि॒श्वसा॑मा॒ सूर्यो॑ गन्ध॑र्वस्त॒स्य म॑रीचयो॒ ऽप्सर॑स आ॒युवो॑
 नाम॒ स इ॒दं ब्र॑ह्म॒ क्ष॒त्रं पा॑तु॒ ता इ॒दं ब्र॑ह्म॒ क्ष॒त्रं पा॑न्तु॒
 तस्मै॑ स्वाहा॒ ताभ्य॑ स्वाहा॑

स॒षु॒म्न स्सूर्य॑रश्मिश्चन्द्र॑मा॒ गन्ध॑र्वस्त॒स्य नक्ष॑त्राण्य॒प्सर॑सो
 बे॒कुर॑यो॒ नाम॒ स इ॒दं ब्र॑ह्म॒ क्ष॒त्रं पा॑तु॒ ता इ॒दं ब्र॑ह्म॒ क्ष॒त्रं पा॑न्तु॒
 तस्मै॑ स्वाहा॒ ताभ्य॑ स्वाहा॑

भु॒ज्युस्सु॒पर्णो॑ य॒ज्ञो गन्ध॑र्वस्तस्य दक्षि॒णा अ॒प्सर॑स-स्स्त॒वा
 ना॒म स इ॒दं ब्र॑ह्म क्ष॒त्रं पा॒तु ता इ॒दं ब्र॑ह्म क्ष॒त्रं पा॒न्तु॑
 तस्मै॑ स्वाहा ताभ्य॒ स्स्वाहा॑

प्र॒जाप॑तिर् वि॒श्वक॑र्मा म॒नो गन्ध॑र्वस्तस्य र॒ख्सा॒मान्य॑प्सर॒सो
 व॒ह्यो ना॒म स इ॒दं ब्र॑ह्म क्ष॒त्रं पा॒तु ता इ॒दं ब्र॑ह्म क्ष॒त्रं पा॒न्तु॑
 तस्मै॑ स्वाहा ताभ्य॒ स्स्वाहा॑

षि॒रो वि॒श्वव्य॑चा वा॒तो गन्ध॑र्वस्तस्यापौ॒ऽप्सर॑सो मु॒दा ना॒म
 स इ॒दं ब्र॑ह्म क्ष॒त्रं पा॒तु ता इ॒दं ब्र॑ह्म क्ष॒त्रं पा॒न्तु॑
 तस्मै॑ स्वाहा ताभ्य॒ स्स्वाहा॑

भु॒वन॑स्य प॒ते यस्य॑त उ॒परि॑ गृ॒हा इ॒ह च॑ ।

स॒नो रा॒स्वाज्या॑नि॒ꣳ रा॒यस्पोष॑ꣳ सु॒वीर्य॑ꣳ सं॒वँत्स॒रीणाꣳ
 स्व॒स्तिꣳ स्वाहा॑

पर॑मे॒ष्ठ्यधि॑पतिर् मृ॒त्युर् गन्ध॑र्वस्तस्य वि॒श्वम॑प्सर॒सो भु॒वो ना॒म
 स इ॒दं ब्र॑ह्म क्ष॒त्रं पा॒तु ता इ॒दं ब्र॑ह्म क्ष॒त्रं पा॒न्तु॑
 तस्मै॑ स्वाहा ताभ्य॒ स्स्वाहा॑

सु॒क्षि॒ति॒ स्सु॒भू॒ति॒र् भ॒द्र॒कृ॒त् सु॒व॒र्वान् प॒र्ज॒न्यो ग॒न्ध॒र्व॒स्त॒स्य॑ वि॒द्यु॒तो॑
 ऽप्सर॒सो रु॒चो॒ नाम॒ स इ॒दं ब्र॒ह्म क्ष॒त्रं पा॒तु ता इ॒दं ब्र॒ह्म क्ष॒त्रं पा॒न्तु॑
 तस्मै॑ स्वा॒हा ताभ्य॑ स्स्वा॒हा

दू॒रे॒हे॒ति॒रमृ॒डयो॑ मृ॒त्युर् ग॒न्ध॒र्व॒स्त॒स्य॑ प्र॒जा अ॒प्सर॒सो भी॒रु॒वो॑
 नाम॒ स इ॒दं ब्र॒ह्म क्ष॒त्रं पा॒तु ता इ॒दं ब्र॒ह्म क्ष॒त्रं पा॒न्तु॑
 तस्मै॑ स्वा॒हा ताभ्य॑ स्स्वा॒हा

चा॒रुः कृ॒पण॑का॒शी का॒मो ग॒न्ध॒र्व॒स्त॒स्या॒धयो॑प्सर॒स॒-
 श॒शो॒च॒यन्ती॒र् नाम॒ स इ॒दं ब्र॒ह्म क्ष॒त्रं पा॒तु ता इ॒दं ब्र॒ह्म क्ष॒त्रं
 पा॒न्तु॑ तस्मै॑ स्वा॒हा ताभ्य॑ स्स्वा॒हा

स नो॑ भुव॒नस्य॑ प॒ते यस्य॑त उ॒परि॑ गृ॒हा इ॒ह च॑ ।

उ॒रु ब्र॒ह्म॒णे॒स्मै क्ष॒त्राय॑ म॒हि श॒र्म य॒च्छ स्वा॒हा॑ । (20B) (9B)

1.15 सर्प सूक्तं

TS 4.2.8.3 for para No. 21

नमो॑ अस्तु॑ सर्पे॑भ्यो॒ ये के॑ च पृ॒थि॒वी म॑नु ।
 ये अ॒न्तरि॑क्षे॒ ये दि॒वि ते॒भ्य स्स॑र्पे॑भ्यो॒ नमः॑ ।
 येऽदो॑ रो॒चने॑ दि॒वो ये वा॑ सूर्य॑स्य र॒श्मिषु॑ ।
 येषा॑म॒प्सु स॒दः कृ॑तं ते॒भ्य स्स॑र्पे॑भ्यो॒ नमः॑ ।
 या इ॒षवो॑ यातु॒धाना॑नां॒ ये वा॑ व॒नस्प॑ती॒रनु॑ ।
 ये वाऽव॑टे॒षु शे॑रते॒ तेभ्य॑ स्स॒र्पेभ्यो॑ नमः॑ ॥ 21 (10)

1.16 पंचचोडाः

TS 4.4.3.1 for para No. 22

अ॒यं पु॒रो ह॒रि॒केश॑ स्सूर्य॑र॒श्मि-स्त॑स्य रथ॒गृथ्स॑श्च रथौ॒जाश्च॑
 से॒ना॒नि॒ग्रा॒म॒ण्यौ पु॒ञ्जि॒क॒स्थ॒ला च॑ कृ॒त॒स्थ॒ला चा॑प्स॒रसौ॑ यातु॒धाना॑
 हे॒ती र॒क्षा॒सि प्र॑हेति॒ ,

र॒यं द॑क्षि॒णा वि॒श्वक॑र्मा त॒स्य र॑थ॒स्वन॑श्च रथे॒चि॒त्रश्च॑ से॒ना॒नि॒ग्रा॒म॒ण्यौ
 मे॒न॒का च॑ स॒हज॑न्याचा॒प्स॒रसौ॑ द॒ङ्क्ष॑णवः प॒शवो॑ हे॒तिः पौ॑रु॒षेयो॑
 व॒धः प्र॑हेति॒ ,

र॒यं प॒श्चाद् वि॒श्वव्य॑चा स्तस्य रथ॑प्रोतश्चासमरथश्च से॒नानि॑ग्राम॒ण्यौ
प्र॒म्लोच॑न्ती चा नु॒म्लोच॑न्तीचाऽप्सरसौ सर्पा हे॒तिर् व्या॒घ्राः प्रहे॑ति,

रय मु॑त्तराथ् सम्य॑द्वसुस्तस्य से॒नजि॑च्च सु॒षेण॑श्च से॒नानि॑ग्राम॒ण्यौ
वि॒श्वाची॑च घृ॒ताची॑ चाप्सरसावापो हे॒तिर् वा॒तः प्रहे॑ति ,

रय-मु॑पर्यर्वाग्वसु स्तस्य ताक्ष॑र्य-श्चा॒रि॒ष्टने॑मिश्च से॒नानि॑
ग्राम॒ण्यावु॑र्वशी च पूर्॒वचि॑त्तिश्चाप्सरसौ वि॒द्युद्धे॑ति-रवस्फूर्जन् प्रहे॑ति ,

स्ते॒भ्यो न॒मस्ते॒ नो मृ॑डयन्तु ते यं द्वि॒ष्मो यश्च॑ नो द्वेष्टि तं वो
ज॒म्भे द॑धामि ॥ 22 (11)

1.17 पंचचोडाः (अनुषङ्गः)

अ॒यं पु॒रो ह॒रि॒केश॑ स्सूर्य॑र॒श्मि-स्तस्य॑ रथ॒गृ॒थ्सश्च॑ रथौ॒जाश्च॑
 से॒ना॒नि॒ग्रा॒म॒ण्यौ पु॒ज्जि॒क॒स्थ॒ला च॑ कृ॒त॒स्थ॒ला चा॒प्सर॑सौ
 या॒तु॒धा॒ना हे॒ती र॒क्षा॒सि प्र॒हे॒ति॒स्तेभ्यो॑ नम॒स्ते नो॑ मृ॒डय॑न्तु
 ते॒यं द्वि॒ष्मो यश्च॑ नो॒ द्वेष्टि॑ तं वो॒ जंभे॑ द॒धा

म्य॒यं दक्षि॑णा वि॒श्व॒कर्मा॑ तस्य॑ रथ॒स्वन॑श्च रथे॒चित्र॑श्च
 से॒ना॒नि॒ग्रा॒म॒ण्यौ मे॒न॒का च॑ स॒ह॒ज॒न्या चा॒प्सर॑सौ द॒ङ्क्ष॒णवः॑
 प॒श॒वो हे॒तिः पौ॒रु॒षे॒यो व॒धः प्र॒हे॒ति॒स्तेभ्यो॑ नम॒स्ते नो॑ मृ॒डय॑न्तु
 ते॒यं द्वि॒ष्मो यश्च॑ नो॒ द्वेष्टि॑ तं वो॒ जंभे॑ द॒धा

म्य॒यं प॒श्चाद् वि॒श्व॒व्य॒चा-स्तस्य॑ रथ॒प्रो॒तश्चा॑स॒म॒रथ॑श्च
 से॒ना॒नि॒ग्रा॒म॒ण्यौ प्र॒म्लो॑च॒न्ती॒चा नु॒म्लो॑च॒न्ती चा॒प्सर॑सौ सर्पा
 हे॒तिर् व्या॒घ्राः प्र॒हे॒ति॒स्तेभ्यो॑ नम॒स्ते नो॑ मृ॒डय॑न्तु ते॒यं द्वि॒ष्मो
 यश्च॑ नो॒ द्वेष्टि॑ तं वो॒ जंभे॑ द॒धा

म्यय-मुत्तराथ् सम्यँद्वसुस्तस्य सेनजिच्च सुषेणश्च
 सेनानिग्रामण्यौ विश्वाचीच घृताचीचाप्सरसावापो हेतिर्
 वातः प्रहेतिस्तेभ्यो नमस्ते नो मृडयन्तु ते यं द्विष्मो यश्च नो
 द्वेष्टि तं वो जंभे दधा

म्ययमुपर्यर् वाग्वसु स्तस्य ताक्ष्यश्चारिष्टनेमिश्च
 सेनानिग्रामण्यावुर्वशी च पूर्वचित्ति-श्चाप्सरसौ
 विद्युद्धेतिर-वस्फूर्जन् प्रहेतिस्तेभ्यो नमस्ते नो मृडयन्तु ते यं द्विष्मो
 यश्च नो द्वेष्टि तं वो जंभे दधामि ॥ 22A(11A)

1.18 अप्रतिरथः

TS 4.6.4.1, for para No. 23 to 27

आशुः शिशानो वृषभो न युद्ध्मो घनाघनः क्षोभण-श्चर्षणीनां ।
 संक्रन्दनोऽनिमिष एकवीर इशतः सेना अजयथ् साकमिन्द्रः ।
 संक्रन्दनेनानिमिषेण जिष्णुना युत्कारेण दुश्चयवनेन धृष्णुना ॥
 तदिन्द्रेण जयत तथ् सहध्वं युधो नर इषुहस्तेन वृष्णा ॥
 स इषुहस्तैः स निषंगिभिर्वशी सऽस्रष्टा स युध इन्द्रो गणेन ।
 सऽसृष्टजिथ् सोमपा बाहुशर्द्यूर्ध्वधन्वा प्रतिहिताभिरस्ता ॥
 बृहस्पते परि दीया रथेन रक्षोहा मित्राऽपबाधमानः ॥ 23

प्र॒भं॒जन्थ् से॒नाः प्र॒मृ॒णो यु॒धा ज॒यन्न॒स्माक॑-मे॒द्ध्य॒वि॒ता र॒थानां॑ ।
 गो॒त्रभि॑दं गो॒विदं॑ व॒ज्रबा॑हुं ज॒यन्त॒मज्म॑ प्र॒मृ॒णन्त॒-मो॒जसा॑ ।
 इ॒मꣳ स॒जा॒ता अनु॑ वी॒रय॑द्ध्व॒मिन्द्रꣳ स॒खायोऽनु॑ सꣳ र॒भद्ध्वं॑ ।
 ब॒लवि॒ज्ञायः॑ स्थ॒विरः॑ प्र॒वीर॑ स्सह॒स्वान् वा॒जी स॒हमा॑न उ॒ग्रः ।
 अ॒भि॒वी॒रो अ॒भिस॑त्वा स॒हो॒जा जै॒त्रमि॑न्द्र र॒थमा॑ तिष्ठ गो॒वित् ॥ 24

अ॒भि गो॒त्राणि॑ स॒हसा॑ गा॒हमा॑नोऽदा॒यो वी॒र इ॒शत॑म॒न्युरि॑न्द्रः ।
 दु॒श्च॒य॒वनः॑ पृ॒तना॑षाड्यु॒द्ध्यो॒स्माकꣳ से॒ना अ॒वतु॑ प्र यु॒थ्सु॑ ।
 इ॒न्द्र आ॒सां ने॒ता बृ॒हस्प॑तिर् दक्षि॒णा य॒ज्ञः पु॒र ए॒तु सो॒मः ।
 दे॒वसे॑नाना-म॒भिभ॑ञ्जतीनां ज॒यन्ती॑नां मरु॒तो य॑न्त्व॒ग्रे ।
 इ॒न्द्रस्य॑ वृ॒ष्णो व॒रुण॑स्य रा॒ज्ञ आ॒दि॒त्यानां॑ मरु॒ताꣳ श॒र्द्ध उ॒ग्रं ।
 म॒हाम॑नसां भु॒वन॑च्य॒वानां॑ घो॒षो दे॒वानां॑ ज॒यता॑ मु॒दस्था॑त् ।
 अ॒स्माक॑-मि॒न्द्र स्स॑मृ॒तेषु॑ ध्व॒जेष्व॒स्माकं॑ या॒ इष॑वस्ता ज॒यन्तु ॥ 25

अ॒स्माकं॑ वी॒रा उ॒त्तरे॑ भव॒न्त्वस्मा॑नु दे॒वा अ॒वता॑ ह॒वेषु॑ ।
 उ॒द्धर्ष॑य म॒घव॑-न्नायु॒धान्यु॑थ् स॒त्त्वनां॑ मा॒मका॑नां म॒हाꣳसि॑ ।
 उ॒द्वृ॒त्रह॑न्-वा॒जिनां॑ वा॒जिना॑न्यु॒द्-र॒थानां॑ ज॒यता॑मेतु॒ घोषः॑ ।
 उ॒प प्रे॒त ज॒यता॑ नरः स्थि॒रा व स्स॑न्तु बा॒हवः॑ ।

इन्द्रो॑ वः॒ शर्म॑ यच्छ॒त्वनाधृ॑ष्या यथा ऽसथ॑ ।
 अव॑सृष्टा॒ परा॑ पत॒ शरव्ये॑ ब्रह्म॑सञ्शिता ॥ 26

गच्छ॑मित्रान् प्र॒ विश॑ मैषां॒ कञ्च॑नोच्छिषः ।
 मर्मा॑णि ते॒ वर्म॑भि इच्छादयामि सोम॑स्त्वा राजा॒ ऽमृते॑नाभि वस्तां ।
 उरोर्व॑रीयो वरि॑वस्ते अस्तु॒ जय॑न्तं त्वामनु॒ मद॑न्तु देवाः ।
 यत्र॑ बाणा॒ स्संप॑तन्ति कु॒मारा॑ विशि॒खा इव॑ ।
 इन्द्रो॑ न स्तत्र॒ वृत्र॑हा विश्वाहा शर्म॑ यच्छतु ॥ 27 (12)

1.19 चमकं तृतीय अनुवाकः

TS 4.7.3.1 & 2 for para 28 and 29

शं च॑ मे मयश्च॒ मे प्रि॑यं च॒ मेऽनु॑कामश्च॒ मे
 काम॑श्च॒ मे सौ॑मनसश्च॒ मे भद्रं॑ च॒ मे श्रे॑यश्च॒ मे
 वस्य॑श्च॒ मे यश॑श्च॒ मे भग॑श्च॒ मे द्र॒विणं॑ च॒ मे
 यन्ता॑ च॒ मे ध॒र्ता च॑ मे॒ क्षे॒मश्च॑ मे॒ धृ॒तिश्च॑ मे
 विश्वं॑ च॒ मे मह॑श्च॒ मे (28)

सम्वि॑च्च॒ मे ज्ञा॑त्रं च॒ मे
 सूश्च॑ मे प्रसू॑श्च॒ मे सी॒रं च॑ मे लय॑श्च॒ म
 ऋ॒तं च॑ मेऽमृ॑तं च॒ मे ऽय॒क्ष्मं च॑ मेऽना॑मयच्च॒ मे

जी॒वातु॑श्च मे दी॒र्घायु॑त्वं च मेऽन॒मित्रं॑ च मेऽभ॒यं च मे
सु॒गं च मे श॒यनं॑ च मे सू॒षा च मे सु॒दिनं॑ च मे ॥ 29 (13)

1.20 विहव्यम्

TS 4.7.14.1 to TS 4.7.14.4 for para 30 to 33

ममा॒ग्ने व॒र्चो वि॒हवे॑ष्वस्तु व॒यं त्वे॒न्धा॒ना स्त॒नुवं पु॒षेम ।
म॒ह्यं न॒मन्तां प्र॒दिश॑श्चत॒स्र स्त्वया॑ ऽद्ध्य॒क्षेण॑ पृ॒तना॑ जयेम ।
मम॑ दे॒वा वि॒हवे॑ स॒न्तु सर्व॑ इन्द्रा॒वन्तो म॒रुतो॑ विष्णु॒रग्निः॑ ।
ममा॒न्तरि॑क्षमु॒रु गो॒पम॑स्तु म॒ह्यं वा॑तः प॒वतां॑ का॒मे अ॒स्मिन् ।
मयि॑ दे॒वा द्र॒विण॑मा य॒जन्तां म॒य्याशी॑रस्तु मयि॑ दे॒वहू॑तिः ॥ 30

दै॒व्या हो॑ता॒रा व॒निष॑न्त पूर्वे ऽरि॒ष्टा स्स्या॑म त॒नुवा॑ सु॒वीराः॑ ।
म॒ह्यं य॑जन्तु मम॑ या॒नि ह॒व्या ऽऽकू॑ति स्स॒त्या म॒नसो॑ मे अस्तु ।
ए॒नो मा॒ नि गां॑ क॒तम॑च्च॒नाहं वि॑श्वे दे॒वासो॑ अ॒धि वो॑च॒ता मे ।
दे॒वीष्ष॑डु॒र्वी-रु॒रु णः॑ कृ॒णोत॑ वि॒श्वे दे॒वास इ॒ह वी॑र॒यद्ध्वं॑ ।
मा हा॑स्महि प्र॒जया॑ मा त॒नूभि॑र् मा र॒धाम द्वि॑ष॒ते सो॒म रा॑जन् ।
अ॒ग्निर्म॑न्युं प्र॒तिनु॑दन् पु॒रस्ता॑दद॒ब्धो गो॒पाः परि॑ पा॒हि न॒ स्त्वं ॥ 31

प्र॒त्य॒ञ्चो॑ य॒न्तु नि॒गुतः॑ पु॒नस्ते॑ ऽमै॒षां चि॒त्तं प्र॒बुधा॑ वि॒ नेशत् ।
 धा॒ता धा॒तृणां॑ भु॒वनस्य॑ य॒स्पति॑र् दे॒व॒ꣳ स॒वितार॑-म॒भिमा॑ति॒षाहं॑ ।
 इ॒मं य॑ज्ञ॒मश्वि॑नो॒भा बृ॒हस्प॑ति॒र् दे॒वाः पा॑न्तु॒ यज॑मानन् न्य॒र्थात् ।
 उ॒रुव्य॑चा॒ नो म॒हिष॑ इ॒शर्म॑ य॒ꣳसद॑स्मिन् ह॒वे पु॑रु॒हूतः॑ पु॒रुक्षु॑ ।
 स नः॑ प्र॒जायै॑ ह॒र्यश्च॑ मृ॒डये॑न्द्र॒ मा नो॑ री॒रिषो॑ मा॒ परा॑ दाः ॥ 32

ये न॑ स्स॒पत्ना॑ अ॒पते॑ भ॒वन्त्वि॒न्द्राग्नि॑भ्या-म॒व बा॑धामहे॒ तान् ।
 व॒सवो॑ रु॒द्रा आ॑दि॒त्या उ॒परि॑स्पृ॒शं मो॒ग्रं चे॒त्तार॑-म॒धिरा॑ज॒मक्र॑न् ।
 अ॒र्वाञ्च॑-मि॒न्द्र-म॒मुतो॑ ह॒वामहे॑ यो गो॒जिद्-ध॒नजि॑-द॒श्वजि॑द् यः ।
 इ॒मन्नो॑ य॒ज्ञं वि॑ह॒वे जु॑ष॒स्वास्य॑ कु॒र्मो ह॒रिवो॑ मे॒दिनं॑ त्वा ॥ 33 (14)

1.21 मृगारः

TS 4.7.15.1 to TS 4.7.15.7 for para 34 to 40

अ॒ग्नेर् म॑न्वे प्रथ॒मस्य॑ प्र॒चेत॑सो यं पाञ्च॒जन्यं॑ ब॒हव॑ स्स॒मिन्धते॑ ।
 वि॒श्वस्यां॑ वि॒शि प्र॑वि॒विशि॑वा॒ꣳस-मी॑महे स नो॑ मुञ्च॒त्वꣳह॑सः ।
 य॒स्येदं॑ प्रा॒णन्नि॑मिषद् यदे॒जति॑ यस्य॒ जातं॑ ज॒नमा॑नं च के॒वलं ।
 स्तौ॑म्य॒ग्निं ना॑थि॒तो जो॑ह॒वीमि॑ स नो॑ मुञ्च॒त्वꣳह॑सः ।
 इ॒न्द्रस्य॑ म॒न्ये प्रथ॑मस्य प्र॒चेत॑सो वृ॒त्रघ्नः॑ स्तो॒मा उप॑ मा-मु॒पागुः॑ ।
 यो दा॑शु॒षः सु॒कृतो॑ ह॒वमु॑प॒ गन्ता॑ स नो॑ मुञ्च॒त्वꣳह॑सः ॥ 34

य॒ स्संग्रामं॑ न॒यति॑ सं॒ व॒शी यु॒धे यः पु॒ष्टानि॑ स॒ञ्सृ॒जति॑ त्र॒याणि॑ ।
 स्तौ॒मीन्द्रं॑ ना॒थितो॑ जो॒हवीमि॑ स नो॒ मुञ्च॑त्व॒हसः॑ ।
 मन्वे॑ वां मि॒त्रावरु॑णा तस्य॑ वि॒त्त॒ सत्यौ॑जसा दृ॒हणा॑ यं नु॒देथे॑ ।
 या॒ राजान॑ स॒रथं॑ या॒थ उ॒ग्रा ता नो॑ मुञ्चतमा॒गसः॑ ।
 यो वा॑ रथ॑ ऋ॒जुर॑श्मिः स॒त्यध॑र्मा मिथु॑श्चरन्त-मु॒पया॑ति
 दू॒षयन् ॥ 35

स्तौ॒मि मि॒त्रावरु॑णा ना॒थितो॑ जो॒हवीमि॑ तौ नो॒ मुञ्च॑तमा॒गसः॑ ।
 वा॒यो स्स॒वितु॑र् वि॒दथानि॑ मन्महे॒ यावा॑त्मन्वद् बिभृ॒तो यौ
 च र॑क्षतः ।
 यौ वि॒श्वस्य॑ परि॒भू ब॒भूवतु॑स्तौ नो॒ मुञ्च॑तमा॒गसः॑ ।
 उप॒ श्रेष्ठा॑ न आ॒शिषो॑ दे॒वयो॑र्ध॒र्मे अ॒स्थिर॑न् ।
 स्तौ॒मि वा॒यु स॒वितारं॑ ना॒थितो॑ जो॒हवीमि॑ तौ नो॒ मुञ्च॑तमा॒गसः॑ ।
 रथी॑तमौ रथी॒नाम॑ह्व ऊ॒तये॑ शु॒भंग॑मि॒ष्टौ सु॒यमे॑भि-र॒श्वैः ॥ 36

ययौ॑र्वा दे॒वौ दे॒वेष्व॑नि॒शित॑मोज स्तौ नो॒ मुञ्च॑तमा॒गसः॑ ।
 यद॑यातं वँह॒तु सूर्या॑या-स्त्रि॒चक्रे॑ण स॒दमि॑च्छ॒मानौ॑ ।
 स्तौ॒मि दे॒वाव॑श्चि॒नौ ना॒थितो॑ जो॒हवीमि॑ तौ नो॒ मुञ्च॑तमा॒गसः॑ ।

म॒रुतां॑ म॒न्वे अ॒धि नो॑ ब्रुवन्तु॒ प्रेमां॑ वा॒चं वि॒श्वाम॑वन्तु॒ विश्वे॑ ।
 आ॒शून् हु॒वे सु॒यमा॑नू॒तये॑ ते नो॑ मुञ्चन्त्वे॒नसः॑ ।
 ति॒ग्ममा॑यु॒धं वि॒डित॑ सह॒स्वद् दि॒व्यं श॒र्द्धः पृ॑तनासु जि॒ष्णु ॥ 37

स्तौमि॑ दे॒वान् म॒रुतो॑ ना॒थितो॑ जो॒हवीमि॑ ते नो॑ मुञ्चन्त्वे॒नसः॑ ।
 दे॒वानां॑ म॒न्वे अ॒धि नो॑ ब्रुवन्तु॒ प्रेमां॑ वा॒चं वि॒श्वाम॑वन्तु॒ विश्वे॑ ।
 आ॒शून् हु॒वे सु॒यमा॑नू॒तये॑ ते नो॑ मुञ्चन्त्वे॒नसः॑ ।
 यदि॑दं मा॒ऽभि॒शोच॑ति पौ॒रुषे॑येण दै॒व्येन॑ ।
 स्तौमि॑ वि॒श्वान् दे॒वान् ना॒थितो॑ जो॒हवीमि॑ ते नो॑ मुञ्चन्त्वे॒नसः॑ ।
 अनु॑नो-ऽद्या॒नुम॑तिर॒न्विद॑नु म॒ते त्वं वै॒श्वान॑रो न ऊ॒त्या

पृ॒ष्ठो दि॒वि । 38

Below is the full text of the concised Mantra given in "italics" above.

This concised Mantra is formed by adding the First word/part from the first part of the First para , 2nd word /part from first part of Second para of Full Mantra which is given below. Add the Underlined words of the Full Mantra to arrive at the above concised Mantra. It is more appropriate to chant the full version as given below. Please refer to your Guru for any clarifications/explanations.

अनु॑ नोऽद्या॒नुम॑तिर् य॒ज्ञं दे॒वेषु॑ म॒न्यतां॑ ।
 अ॒ग्निश्च॑ ह॒व्यवा॑हनो भ॒वतां॑ दा॒शुषे॑ म॒यः ।

अ॒न्वि॒द॒नु॒म॒ते॒ त्वं॑ म॒न्या॒सै॒ शं॑ च॒ नः॑ कृ॒धि ।

क्र॒त्वे॒ दक्षाय॑ नो हि॒नु प्र॒ ण॒ आयू॑षि॒ तारि॑षः ॥ 38a

वै॒श्वान॒रो न॑ ऊ॒त्या ऽऽप्र॑यातु॒ परा॑वतः ।

अ॒ग्नि॒रु॒क्थे॒न॒ वा॒ह॒सा ।

पृ॒ष्ठो दि॒वि पृ॒ष्ठो अ॒ग्निः पृ॒थि॒व्यां पृ॒ष्ठो वि॒श्वा ओ॒ष॒धी॒रा वि॒वेश॑ ।

वै॒श्वान॒र स्स॒ह॒सा पृ॒ष्ठो अ॒ग्नि स्स॒नो दि॒वा स॒ रि॒षः पा॒तु न॑क्तं ॥ 38b

Expansion Ref . 38a - in TS 3.3.11.3 / 38b - in TS 1.5.11.1

ये अ॒प्र॒थे॒ता-म॒मि॒ते॒भि-रो॒जो॒भिर्ये॑ प्र॒ति॒ष्ठे अ॒भ॒व॒तां व॑सू॒नां ।

स्तौ॒मि द्या॒वापृ॒थि॒वी ना॒थि॒तो जो॒ह॒वीमि॑ ते नो॒ मुञ्च॑तम॒ह॒सः ।

उ॒र्वी रो॒द॒सी व॒रि॒वः कृ॒णो॒तं क्षे॒त्र॒स्य॑ प॒त्नी अ॒धि नो॑ ब्रू॒यातं॑ ।

स्तौ॒मि द्या॒वापृ॒थि॒वी ना॒थि॒तो जो॒ह॒वीमि॑ ते नो॒ मुञ्च॑तम॒ह॒सः ।

य॒त्ते व॒यं पु॒रु॒ष॒त्रा य॒वि॒ष्ठावि॒द्वाँस॑ श्र॒कृ॒मा क॒च्च॒नाऽऽगः॑ ॥ 39

कृ॒धी स्व॑स्माँ अ॒दि॒ते॒र॒ना॒गा व्ये॒नाँसि॑ शि॒श्र॒थो वि॒ष्व॒ग॒ग्ने॑ ।

य॒था ह॒ तद् व॒स॒वो गौ॒र्यं चि॒त् प॒दि षि॒ता-म॒मुञ्च॑ता य॒ज॒त्राः ।

ए॒वा त्व॒म॒स्मत् प्र॒ मुञ्चा॑ व्य॒हः प्रा॒ता॒र्य॒ग्ने प्र॒त॒रा॒न्न आ॒युः॑ ॥ 40 (15)

1.22 सर्पाहुती मन्त्राः**TS 5.5.10.1 to TS 5.5.10.3, for para 41**

समी॒ची॒ नामा॑सि प्रा॒ची॒ दि॒क्तस्या॑स्ते ऽग्नि॒रधि॑पति-रसि॒तो र॑क्षि॒ता
 यश्चा॑धिपति॒र् यश्च॑ गो॒प्ता ता॑भ्यां नम॒स्तौ नो॑ मृडयतां ते यं द्वि॒ष्मो
 यश्च॑ नो द्वेष्टि॒ तं वाँ॑ जंभे दधाम्यो-

-ज॒स्विनी॑ नामा॑सि दक्षि॒णा दि॒क्तस्या॑स्त इन्द्रो॑ऽधिपतिः पृ॒दाकुः॑ ,

प्रा॒ची॒ नामा॑सि प्र॒तीची॑ दि॒क्तस्या॑स्ते सोमो॑ऽधिपति स्स्व॒जो ,
 ऽव॒स्थावा॑ नामा॑स्युदी॒ची दि॒क्तस्या॑स्ते वरु॒णोऽधि॑पति-स्ति॒रश्च॑राजि,
 -र॒धिप॑त्नी नामा॑सि बृ॒हती॑ दि॒क्तस्या॑स्ते बृ॒हस्प॑ति-रधि॒पति॑ इ॒श्वत्रो॑,
 व॒शिनी॑ नामा॑सीयं दि॒क्तस्या॑स्ते यमो॑ऽधिपतिः क॒ल्माष॑ग्रीवो,

रक्षि॒ता यश्चा॑धिपति॒र् यश्च॑ गो॒प्ता ता॑भ्यां नम॒स्तौ नो॑ मृडयतां
 ते यं द्वि॒ष्मो यश्च॑ नो द्वेष्टि॒ तं वाँ॑ जंभे दधामि ॥ 41 (16)

1.23 सर्पाहुती मन्त्राः (अनुषङ्गः)

समी॒ची॒ नामा॑सि प्रा॒ची॒ दि॒क्तस्या॑स्ते ऽग्नि॒रधि॑पति रसि॒तो
 रक्षि॒ता यश्चा॑धिपति॒र् यश्च॑ गो॒प्ता ता॑भ्यां नम॒स्तौ नो॑ मृडयतां
 ते यं द्वि॒ष्मो यश्च॑ नो द्वेष्टि॒ तं वाँ॑ जंभे दधा

म्योज॒स्विनी॒ नामा॑सि दक्षि॒णा दि॒क्तस्या॑स्त इन्द्रोऽधि॒पतिः॑ पृ॒दाकू॑
 रक्षि॒ता यश्चाधि॑पतिर् यश्च गो॒प्ता ताभ्यां॑ नमस्तौ नो मृ॒डयतां॑
 ते यं द्वि॒ष्मो यश्च॑ नो द्वेष्टि तं वाँ जंभे॑ दधामि॒

प्रा॒ची नामा॑सि प्र॒तीची॒ दि॒क्तस्या॑स्ते सोमोऽधि॒पति॑ स्स्व॒जो
 रक्षि॒ता यश्चाधि॑पतिर् यश्च गो॒प्ता ताभ्यां॑ नमस्तौ नो मृ॒डयतां॑
 ते यं द्वि॒ष्मो यश्च॑ नो द्वेष्टि तं वाँ जंभे॑ दधा॒

म्यव॒स्थावा॒ नामा॑स्युदी॒ची दि॒क्तस्या॑स्ते वरु॒णोऽधि॑पति-स्तिरश्च
 राजी॑ रक्षि॒ता यश्चाधि॑पतिर् यश्च गो॒प्ता ताभ्यां॑ नमस्तौ नो मृ॒डयतां॑
 ते यं द्वि॒ष्मो यश्च॑ नो द्वेष्टि तं वाँ जंभे॑ दधा॒

म्यधि॑प॒त्नी नामा॑सि बृ॒हती॒ दि॒क्तस्या॑स्ते बृ॒हस्प॑ति-रधि॒पतिः॑
 श्वि॒त्रो रक्षि॒ता यश्चाधि॑पतिर् यश्च गो॒प्ता ताभ्यां॑ नमस्तौ नो मृ॒डयतां॑
 ते यं द्वि॒ष्मो यश्च॑ नो द्वेष्टि तं वाँ जंभे॑ दधामि॒

वशि॒नी नामा॑सीयं दि॒क्तस्या॑स्ते यमोऽधि॒पतिः॑ कल्माष॒ग्रीवो॑
 रक्षि॒ता यश्चाधि॑पतिर् यश्च गो॒प्ता ताभ्यां॑ नमस्तौ नो मृ॒डयतां॑
 ते यं द्वि॒ष्मो यश्च॑ नो द्वेष्टि तं वाँ जंभे॑ दधामि ॥ 41A (16A)

1.24 गन्धर्वाहुतीः**TS 5.5.10.4 to TS 5.5.10.5, for para 42**

हे॒तयो॒ नाम॑ स्थ॒ तेषां॑ ँ॒वः पु॒रो गृ॒हा अ॒ग्निर्व॒ इष॑व॒ स्सल॑लिलो,
 नि॒लि॒पा नाम॑ स्थ॒ तेषां॑ ँ॒वो दक्षि॑णा गृ॒हाः पि॒तरो॑ व॒ इष॑व॒ स्सग॑रो,
 वज्रि॑णो॒ नाम॑ स्थ॒ तेषां॑ ँ॒वः प॒श्चाद् गृ॒हा स्स्व॑प्नो॒ व इष॑वो ग॒ह्वरो॑,
 ऽव॒स्थावा॑नो॒ नाम॑ स्थ॒ तेषां॑ ँ॒व उत्त॑राद् गृ॒हा आ॒पो व॒ इष॑व॒ स्समु॑द्रो-
 ऽधि॑पतयो॒ नाम॑ स्थ॒ तेषां॑ ँ॒व उ॒परि॑ गृ॒हा व॒र्षं ँ॒व इष॑वो॒ ऽव॑स्वान्,
 क्र॒व्या नाम॑ स्थ॒ पार्त्वि॑वा-स्तेषां॑ ँ॒व इ॒ह गृ॒हा अ॒न्नं ँ॒व इष॑वो नि॒मिषो॑,
 वा॒तना॑मं ते॒भ्यो वो॒ नम॑स्ते नो मृ॒डय॑त ते यं द्वि॒ष्मो यश्च॑ नो द्वेष्टि
 तं ँ॒वो ज॑म्भे दधामि ॥ 42 (17)

1.25 गन्धर्वाहुतीः (अनुषङ्गः)

हे॒तयो॒ नाम॑ स्थ॒ तेषां॑ ँ॒वः पु॒रो गृ॒हा अ॒ग्निर्व॒ इष॑व॒ स्सल॑लिलो
 वा॒तना॑मं ते॒भ्यो वो॒ नम॑स्ते नो मृ॒डय॑त ते यं द्वि॒ष्मो
 यश्च॑ नो द्वेष्टि तं ँ॒वो ज॑म्भे दधामि

निलि॑न्पा॒ नाम॑ स्थ॒ तेषां॑ ँ॒ वो दक्षि॑णा गृ॒हाः पि॒तरो॑ व॒ इष॑वस्सगरो
वा॒तना॑मं तेभ्यो॑ वो नम॒स्ते नो॑ मृडय॒त ते यं॑ द्वि॒ष्मो
यश्च॑ नो॒ द्वेष्टि॑ तं॒ वो ज॑भे द॒धामि॑

वज्रि॑णो नाम॑ स्थ॒ तेषां॑ ँ॒ वः पश्चा॑द् गृ॒हा स्स्व॑प्नो व॒ इष॑वो
ग॒ह्वरो॑ वा॒तना॑मं तेभ्यो॑ वो नम॒स्ते नो॑ मृडय॒त ते यं॑ द्वि॒ष्मो
यश्च॑ नो॒ द्वेष्टि॑ तं॒ वो ज॑भे द॒धा

म्य॑वस्था वा॒ नो नाम॑ स्थ॒ तेषां॑ ँ॒ व उत्तरा॑द् गृ॒हा आपो॑ व॒ इष॑व
स्समु॑द्रो वा॒तना॑मं तेभ्यो॑ वो नम॒स्ते नो॑ मृडय॒त ते
यं द्वि॒ष्मो यश्च॑ नो॒ द्वेष्टि॑ तं॒ वो ज॑भे द॒धा

म्य॑धिप॒तयो॑ नाम॑ स्थ॒ तेषां॑ ँ॒ व उपरि॑ गृ॒हा वर्॑षं॒ व
इष॑वोऽव॒स्वान् वा॒तना॑मं तेभ्यो॑ वो नम॒स्ते नो॑ मृडय॒त ते यं॑
द्वि॒ष्मो यश्च॑ नो॒ द्वेष्टि॑ तं॒ वो ज॑भे द॒धामि॑

क्र॑व्या नाम॑ स्थ॒ पार्थि॑वा-स्तेषां॑ ँ॒ व इ॒ह गृ॒हा अ॒न्नं॑ व
इष॑वो नि॒मिषो॑ वा॒तना॑मं तेभ्यो॑ वो नम॒स्ते नो॑ मृडय॒त ते
यं द्वि॒ष्मो यश्च॑ नो॒ द्वेष्टि॑ तं॒ वो ज॑भे द॒धामि॑ ॥ 42A (17A)

1.26 अज्यानि मन्त्राः**TS 5.7.2.3 to TS 5.7.2.5 , for para 43**

श॒तायु॑धाय॒ शत॑वीर्याय॒ शतो॑तये ऽभि॒माति॑षाहे ॥
 श॒तं यो॑ न॒ शश॑रदो अजी॒तानि॑न्द्रो नेष॒दति॑ दुरि॒तानि॑ विश्वा ॥
 ये च॒त्वारः॑ पथ॒यो दे॒वया॑ना अन्तरा द्यावापृथि॒वी विय॑न्ति ।
 तेषां॑ यो अज्यानि-मजी॒ति-मा॒वहा॒त्तस्मै॑ नो दे॒वाः परि॑ दत्तेह सर्वे ॥
 ग्री॒ष्मो हे॒मन्त॑ उत नो वसन्त॒ शश॑रद् वर्॒षा स्सु॑वि॒तन्नो॑ अस्तु ।
 तेषा॑-मृ॒तूना॑ ऽ श॒तश॑रदानां नि॒वात॑ एषाम॒भये॑ स्याम ।
 इ॒दुव॑त्सराय॒ परिव॑त्सराय॒ सम॑वत्सराय॒ कृणु॑ता बृ॒हन्न॑मः ।
 तेषां॑ वय॑ ऽ सु॒मतौ॑ य॒ज्ञिया॑नां ज्यो॒गजी॑ता अ॒हता॑ स्स्याम ।
 भ॒द्रान्नः॑ श्रेय॒ स्सम॑नैष्ट दे॒वा स्त्वया॑ ऽव॒सेन॑ सम॒शीम॑हि त्वा ।
 स नो॑ मयो॒भूः पि॒तो आ॑ वि॒शस्व॑ शं तो॒काय॑ त॒नुवे॑ स्यो॒नः ॥ 43 (18)

TS 7.3.12.1, for para No. 44

भू॒तं भव्यं॑ भवि॒ष्यद् वषट्॑ थ्स्वाहा नम॒ ,
 ऋ॒ख् साम॑-य॒जुर् वषट्॑ थ्स्वाहा नमो॒ ,
 गाय॑त्री त्रि॒ष्टब् जग॑ती वषट्॑ थ्स्वाहा नमः॒ ,
 पृथि॑व्यन्तरि॒क्षं द्यौर् वषट्॑ थ्स्वाहा नमो॒ ,
 ऽग्नि॑र्वायु-स्सू॒र्यो वषट्॑ थ्स्वाहा नमः॒ ,

प्रा॒णो-व्या॒नो-ऽपानो॑ व॒षट् थ्स्वाहा॑ नमो,
 ऽन्नं॑ कृ॒षिर् वृ॒ष्टिर् व॒षट् थ्स्वाहा॑ नमः,
 पि॒ता पु॒त्रः पौ॒त्रो व॒षट् थ्स्वाहा॑ नमो,
 भूर्भुव॑स्सुव॒ व॒षट् थ्स्वाहा॑ नमः ॥ 44 (19)

1.27 अथर्वशीर्ष

TB 1.5.8.1 to TB 1.5.8.3, for para 45, 46, 47

इन्द्रो॑ दधी॒चो अस्त॑भिः । वृ॒त्राण्य॑प्रतिष्कुतः । जघान॑ नवती॒र्नव॑ ।
 इच्छ॑न्नश्चस्य॒ यच्छि॑रः । पर्व॑तेष्वप॒श्रितं॑ । तद्वि॑दच्छर्य॒णाव॑ति ।
 अत्रा॑ह गो॒रम॑न्वत । नाम॒ त्वष्टु॑-रपी॒च्यं ॥ इ॒त्था च॒न्द्रम॑सो गृ॒हे ।
 इन्द्र॑मिद् गा॒थिनो॑ बृ॒हत् ॥ 45

इन्द्र॑-मर्के॒भि-र॒र्किणः॑ । इन्द्रं॑ वा॒णीर॑नूषत । इन्द्र॑ इ॒द्धर्यो॑ स्सचा॑ ।
 संमि॑श्ल आ व॒चो यु॒जा ॥ इन्द्रो॑ वज्री॒ हिर॑ण्ययः ।
 इन्द्रो॑ दी॒र्घाय॑ चक्ष॒से । आ सूर्य॑ꣳ रो॒हय॑द् दि॒वि ।
 वि गो॒भि-र॒द्रि॒मैर॑यत् । इन्द्र॑ वा॒जेषु॑ नो अव ।
 सह॑स्रप्र॒धनेषु॑ च ॥ 46

उग्र॑ उ॒ग्राभि॑-रू॒तिभिः॑ । तमिन्द्रं॑ वा॒जया॑मसि ।
 महे॑ वृ॒त्राय॑ ह॒न्तवे॑ । स वृ॒षा वृ॒षभो॑ भुवत् ।

इन्द्र॑ स्स॒ दाम॑ने कृ॒तः । ओजि॑ष्ठ॒ स्सब॑ले हि॒तः ।
 द्यु॒म्नी॑ श्लो॒की स॒ सौम्यः॑ । गिरा॑ वज्रो॒ न संभृ॑तः ।
 सब॑लो॒ अन॑पच्युतः । वव॑क्षुरु॒ग्रो अस्तृ॑तः ॥ 47 (20)

1.28 प्रत्यंगिरसः

T.B.2.4.2.1 to T.B.2.4.2.4, for para No 48 to 50

चक्षु॑षो हे॒ते मन॑सो हे॒ते । वाचो॑ हे॒ते ब्र॑ह्म॒णो हे॒ते ।
 यो मा॑ऽघायु॒-रभि॑दासति । तम॑ग्ने मे॒न्याऽमे॑निं कृ॒णु ।
 यो मा॑ चक्षु॒षा यो मन॑सा । यो वा॒चा ब्र॑ह्म॒णाऽघा॑यु॒-रभि॑दासति ।
 तया॑ऽग्ने त्वं मे॒न्या । अमु॑ममे॒निं कृ॒णु ।
 यत् किञ्चा॑सौ मन॑सा यच्च॑ वा॒चा ।
 यज्ञै॑र् जुहोति॒ यजु॑षा ह॒विर्भिः॑ ॥ 48

तन् मृ॒त्युर्. निर्.॑ऋत्या॒ सम्वि॑दानः । पु॒रा दि॒ष्टादा॑हु॒ती-रस्य॑हन्तु ।
 यातु॑धाना॒ निर्.॑ऋतिरादु॒ रक्षः॑ । ते अ॒स्य घ्न॑न्त्वनृ॒तेन॑ सत्यं ।
 इन्द्रे॑षिता॒ आज्य॑मस्य मथ्नन्तु । मा तथ्॑ समृ॒द्धिं यद॑सौ करोति ।
 हन्मि॑ तेऽहं कृ॒तं ह॒विः । यो मे॑ घो॒र-मची॑कृतः ।
 अपाञ्चौ॑ त उ॒भौ बा॒हू । अप॑नह्याम्या॒स्यं ॥ 49

अप॒न॒ह्या॒मि ते॒ बा॒हू । अप॒न॒ह्या॒म्या॒स्यं । अ॒ग्नेर् दे॒वस्य॒ ब्र॒ह्म॒णा ।
 स॒र्वं ते॒ ऽव॒धिषं॑ कृ॒तं । पु॒राऽमु॒ष्य व॒षट्का॒रात् ।
 य॒ज्ञं दे॒वेषु॑ न॒स्कृ॒धि । स्वि॒ष्ट-म॒स्माकं॑ भू॒यात् ।
 माऽस्मा॑न् प्रा॒प॒न्न॒रा॒तयः॑ । अ॒न्ति दू॒रे स॒तो अ॒ग्ने ।
 भ्रा॒तृ॒व्यस्या॑भि॒दा॒सतः॑ । व॒षट्का॒रेण॒ वज्रे॑ण ।
 कृ॒त्याँ ह॒न्मि कृ॒ता॒म॒हं । यो मा॒ न॒क्तं दि॒वा सा॒यं ।
 प्रा॒तश्चा॒हो नि॒पी॒यति॑ । अ॒द्या त॒मिन्द्र॑ व॒ज्रेण॑ ।
 भ्रा॒तृ॒व्यं पा॒दया॑म॒सि ॥ 50 (21)

T.B.2.5.1.1 to T.B.2.5.1.3, for para 51 to 53

प्रा॒णो र॒क्षति॑ वि॒श्वमे॑जत् । इ॒र्यो भू॒त्वा बहु॑धा ब॒हूनि॑ ।
 स इ॒थ् स॒र्वं व्या॑न॒शे । यो दे॒वो दे॒वेषु॑ वि॒भूर॑न्तः ।
 आ॒वृ॒द्वा॒दात् क्षे॒त्रिय॑द्ध्व॒गद् वृ॒षा । त॒मि॒त् प्रा॒णं म॒नसो॑प॒शिक्ष॑त ।
 अ॒ग्रं दे॒वाना॑-मि॒दम॑त्तु नो ह॒विः । म॒नस॑श्चि॒त्ते॒दं ।
 भू॒तं भ॒व्यं च॑ गु॒प्यते॑ । तद्धि॑ दे॒वेष्व॑ग्रि॒यं ॥ 51

आ॒ न ए॒तु पु॒रश्च॑रं । स॒ह दे॒वै-रि॒मँ ह॒वं ।
 म॒नः श्रे॑य॒सि श्रे॑य॒सि । क॒र्मन् य॒ज्ञप॑तिं द॒धत् ।
 जु॒षतां॑ मे॒ वा॒गि॒दँ ह॒विः । वि॒राड् दे॒वी पु॒रोहि॑ता ।

हव्यवाडनपायिनी । यया रूपाणि बहुधा वदन्ति ।

पेशाँसि देवाः परमे जनित्रे । सा नो विराडनपस्फुरन्ती ॥ 52

वाग्देवी जुषतामिदँ हविः । चक्षुर् देवानां ज्योतिरमृते न्यक्तं ।

अस्य विज्ञानाय बहुधा निधीयते । तस्य सुम्न-मशीमहि ।

मा नो हासीद् विचक्षणं । आयुरिन्नः प्रतीर्यतां ।

अनन्धा-श्चक्षुषा वयं । जीवा ज्योति-रशीमहि ।

सुवर् ज्योति-रुतामृतं । श्रोत्रेण भद्रमुत शृण्वन्ति सत्यं ।

श्रोत्रेण वाचं बहुधोद्यमानां । श्रोत्रेण मोदश्च महश्च श्रूयते ।

श्रोत्रेण सर्वा दिश आशृणोमि । येन प्राच्या उत दक्षिणा ।

प्रतीच्यै दिशः शृण्वन्त्युत्तरात् । तदिच्छ्रोत्रं बहुधोद्यमानं ।

अरान्न नेमिः परि सर्वं बभूव ॥ 53 (22)

T.B.2.7.7.1 to T.B.2.7.7.7, for para 54 to 60

सिँहे व्याघ्र उत या पृदाकौ । त्विषि-रग्नौ ब्राह्मणे सूर्ये या ।

इन्द्रं या देवी सुभगा जजान । सा न आगन् वर्चसा सम्विदाना ।

या राजन्ये दुन्दुभावायतायां । अश्वस्य क्रंद्ये पुरुषस्य मायौ ।

इन्द्रं या देवी सुभगा जजान । सा न आगन् वर्चसा सम्विदाना ।

या हस्तिनि द्वीपिनि या हिरण्ये । त्विषि-रश्वेषु पुरुषेषु गोषु ॥ 54

इन्द्रं॑ या॒ दे॒वी सु॒भगा॑ ज॒जान॑ । सा न॒ आ॒गन् वर्च॑सा स॒म्वि॒दाना॑ ।
 रथे॑ अ॒क्षे॒षु वृ॒षभ॑स्य वा॒जे । वा॒ते पर्ज॑न्ये व॒रुण॑स्य शु॒ष्मे ।
 इन्द्रं॑ या॒ दे॒वी सु॒भगा॑ ज॒जान॑ । सा न॒ आ॒गन् वर्च॑सा स॒म्वि॒दाना॑ ।
 रा॒डसि॑ वि॒राड॑सि । स॒म्रा॒डसि॑ स्व॒राड॑सि ।
 इन्द्रा॑य त्वा तेज॑स्वते तेज॑स्वन्त॒ः श्री॑णामि ।
 इन्द्रा॑य त्वौज॑स्वत ओज॑स्वन्त॒ः श्री॑णामि ॥ 55

इन्द्रा॑य त्वा प॒यस्व॑ते प॒यस्व॑न्त॒ः श्री॑णामि ।
 इन्द्रा॑य त्वाऽऽयु॑ष्मत आयु॑ष्मन्त॒ः श्री॑णामि ।
 तेजो॑ऽसि । तत्ते॑ प्र॒यच्छा॑मि । तेज॑स्वदस्तु मे॒ मुखं॑ ।
 तेज॑स्वच्छि॒रो अस्तु॑ मे । तेज॑स्वान् वि॒श्वतः॑ प्र॒त्यङ् ।
 तेज॑सा संपि॑पृग्धि मा । ओजो॑ऽसि । तत्ते॑ प्र॒यच्छा॑मि ॥ 56

ओज॑स्वदस्तु मे॒ मुखं॑ । ओज॑स्वच्छि॒रो अस्तु॑ मे ।
 ओज॑स्वान् वि॒श्वतः॑ प्र॒त्यङ् । ओज॑सा संपि॑पृग्धि मा । पयो॑ऽसि ।
 तत्ते॑ प्र॒यच्छा॑मि । प॒यस्व॑दस्तु मे॒ मुखं॑ । प॒यस्व॑च्छि॒रो अस्तु॑ मे ।
 प॒यस्वान् वि॒श्वतः॑ प्र॒त्यङ् । प॒यसा॑ संपि॑पृग्धि मा ॥ 57

आयु॑रसि॒ । त॒त्ते प्र॑यच्छामि॒ । आयु॑ष्मदस्तु॒ मे मुखं॑ ।
 आयु॑ष्मच्छि॒रो अस्तु॑ मे । आयु॑ष्मान् विश्व॑तः प्र॒त्यङ् ।
 आयु॑षा संपि॑पृग्धि॒ मा । इ॒मम॑ग्न॒ आयु॑षे वर्च॑से कृ॒धि ।
 प्रि॒यꣳ रे॒तो वरु॑ण सोम॒ राजन् । मा॒तेवा॑स्मा अदि॒ते शर्म॑ यच्छ ।
 विश्वे॑ दे॒वा ज॑रद॒ष्टिर् यथाऽस॑त् ॥ 58

आयु॑रसि॒ विश्वा॑युरसि॒ । सर्वा॑युरसि॒ सर्व॑मायुरसि॒ ।
 यतो॑ वा॒तो म॒नोज॑वाः । यतः॑ क्ष॒रन्ति॑ सि॒न्धवः॑ ।
 तासां॑ त्वा सर्वा॑साꣳ रु॒चा । अ॒भिषि॑ञ्चामि॒ वर्च॑सा ।
 स॒मु॒द्र इ॒वासि॑ ग॒ह्वना॑ । सोम॑ इ॒वास्य॑दा॒भ्यः ।
 अ॒ग्निरि॑व विश्व॑तः प्र॒त्यङ् । सूर्य॑ इ॒व ज्यो॑तिषा वि॒भूः ॥ 59

अ॒पां यो॑ द्र॒वणे॑ र॒सः । त-म॒ह-म॒स्मा आ॑मुष्याय॒णाय॑ ।
 तेज॑से ब्र॒ह्मव॑र्चसाय॒ गृह्णामि॑ । अ॒पां यो॑ ऊ॒र्मो र॒सः ।
 त-म॒ह-म॒स्मा आ॑मुष्याय॒णाय॑ । ओज॑से वी॒र्या॑य गृह्णामि॒ ।
 अ॒पां यो॑ म॒द्ध्यतो॑ र॒सः । त-म॒ह-म॒स्मा आ॑मुष्याय॒णाय॑ ।
 पु॒ष्ट्यै प्र॑ज॒नना॑य गृह्णामि॒ । अ॒पां यो॑ य॒ज्ञियो॑ र॒सः ।
 त-म॒ह-म॒स्मा आ॑मुष्याय॒णाय॑ । आयु॑षे दी॒र्घायु॑त्वाय॒ गृह्णामि॑ ॥ 60 (23)

1.29 अन्न सूक्तं

T.B.2.8.8.1 to T.B.2.8.8.4, for para 61 to 63

अ॒हम॒स्मि प्र॒थम॒जा ऋ॒तस्य॑ । पूर्वं॑ दे॒वेभ्यो॑ अ॒मृत॑स्य नाभिः ।
 यो मा द॑दाति स इ॒ देव॑ मा वाः । अ॒ह-म॒न्न-म॒न्न-म॒दन्त॑म॒ग्नि ।
 पूर्व॑-म॒ग्नेर॒पि द॑हत्यन्नं । यत्तौ हाऽऽसा॑ते अ॒हमु॒त्तरेषु॑ ।
 व्या॒त्तम॒स्य प॒शव॑ स्सु॒जंभं॑ । पश्य॑न्ति धी॒राः प्र॑चरन्ति पा॒काः ।
 जहा॑म्यन्यं न जहा॑म्यन्यं । अ॒हम॒न्नं व॑शमिच्चिरामि ॥ 61

स॒मा॒नम॒र्थं पर्ये॑मि भुं॒जत् । को मा॒मन्नं॑ म॒नुष्यो॑ दयेत ।
 परा॑के अ॒न्नं नि॒हितं॑ लो॒क ए॒तत् । वि॒श्वैर् दे॒वैः पि॒तृभिर् गु॒प्तम॒न्नं ।
 यद॒द्यते॑ लु॒प्यते॑ यत् परो॒प्यते॑ । श॒त॒त॒मी सा॒ त॒नूर्मे॑ ब॒भूव॑ ।
 म॒हा॒न्तौ च॒रू स॒कृद्दु॒ग्धेन॑ पप्रौ ।
 दि॒वञ्च॑ पृ॒श्निं पृ॒थि॒वीं च॑ सा॒कं ।
 तथ्सं॑पिबन्तो न मि॒नन्ति॑ वे॒धसः॑ ।
 नै॒तद् भू॒यो भ॒वति॑ नो क॒नीयः॑ ॥ 62

अ॒न्नं प्रा॒णम॒न्न-म॒पान॑माहुः । अ॒न्नं मृ॒त्युं त॒मु जी॒वातु॑माहुः ।
 अ॒न्नं ब्र॒ह्मा॒णो ज॒रसं॑ वदन्ति । अ॒न्नमाहुः॑ प्र॒जन॑नं प्र॒जानां॑ ।
 मो॒घ-म॒न्नं वि॒न्दते॑ अप्र॒चेताः॑ । स॒त्यं ब्र॒वीमि॑ व॒ध इ॒त्थस॑ तस्य ।

नार्य॒मणं॒ पु॒ष्यति॒ नो सखा॑यं । के॒वला॑घो भवति के॒वला॑दी ।

अ॒हं मे॒घ स्स्त॑नयन् व॒र्ष॒न्नस्मि॑ । मा-म॒दन्त्य॑-ह-म॒द्म्य॑-न्यान् ॥

अ॒हं॑ स॒दमृ॑तो भवामि । म॒दादि॑त्या अ॒धि स॒र्वे त॑पन्ति । 63

1.30 वा॒ख् सू॒क्तं

T.B.2.8.8.4 for Para 64

दे॒वीं वा॒चम॑जनयन्त यद् वा॒ग्वद॑न्ति । 64

Below is the full text of the concised Mantra given in "italics" above.

This concised Mantra is formed by adding the First word/part from the first part of the First para , 2nd word /part from first part of Second para of Full Mantra which is given below. Add the Underlined words of the Full Mantra to arrive at the above concised Mantra. It is more appropriate to chant the full version as given below. Please refer to your Guru for any clarifications/explanations.

दे॒वीं वा॒चम॑जनयन्त दे॒वाः । तां वि॒श्वरू॑पाः प॒शवो॑ वदन्ति ।

सा नो म॒न्द्रेष॑ मूर्जं दु॒हाना॑ । धे॒नुर्वा॑गस्मानुप सु॒ष्टुतै॑तु । 64a

यद् वा॒ग्वद॑न्त्य वि॒चेत॑नानि । रा॒ष्ट्री दे॒वानां॑ निष॒साद॑ म॒न्द्रा ।

चत॑स्र ऊ॒र्जं दु॒दुहे॑ पया॒ंसि ।

क्व स्वि॒दस्याः॑ प॒रमं॑ ज॒गाम॑ ॥ 64b

The expansion 64a appearing in TB.2.4.6.10

The expansion 64b appearing in TB.2.4.6.11

TB 2.8.8.4 to TB 2.8.8.5 for Para 65,66

अ॒नन्ता॑-म॒न्ताद॑धि॒ निर्मि॑तां म॒हीं । यस्यां॑ दे॒वा अ॑द॒धुर् भो॑ज॒नानि॑ ।
 ए॒काक्ष॑रां द्वि॒पदा॑ ऽ षट्प॒दाञ्च॑ । वाचं॑ दे॒वा उप॑जीवन्ति वि॒श्वे ।
 वाचं॑ दे॒वा उप॑जीवन्ति वि॒श्वे । वाचं॑ गन्ध॒र्वाः प॑शवो म॒नुष्याः॑ ।
 वा॒चीमा॑ वि॒श्वा भु॑वनान्यर्पि॒ता । सा नो॑ ह॒वं जु॑षता-मिन्द्र॒पत्नी॑ ।
 वा॒गक्ष॑रं प्रथ॒मजा॑ ऋ॒तस्य॑ । वेदा॑नां मा॒ता-ऽमृ॑तस्य नाभिः ॥ 65

सा नो॑ जुषा॒णोप॑यज्ञ-मा॒गात् । अ॒वन्ती॑ दे॒वी सु॒हवा॑ मे अस्तु ।
 या॒मृष॑यो मन्त्र॒कृ॒तो म॑नीषिणः । अ॒न्वैच्छ॑न् दे॒वा-स्त॑पसा श्रमे॒ण ।
 तां दे॒वीं वा॒च ऽ ह॒विषा॑ यजामहे । सा नो॑ दधातु सु॒कृत॑स्य लो॒के ।
 च॒त्वारि॑ वाक् परि॒मिता॑ प॒दानि॑ । तानि॑ वि॒दुर् ब्रा॒ह्मणा॑ ये म॒नीषि॑णः ।
 गुहा॑ त्रीणि निहि॒ता ने॑ङ्गयन्ति । तुरी॑यं वा॒चो म॑नुष्या वदन्ति ॥ 66

1.31 श्रद्धा सूक्तं**TB 2.8.8.5 to TB 2.8.8.8 for Para 67,68, 69a**

श्रद्ध॑याऽग्नि॒ स्समि॑द्ध्यते । श्रद्ध॑या वि॒न्दते॑ ह॒विः ।
 श्रद्धां॑ भ॒गस्य॑ मूर्द॒धनि॑ । वच॑सा ऽऽवे॒दयाम॑सि ।
 प्रि॒य ऽ श्रद्धे॑ द॒दतः॑ । प्रि॒य ऽ श्रद्धे॑ दि॒दास॑तः ।

प्रि॒यं भो॒जेषु॑ यज्व॒सु । इ॒दं म॒ उदि॑तं कृ॒धि ।
यथा॑ दे॒वा असु॑रेषु । श्र॒द्धा॒मु॒ग्रेषु॑ चक्रि॒रे ॥ 67

ए॒वं भो॒जेषु॑ यज्व॒सु । अ॒स्माक॑-मु॒दि॒तं कृ॒धि ।
श्र॒द्धां दे॒वा यज॑मानाः । वा॒युगो॑पा उपा॒सते॑ ।
श्र॒द्धां हृ॒दय्य॑या-ऽऽकू॒त्या । श्र॒द्धया॑ हू॒यते॑ ह॒विः ।
श्र॒द्धां प्रा॒तर् ह॒वाम॑हे । श्र॒द्धां म॒द्ध्यन्दि॑नं परि ।
श्र॒द्धां सूर्य॑स्य नि॒मृचि॑ । श्र॒द्धे श्र॒द्धाप॑येह मा ॥ 68

श्र॒द्धा दे॒वानधि॑वस्ते । श्र॒द्धा वि॒श्वमि॑दं जगत् ।
श्र॒द्धां का॒मस्य॑ मा॒तरं॑ । ह॒विषा॑ वर्द्ध॒याम॑सि । 69a

1.32 ब्रह्म सूक्तं

TB 2.8.8.10 to TB 2.8.8.11 for Para 69b to 71

ब्र॒ह्म ज॒ज्ञानं॑ प्रथ॒मं पु॒रस्ता॑त् । वि सी॒मत॑ स्सु॒रुचो॑ वे॒न आ॑वः ।
स बु॒द्धि॒नया॑ उप॒मा अ॒स्य वि॒ष्ठाः । स॒तश्च॑ यो॒नि-म॑स॒तश्च॑ वि॒वः ॥
पि॒ता वि॒राजा॑मृष॒भो रयी॑णां । अ॒न्तरि॑क्षं वि॒श्वरू॑प आ॒विवे॑श ॥ 69b

तम॑र्कैरभ्यर्च॒न्ति व॒थ्सं॑ । ब्र॒ह्म स॒न्तं ब्र॒ह्मणा॑ वर्द्ध॒यन्तः॑ ॥
ब्र॒ह्म दे॒वान॑जनयत् । ब्र॒ह्म वि॒श्वमि॑दं जगत् ॥
ब्र॒ह्मणः॑ क्ष॒त्रं निर्मि॑तं । ब्र॒ह्म ब्रा॒ह्मण॑ आ॒त्मना॑ ॥

अ॒न्तर॒स्मिन्नि॒मे लो॒काः । अ॒न्त वि॒श्वमि॒दं जग॑त् ।

ब्र॒ह्मै॒व भू॒तानां॑ ज्येष्ठं॑ । तेन॒ कोऽ॒र्हति॒ स्प॒र्द्धितुं॑ ॥ 70

ब्र॒ह्मं दे॒वा-स्त्रय॑स्त्रि॒ंशत् । ब्र॒ह्मन्नि॒न्द्र प्र॒जाप॑ती ।

ब्र॒ह्मन् ह॒ विश्वा॑ भू॒तानि॑ । ना॒वीवा॒न्त स्स॒माहि॑ता ॥

चत॑स्र आ॒शाः प्र॒चर॑न्त्व॒ग्नयः॑ । इ॒मन्नो॑ य॒ज्ञन्न॑यतु प्र॒जान॑न् ।

घृ॒तं पि॒न्वन्न॑ज॒रं सु॒वीरं॑ । ब्र॒ह्म स॒मिद् भ॒वत्या॑हु॒तीनां॑ ॥ 71

1.33 गो सूक्तं

TB 2.8.8.11 to TB 2.8.8.11 for Para 72

आ गा॒वो अ॒ग्नन्नु॒त भ॒द्र-म॒क्रन् । सी॒दन्तु॑ गो॒ष्ठे र॒णय॑न्त्व॒स्मे ॥

प्र॒जाव॑तीः पु॒रुरू॒पा इ॒ह स्युः॑ । इ॒न्द्राय॑ पू॒र्वी रु॒षसो॑ दु॒हानाः॑ ।

इ॒न्द्रो य॒ज्वने॑ पृ॒णते॑ च शि॒क्षति॑ । उ॒पेद्द॑दाति न स्वं मु॒षाय॑ति ।

भू॒योभू॒यो र॒यिमि॑दस्य व॒र्द्धय॑न् । अ॒भिन्ने॑ खि॒ल्ले नि॑दधाति दे॒वयुं॑ ।

न ता न॑श॒न्ति न ता अ॑र्वा ॥ 72

Below is the full text of the concised Mantra given in "italics" above.

This concised Mantra is formed by adding the First word/part from the first part of the First para , 2nd word /part from first part of Second para of Full Mantra which is given below. Add the Underlined words of the Full Mantra to arrive at the above concised Mantra. It is more appropriate to chant the full version as given below. Please refer to your Guru for any clarifications/explanations.

न ता न॑श॒न्ति न द॑भाति तस्करः ।
 नैना॑ अमि॒त्रो व्य॑थिरादध॑र्षति ।
 देवा॑श्च याभि॒र् यज॑ते ददाति च ।
 ज्यो॒गिताभि॑ स्सच॒ते गो॑पति स्सह ॥ 72a

न ता अ॒र्वा रे॒णुक॑काटो अ॒श्नुते॑ ।
 न स॑स्कृ॒तत्र-मु॑पयन्ति ता अ॒भि ।
 उ॒रुगा॑यमभयं तस्य ता अनु ।
 गा॒वो म॒र्त्यस्य॑ विच॑रन्ति यज्व॑नः । 72b

Both 72a and 72b appearing in T.B.2.4.6.9

TB 2.8.8.12 for Para 73 to 74

गा॒वो भ॒गो गा॒व इन्द्रो॑ मे अ॒च्छात् । गा॒व स्सो॑मस्य प्रथ॑मस्य भक्षः ।
 इ॒मा या गा॒व स्स ज॑नास इन्द्रः । इ॒च्छामी-बृ॑दा मन॑सा चिदिन्द्रं॑ ।
 यू॒यं गा॒वो मे॑दयथा कृ॒शज्जि॑त् ।
 अ॒श्ली॒लं चि॑त् कृ॒णु॒था सु॑प्रतीकं ॥ 73

भ॒द्रं गृ॑हं कृ॒णु॒थ भ॒द्रवा॑चः । बृ॒हद् वो व॑य उच्यते स॒भासु॑ ।
 प्र॒जाव॑ती स्सू॒यव॑सꣳ रि॒शन्तीः॑ । शु॒द्धा अप॑ स्सुप्रपा॒णे पि॑बन्तीः ।
 मा व॑ स्तेन ई॒शत॑ मा ऽघ॑शꣳसः । परि॑ वो हे॒ती रु॒द्रस्य॑ वृ॒ज्यात् ।

उ॒पे॒द-मु॒प॒प॒र्च॒नं । आ॒सु गो॒षू॒प॒पृ॒च्य॒तां ।

उ॒प॒र्ष॒भ॒स्य रे॒त॒सि । उ॒पे॒न्द्र त॒व वी॒र्ये ॥ 74 (24)

1.34 सूर्या चन्द्रमसा सूक्तं

TB 2.8.9.1 for Para 75 to 77

ता सूर्या॑चन्द्र॑मसा॑ वि॒श्वभृ॑त्त॒मा म॒हत् । ते॒जो व॒सु॒मद्-रा॒ज॒तो दि॒वि ।

सा॒मा॒त्मा॒ना च॒रत॑ स्साम॑चा॒रि॒णा । य॒यौ॒र्व्र॒तं न॑ म॒मे जा॒तु दे॒व॒योः ।

उ॒भा॒व॒न्तौ प॒रि॒या॒त अ॒म्य॒ा । दि॒वो न॑ र॒श्मी॑ स्त॒नु॒तो व्य॑र्ण॒वे ।

उ॒भा भु॑व॒न्ती भु॑व॒ना क॒वि॒क्र॒तू । सूर्या॑ न च॒न्द्रा च॒रतो॑ ह॒ता॒म॒ती ।

प॒ती द्यु॒मद् वि॒श्ववि॑दा॒ उ॒भा दि॒वः ।

सूर्या॑ उ॒भा च॒न्द्रम॑सा॑ वि॒चक्ष॑णा ॥ 75

वि॒श्ववा॑रा व॒रि॒वो॒भा व॑रे॒ण्या । ता नो॑ऽव॒तं म॒ति॒म॒न्ता म॑हि॒व्र॒ता ।

वि॒श्वव॑प॒री प्र॒त॒र॒णा त॑र॒न्ता । सु॒व॒र्वि॒दा दृ॒श॒ये भू॑रि॒र॒श्मी ।

सूर्या॑ हि च॒न्द्रा व॒सु त्वे॒ष द॑र्॒श॒ता ।

म॒न॒स्वि॒नो॒भा ऽनु॑च॒रतो॑नु॒ सं दि॒वं ।

अ॒स्य श्र॑वो न॒द्य स्स॑प्त बि॒भ्र॑ति ।

द्या॒वा॒क्षा॒मा पृ॑थि॒वी द॑र्॒श॒तं व॑पुः ।

अ॒स्मे सूर्या॑चन्द्र॒मसा॑-ऽभिचक्षे ।

श्रद्धे॑ क॒मिन्द्र॑ च॒रतो॑ विच॒तुरं ॥ 76

पूर्वा॑परं च॒रतो॑ मा॒ययै॑तौ । शि॒शू क्री॑डन्तौ प॒रिया॑तो अ॒ध्वरं॑ ।

वि॒श्वान्य॑न्यो भु॒वना॑ऽभिचष्टे । ऋ॒तून॑न्यो वि॒दध॑ज्जायते पुनः ।

हिर॑ण्यवर्णाः शु॒चयः॑ पा॒वका॑ या॒सां राजा॑ ।

या॒सां दे॒वा इ॒शवे॑न मा चक्षु॒षा प॑श्यत ।

आपो॑ भ॒द्रा आ॒दित्य॑श्यामि । 77

Below is the full text of the concised Mantra given in "italics" above.
This concised Mantra is formed by adding the First word/part from the first part of the First para , 2nd word /part from first part of Second para and so on. Add the Underlined words of the Full Mantra to arrive at the above concised Mantra. It is more appropriate to chant the full version as given below. Please refer to your Guru for any clarifications/explanations.

हिर॑ण्यवर्णाः शु॒चयः॑ पा॒वका॑ या॒सु जा॒तः क॒श्यपो॑ या॒स्विन्द्रः॑ ।
अ॒ग्नियाँ॑ गर्भं दधि॒रे वि॒रूपा॑स्ता न आ॒प॒श्श॑ स्यो॒ना भ॑वन्तु ॥
या॒सां राजा॑ वरु॒णो या॒ति म॒ध्ये स॒त्यानृ॑ते अ॒वप॑श्यन् ज॒नानां॑ ।
मधु॑श्चुत इ॒शुचयो॑ याः पा॒वका॑स्ता न आ॒प॒श्श॑ स्यो॒ना भ॑वन्तु ॥ 77a

या॑सां॑ दे॒वा दि॒वि कृ॑ण्वन्ति॑ भ॒क्ष॒ य्या अ॒न्तरि॑क्षे बहु॒धा भ॑वन्ति ।
 याः पृ॒थि॒वीं प॑यसो॒न्दन्ति॑ शु॒क्रास्ता॑ न॒ आप॑श्श॒स्यो॒ना भ॑वन्तु ॥

शि॒वेन॑ मा॒ चक्षु॑षा पश्यताप॑ शि॒श॒वया॑ त॒नुवो॑प स्पृशत॑ त्वचं॑ मे ।
 सर्वा॑ँ अ॒ग्नीँ र॑प्सुषदो हुवे वो॒ मयि॑ व॒र्चो
 ब॒लमो॑जो नि ध॒त्त ॥ 77b

आपो॑ भ॒द्रा घृ॑तमिदाप॑ आसु र॒ग्नीषो॑ मौ बिभ्र॑त्याप॒ इत्ताः॑ ।
 ती॒व्रो र॑सो मधु॒प्र॒चा-म॑रङ्ग॒म आ॑मा प्रा॒णेन॑ स॒हव॑र्च सागन् ।

आदि॑त्य॒श्याम्यु॑त वा शृ॒णोम्या॑ मा घोषो॑ गच्छति॑ वाङ् न आ॑सां ।
 मन्ये॑ भे॒जानो॑ अ॒मृत॑स्य तर्हि॑ हि॒रण्य॑वर्णा अ॒तृपं॑ य॒दा वः॑ । 77c

Expansion 77a appearing in TS 5.6.1.1

Expansion 77b appearing in TS 5.6.1.2

Expansion 77c appearing in TS.5.6.1.4

1.35 नासदासीय सूक्तं

TB 2.8.9.3 to TB 2.8.9.7 for Para 78 to 81

नासदासी॑न्नो सदासी॑त् तदानीं॑ । नासी॑द्-रजो॑ नो व्यो॑मा परो॑ यत् ।
 कि॒-मावरी॑वः कुह॒ कस्य॑ शर्मन् ।
 अ॒भः किमासी॑द्-गहनं॑ गभीरं॑ ॥ 78

न मृत्यु॑-रमृतं॑ तर्हि॒ न । रात्रि॑या अ॒ह आसी॑त् प्रके॒तः ।
 आनी॑दवा॒तः स्व॒धया॑ तदेकं॑ । तस्मा॑द्भान्यन् न परः॑ किं च नास॑ ।
 तम॑ आसी॒त् तमसा॑ गूढम॒ग्रे प्रके॑तं । सलिल॑ सर्व॑ मा इदं ।
 तुच्छे॑ नाभ्वपि॑हितं॑ यदासी॒त् । तमसः॑ तन्महि॒ना जा॑यतैकं॑ ।
 काम॑स्तद॒ग्रे सम॑वर्तताधि । मनसो॑ रेतः॑ प्रथ॒मं यदासी॒त् ॥ 79

स॒ तो बन्धु॑मस॒ति निर॑विन्दन् । हृदि॑ प्रती॒ष्या क॒वयो॑ मनी॒षा ।
 ति॒रश्ची॑नो वि॒ततो॑ रश्मि॒-रेषां॑ ।
 अ॒धः स्वि॑दासी(३) दु॒परि॑ स्वि॒दासी(३)त् ।
 रेतो॑धा आ॒सन् म॒हिमान॑ आसन् ।
 स्व॒धा अ॒वस्ता॑त् प्र॒यतिः॑ परस्ता॒त् ।
 को॒ अ॒द्वा वे॒द क इ॒ह प्र वो॑चत् ।
 कु॒त आ॒जाता॑ कु॒त इ॒यं वि॑सृष्टिः ।

अ॒र्वाग् दे॒वा अ॒स्य॑ वि॒सर्ज॑नाय ।

अ॒था को वे॒द यत॑ आ॒ब॒भूव॑ ॥ 80

इ॒यं वि॒सृष्टि॑र् यत॑ आ॒ब॒भूव॑ । यदि॑ वा द॒धे यदि॑ वा न ।

यो अ॒स्याद्ध्यक्षः॑ प॒रमे॑ व्यो॒मन् । सो अ॒ङ्ग वे॒द यदि॑ वा न वे॒द ।

किञ्च॑ स्वि॒द्-वनं॑ क उ स वृ॒क्ष आ॑सीत् ।

यतो॑ द्यावापृ॒थिवी॑ नि॒ष्टत॑क्षुः । मनी॑षिणो॒ मनसा॑ पृ॒च्छते॑दु तत् ।

यद॒ध्यति॑ष्ठद् भुव॒नानि॑ धा॒रयन् । ब्र॒ह्म वनं॑ ब्र॒ह्म स वृ॒क्ष आ॑सीत् ।

यतो॑ द्यावापृ॒थिवी॑ नि॒ष्टत॑क्षुः ॥ मनी॑षिणो॒ मनसा॑ वि॒ब्रवी॑मि वः ।

ब्र॒ह्माद्ध्यति॑ष्ठद् भुव॒नानि॑ धा॒रयन् ॥ 81

1.36 भाग्य सूक्तं

TB 2.8.9.7 to TB 2.8.9.9 for Para 82 to 84

प्रा॒तर॒ग्निं प्रा॒तरि॒न्द्रञ् ह॒वामहे॑ । प्रा॒तर् मि॒त्राव॑रुणा प्रा॒तर॒श्विना॑ ॥

प्रा॒तर् भ॒गं पू॒षणं॑ ब्र॒ह्मण॑स्पतिं । प्रा॒तस्सो॑ममु॒त रु॒द्रञ् हु॒वेम॑ ॥

प्रा॒तर्जि॑तं भ॒गमु॒ग्रञ् हु॒वेम॑ । व॒यं पु॒त्रम॑दि॒तेर्यो॑ वि॒धर्ता॑ ।

आ॒द्ध्रश्चि॒द्वं म॒न्यमा॑न-स्तु॒रश्चित् । रा॒जा चि॒द्वं भ॒गं भ॒क्षीत्या॑ह ॥ 82

भ॒ग॒ प्र॒णे॒त॒र् भ॒ग॒ स॒त्य॒रा॒धः॑ । भ॒गे॒मां॑ धि॒य॒मु॒द॒व द॒द॒न्नः॑ ।
 भ॒ग॒ प्र॒ णो॑ ज॒न॒य गो॒भि॒र॒श्वैः॑ ॥ भ॒ग॒ प्र॒ नृ॒भि॒र् नृ॒व॒न्त॑ स्स्याम ॥
 उ॒ते॒दा॒नीं॑ भ॒ग॒व॒न्त॑ स्स्याम । उ॒त प्र॒पि॒त्व उ॒त म॒द्ध्ये॑ अ॒ह्नां॑ ।
 उ॒तो॒दि॒ता म॒घ॒व॒न्थ् सूर्य॑स्य । व॒यं दे॒वा॒नां॑ सु॒म॒तौ॑ स्याम ॥
 भ॒ग॒ ए॒व भ॒ग॒वां॑ अस्तु दे॒वाः । ते॒न व॒यं भ॒ग॒व॒न्त॑ स्स्याम । 83

त॒न्त्वा॑ भ॒ग॒ सर्व॑ इ॒ज्जो॑ह॒वीमि॑ । स नो॑ भ॒ग॒ पु॒र॒ण॒ता भ॒वे॒ह ॥
 स॒म॒द॒ध्व॒रा॒योष॑सो नम॒न्त॑ । द॒धि॒क्रा॒र्वे॒व शु॒च॒ये प॒दा॒य॑ ।
 अ॒र्वा॒ची॒नं॑ व॒सु॒वि॒दं॑ भ॒ग॒न्नः॑ । र॒थ॒मि॒वा॒श्वा वा॒जि॒न आ॑ व॒ह॒न्तु॑ ॥
 अ॒श्वा॒व॒ती॒र् गो॒म॒ती॒र् न उ॒षा॑सः । वी॒र॒व॒ती॒ स्स॒द॒मु॒च्छ॒न्तु॑ भ॒द्राः॑ ।
 घृ॒तं दु॒हा॒ना वि॒श्व॒तः प्र॒पी॒नाः॑ ।
 यू॒यं पा॒त स्व॒स्ति॒भि॒ स्स॒दा नः॑ ॥ 84 (25)

1.37 नक्षत्र सूक्तं(वाक्यं)

T.B.3.1.1.1 to T.B.3.1.3.3, for para 85 to 112

1.नक्षत्रं – कृत्तिका

देवता – अग्निः

अ॒ग्नि॒र्नः॑ पा॒तु कृ॑त्ति॒काः । नक्ष॑त्रं दे॒वमिन्द्रि॑यं । इ॒दमा॑सां वि॒चक्ष॑णं ।
 ह॒वि॒रासं॑ जु॒होत॑न । यस्य॑ भा॒न्ति रश्म॑यो यस्य॑ के॒तवः॑ ।
 यस्ये॒मा वि॒श्वा भु॑वनानि सर्वा॑ । स कृ॑त्ति॒काभि॒रभि॒ सम्॑व॒सानः॑ ।
 अ॒ग्नि॒र्नो दे॒व स्सु॑वि॒ते द॑धातु ॥ 1

2. नक्षत्रं – रोहिणी

देवता – प्रजापतिः

प्र॒जाप॑ते रोहि॒णी वे॑तु॒ पत्नी॑ । वि॒श्वरू॑पा बृ॒हती॑ चि॒त्रभा॑नुः । 85
 सा नो॑ य॒ज्ञस्य॑ सु॒वि॒ते द॑धातु । यथा॑ जी॒र्वेम॑ श॒रद॑ स्स॒वीराः॑ ।
 रोहि॒णी दे॒व्युद॑गात् पु॒रस्ता॑त् । वि॒श्वा रू॒पाणि॑ प्र॒तिमो॑द॒माना॑ ।
 प्र॒जाप॑ति॒ ह॒विषा॑ वर्द्धयन्ती । प्रि॒या दे॒वाना॑-मु॒पया॑तु य॒ज्ञं ॥ 2

3.नक्षत्रं – मृगशीर्षः

देवता – सोमः

सोमो॑ रा॒जा मृ॑गशी॒र्षेण॑ आ॒गन् । शि॒वं नक्ष॑त्रं प्रि॒यम॑स्य॒ धाम॑ ।
 आ॒प्याय॑मानो बहु॒धा जने॑षु । रे॒तः प्र॒जां य॑ज॒माने॑ द॒धातु॑ । 86
 य॒त्ते नक्ष॑त्रं मृ॑गशी॒र्षम॑स्ति । प्रि॒यं रा॒जन् प्रि॒यत॑मं प्रि॒याणां॑ ।
 तस्मै॑ ते सोम॑ ह॒विषा॑ वि॒धेम॑ । श॒न्न ए॒धि द्वि॒पदे॑ श॒ंचतु॑ष्पदे ॥ 3

4. नक्षत्रं – आर्द्रादेवता – रुद्रः

आ॒र्द्रा॒या रु॒द्रः प्र॒थ॒मा॒न ए॒ति । श्रे॒ष्ठो दे॒वा॒नां प॒तिर॒घ्निय॑ानां ॥
 नक्ष॑त्रमस्य ह॒विषा॑ वि॒धेम । मा नः॑ प्र॒जाꣳ री॒रिष॑न् मोत वी॒रान् ।
 हे॒ती रु॒द्रस्य॑ परि॒ णो वृ॑णक्तु । आ॒र्द्रा नक्ष॑त्रं जुष॒ताꣳ ह॒विर्नः॑ । 87
 प्र॒मुञ्च॑मानौ दु॒रिता॒नि वि॒श्वा । अ॒पा॒घश॑ꣳस-॒नुद॑ताम॒रातिं॑ ॥ 4

5. नक्षत्रं – पुनर्वसुदेवता – अदितिः

पु॒न॒र्नो दे॒व्यदि॑तिः स्पृ॒णोतु॑ । पु॒न॒र्वसू॑ नः पु॒न॒रेतां॑ य॒ज्ञं ।
 पु॒न॒र्नो दे॒वा अभि॑यन्तु॒ सर्वे॑ ॥ पु॒नः पु॒न॒र्वो ह॒विषा॑ य॒जामः॑ ।
 ए॒वा न दे॒व्यदि॑ति-र॒न॒र्वा । वि॒श्वस्य॑ भ॒र्त्री ज॒गतः॑ प्र॒तिष्ठा॑ ।
 पु॒न॒र्वसू॑ ह॒विषा॑ व॒र्द्धय॑न्ती । प्रि॒यं दे॒वा॒ना-म॒प्येतु॑ पाथः ॥ 5 (88)

6. नक्षत्रं – पुष्यःदेवता – बृहस्पतिः

बृ॒हस्प॑तिः प्र॒थम॑ञ्जायमानः । ति॒ष्यं नक्ष॑त्रम॒भि सं॑ब॒भूव॑ ।
 श्रे॒ष्ठो दे॒वा॒नां पृ॒तना॑सु जि॒ष्णुः । दि॒शो ऽनु॑ सर्वा अभि॑यन्तो अस्तु ।
 ति॒ष्यः पु॒रस्ता॑दु॒त म॑द्ध्यतो नः । बृ॒हस्प॑तिर् नः परि॑पातु प॒श्चात् ।
 बा॒धेतां॑ द्वे॒षो अभि॑यं कृ॒णुतां॑ । सु॒वीर्य॑स्य प॒तय॑स्स्याम ॥ 6

7. नक्षत्रं – आश्रेषं**देवता – सर्पाः**

इ॒दं॑ स॒र्पेभ्यो॑ ह॒विर॑स्तु जु॒ष्टं॑ । आ॒श्रेषा॑ ये॒षा-म॒नुय॑न्ति चे॒तः॑ । 89
 ये अ॒न्तरि॑क्षं पृ॒थि॒वीं क्षि॑यन्ति । ते न॒ स्स॒र्पासो॑ ह॒वमा॑गमि॒ष्ठाः ।
 ये रो॒चने॑ सू॒र्यस्या॑पि सर्पाः । ये दि॒वं दे॒वी-म॒नु सञ्च॑रन्ति ।
 ये॒षामा॑श्रेषा अ॒नुय॑न्ति का॒मं॑ । तेभ्य॑ स्स॒र्पेभ्यो॑ म॒धुम॑ज्जुहोमि ॥ 7

8. नक्षत्रं – मघा**देवता – पितरः**

उ॒प॒हू॒ताः पि॒तरो॑ ये म॒घासु॑ । म॒नोज॑वस स्सु॒कृतं॑ स्सु॒कृ॒त्याः ।
 ते नो॑ नक्ष॒त्रे ह॒वमा॑गमि॒ष्ठाः । स्व॒धाभि॑र् य॒ज्ञं प्र॑यतं जुषन्तां । 90
 ये अ॒ग्नि॒दग्धा॑ ये ऽ॒ग्नि॒दग्धाः॑ । ये ऽमु॑ल्लो॒कं पि॒तरः॑ क्षि॑यन्ति ।
 या॒श्च वि॒द्म या॑ उ॒ च न॑ प्र॒वि॒द्म ।
 म॒घासु॑ य॒ज्ञं सु॒कृतं॑ जुषन्तां ॥ 8

9. नक्षत्रं – पूर्वफल्गुनी**देवता – अर्यमा**

ग॒वां प॒तिः फ॒ल्गु॒नीना॑-म॒सि त्वं॑ । तद॑र्यमन् वरुण मि॒त्र चा॒रु ।
 तं त्वा॑ व॒यं स॒नितारं॑ स॒नीनां॑ । जी॒वा जी॒वन्त॑मु॒प स॒म्वि॑शेम ।
 येने॒मा वि॒श्वा भु॒वनानि॑ सज्जिता ।
 यस्य॑ दे॒वा अ॒नुसं॑य्यन्ति चे॒तः॑ । 91

अ॒र्य॒मा॒ रा॒जाऽज॒र-स्तु॑वि॒ष्मा॒न् ।

फ॒ल्गु॒नी॒ना-मृ॒षभो॑ रो॒रवी॑ति ॥ 9

10. नक्षत्रं – उत्तर फल्गुनी

देवता – भगः

श्रे॒ष्ठो दे॒वानां॑ भ॒गवो॑ भ॒गासि॑ । तत्त्वा॑ वि॒दुः फ॒ल्गु॒नी-स्तस्य॑ वि॒त्तात् ।

अ॒स्मभ्यं॑ क्ष॒त्रम॒जर॑ सु॒वीर्यं॑ । गो॒म-द॒श्व-व॒दुप॑स॒न्नुदे॑ह ।

भ॒गो ह॑ दा॒ता भ॒ग इ॒त्प्रदा॑ता । भ॒गो दे॒वीः फ॒ल्गु॒नी-रा॒विवे॑श ।

भ॒गस्ये॑त्तं प्र॒सवं॑ ग॒मेम॑ । यत्र॑ दे॒वै स्स॒धमा॑दं म॒देम॑ । ॥ 10/ 92

11. नक्षत्रं – हस्तः

देवता – सविता

आ॒यातु॑ दे॒व स्स॒वि॒तोप॑यातु । हि॒र॒ण्यये॑न सु॒वृता॑ रथे॒न ।

व॒हन् ह॒स्तं सु॒भगं॑ वि॒द्वना॑प॒सं । प्र॒यच्छ॑न्तं प॒पु॒रिं पु॒ण्यम॑च्छ ।

ह॒स्तः प्र॒यच्छ॑त्वमृ॒तं व॑सी॒यः । दक्षि॑णे॒न प्र॒तिगृ॑ष्णीम ए॒नत् ।

दा॒तार-म॒द्य स॒विता॑ वि॒देय॑ । यो नो॑ ह॒स्ताय॑ प्र॒सुवा॑ति य॒ज्ञं ॥ 11

12. नक्षत्रं – चित्रा

देवता – त्वष्टा

त्व॒ष्टा नक्ष॑त्र-म॒भ्येति॑ चि॒त्रां । सु॒भं स॒सं यु॒वति॑ रो॒चमा॑नां । 93

नि॒वेश॑यन्न-मृ॒तान् म॒र्त्याश्च॑ । रू॒पाणि॑ पि॒शन् भु॒वनानि॑ वि॒श्वा ।

तन्न॑स्त्व॒ष्टा तदु॑ चि॒त्रा वि॑च॒ष्टां । तन्नक्ष॑त्रं भू॒रिदा॑ अ॒स्तु म॒ह्यं ।

तन्नः॑ प्र॒जां वी॒रव॑तीं स॒नोतु॑ । गो॒भिर्नो॑ अ॒श्वै स्स॒मन॑कु य॒ज्ञं ॥ 12

13.नक्षत्रं – स्वाती**देवता – वायुः**

वा॒युर् नक्ष॑त्र-म॒भ्येति॑ नि॒ष्ट्यां॑ । ति॒ग्मशृ॑ंगो वृष॒भो रो॑रु॒वाणः॑ ।
 स॒मीर॑यन् भुव॒ना मा॑तरि॒श्वा । अप॒ द्वेषा॑ऽसि नुद॒ता-म॑रातीः । 94
 तन्नो॑ वा॒यस्तदु॑ नि॒ष्ट्या श्रृ॑णोतु । तन्नक्ष॑त्रं भू॒रिदा॑ अस्तु॒ मह्यं॑ ।
 तन्नो॑ दे॒वासो॒ अनु॑ जानन्तु॒ कामं॑ । यथा॒ तरे॑म दु॒रितानि॑ वि॒श्वा ॥ 13

14.नक्षत्रं – विशाखा**देवता – इन्द्राग्नीः**

दूर॑-म॒स्मच्छ॑त्रवो यन्तु॒ भी॒ताः । तदिन्द्रा॑ग्नी कृ॒णुतां॑ तद् वि॒शाखे॑ ।
 तन्नो॑ दे॒वा अनु॑मदन्तु॒ यज्ञं॑ । प॒श्चात् पु॒रस्ता॑दभय॒न्नो अस्तु॑ ।
 नक्ष॑त्राणा-म॒धिप॑नी वि॒शाखे॑ । श्रेष्ठा॑विन्द्रा॒ग्नी भुव॑नस्य गो॒पौ । 95
 विषू॑च॒ रश॑त्रू-नप॒बाध॑मानौ । अप॒क्षुध॑-न्नुद॒ताम॑रातिं । ॥ 14

15. पौर्णमासि

पूर्णा॑ प॒श्चादु॑त पूर्णा॑ पु॒रस्ता॑त् । उ॒न्मद्ध्य॑तः पौ॒र्णमा॑सी जि॒गाय॑ ।
 तस्यां॑ दे॒वा अधि॑ स॒म्वस॑न्तः । उ॒त्तमे॑ नाक॒ इह॑ मा॒दय॑न्तां ।
 पृ॒थ्वी सु॑वर्चा॒ युव॑ति स्स॒जोषाः॑ । पौ॒र्णमा॑स्युद॒गा-च्छो॑भ॒माना॑ ।
 आ॒प्याय॑यन्ती दु॒रितानि॑ वि॒श्वा ।
 उ॒रुं दु॒हां यँज॑मानाय॒ यज्ञं॑ ॥ 15/96 (26)

16.नक्षत्रं – अनूराधा**देवता – मित्रः**

ऋ॒द्ध्य॒ास्म॑ ह॒व्यैर् नम॑सोपसद्य । मि॒त्रं दे॒वं मि॒त्र॒धेय॑न्नो अस्तु ।
 अ॒नू॒रा॒धा॒न् ह॒विषा॑ व॒र्द्धय॑न्तः । श॒तं जी॒वेम॑ श॒रद॑स्स॒वीराः॑ ।
 चि॒त्रं नक्ष॑त्र-मु॒दगा॑त् पु॒रस्ता॑त् । अ॒नू॒रा॒धा॒स इति॑ यद् वद॑न्ति ।
 तन्मि॒त्र एति॑ प॒थिभि॑र् दे॒व्या॒नैः । हि॒रण्य॑यैर् वित॑तै-रन्त॒रिक्षे॑ ॥ 16

17.नक्षत्रं – ज्येष्ठा**देवता – इन्द्रः**

इ॒न्द्रो ज्ये॑ष्ठाम॒नु नक्ष॑त्रमेति । यस्मि॑न् वृ॒त्रं वृ॑त्रतू॒र्ये तता॑र । 97
 तस्मि॑न् वय॒-म॒मृतं॑ दु॒हानाः॑ । क्षु॒धन्त॑रेम॒ दुरि॑तिं दुरि॒ष्टिं ।
 पु॒र॒न्द॒राय॑ वृष॒भाय॑ धृ॒ष्णवे॑ । अ॒षाढा॑य स॒हमा॑नाय मी॒ढुषे॑ ।
 इ॒न्द्राय॑ ज्ये॒ष्ठा मधु॑मद् दु॒हाना॑ । उ॒रुं कृ॑णोतु॒ यज॑मानाय लो॒कं ॥ 17

18.नक्षत्रं – मूलं**देवता – प्रजापतिः**

मू॒लं प्र॒जां वी॑रवतीं वि॒देय॑ । प॒राच्ये॑तु॒ निर्ऋ॑तिः प॒राचा॑ ।
 गो॒भिर् नक्ष॑त्रं प॒शुभि॑ स्सम॒क्तं । अ॒हर् भू॒याद् यज॑मानाय म॒ह्यं । 98
 अ॒हर्नो॑ अ॒द्य सु॒विते॑ दधातु । मू॒लं नक्ष॑त्रमिति॑ यद् वद॑न्ति ।
 प॒राचीं वा॑चा निर्ऋ॑तिं नु॒दामि॑ । शि॒वं प्र॒जायै॑ शि॒वम॑स्तु म॒ह्यं ॥ 18

19.नक्षत्रं – पूर्वाषाढा**देवता – आपः**

या दि॒व्या आपः॑ पय॒सा सं॒ब॒भू॒वुः । या अ॒न्तरि॑क्ष उ॒त पा॒र्त्थि॒वीर्याः॑ ।
 या॒साम॑षा॒ढा अ॒नु॒य॒न्ति॑ का॒मं ॥ ता न॒ आपः॑ श॒ऽ स्यो॒ना भ॑वन्तु ।
 याश्च॑ कू॒प्या याश्च॑ ना॒द्या स्स॒मु॒द्रि॒याः ॥
 याश्च॑ वै॒श॒न्ती॒रुत॑ प्रा॒स॒ची॒र्याः । 99

या॒साम॑षा॒ढा म॒धु भ॒क्ष॒य॒न्ति॑ । ता न॒ आपः॑ श॒ऽ स्यो॒ना भ॑वन्तु ॥ 19

20.नक्षत्रं – उत्तराषाढा**देवता – विश्वेदेवाः**

तन्नो॑ वि॒श्वे उ॒प॒शृ॒ण्वन्तु॑ दे॒वाः । तद॑षा॒ढा अ॒भि स॒म्य॑न्तु॒ य॒ज्ञं ।
 तन्न॑क्ष॒त्रं प्र॒थ॒तां प॒शु॒भ्यः॑ । कृ॒षिर् वृ॒ष्टिर् य॒ज॒मा॒नाय॑ क॒ल्प॒तां ।
 शु॒भ्राः क॒न्या यु॒व॒तय॑ स्सु॒पे॒श॒सः॑ । क॒र्म॒कृ॒त स्सु॒कृ॒तो वी॒र्या॑वतीः ।
 वि॒श्वान् दे॒वान् ह॒विषा॑ वर्द्ध॒य॒न्तीः॑ ।
 अ॒षा॒ढाः का॒म मु॒प॒या॒न्तु॑ य॒ज्ञं ॥ 20/100

21.नक्षत्रं – अभिजिद्**देवता – ब्रह्मा**

यस्मिन् ब्र॒ह्मा ऽभ्य॑ज॒य॒थ् स॒र्व॒मे॒तत् । अ॒मु॒ञ्च लो॒क॒मि॒द॒मू॒च॒ स॒र्वं ॥
 तन्नो॑ नक्ष॒त्र-म॒भि॒जिद् वि॒जि॒त्य । श्रि॒यं द॒धा॒त्व॒ह॒णी॒य॒मा॒नं ।
 उ॒भौ लो॒कौ ब्र॒ह्म॒णा स॒ज्जि॒ते॒मौ । तन्नो॑ नक्ष॒त्र-म॒भि॒जिद् वि॒च॒ष्टां ।
 तस्मिन् व॒यं पृ॒त॒ना स्सं॑ज॒ये॒म । तन्नो॑ दे॒वा॒सो अ॒नु॒जा॒न॒न्तु॑ का॒मं ॥ 21

22.नक्षत्रं – श्रवणंदेवता – विष्णुः

शृ॒ण्व॒न्ति॑ श्रो॒णा-म॒मृत॑स्य गो॒पां ।

पु॒ण्याम॑स्या उप॒शृ॒णोमि॑ वाचं ॥ 101

म॒हीं दे॒वीं वि॒ष्णुप॑त्नी-म॒जूर्या॑ । प्र॒तीची॑-मे॒ना ह॒विषा॑ य॒जामः॑ ।

त्रे॒धा वि॒ष्णु-रु॒रुगा॑यो वि॒च॒क्रमे॑ । म॒हीं दि॒वं पृ॒थि॒वी-म॒न्तरि॑क्षं ।

तच्छ्रो॒णैति॑ श्रव॒ इच्छ॑माना ।

पु॒ण्यं॑ इ॒लोकं॑ य॒जमा॑नाय कृ॒ण्वती॑ ॥ 22

23.नक्षत्रं – श्रविष्ठादेवता – वसवः

अ॒ष्टौ दे॒वा व॑स॒व स्सो॑म्यासः ।

च॒तस्रो॑ दे॒वीर॑जराः श्रवि॒ष्ठाः ।

ते य॒ज्ञं पा॑न्तु र॒जसः॑ प॒रस्ता॑त् ।

स॒म्व॑त्सरी॒ण-म॒मृत॑स्व॒स्ति ॥ 102

य॒ज्ञं नः॑ पा॑न्तु व॒सवः॑ पु॒रस्ता॑त् । द॒क्षि॒णतो॑-ऽभि॒यन्तु॑ श्रवि॒ष्ठाः ।

पु॒ण्यन्न॑क्ष॒त्र-म॒भि स॒म्वि॑शाम । मा नो अ॒राति॑-र॒घश॑सा॒गन् ॥ 23

24.नक्षत्रं – शतभिषक्**देवता – वरुणः**

क्षत्रस्य राजा वरुणो ऽधिराजः । नक्षत्राणां शतभिषग् वसिष्ठः ।
 तौ देवेभ्यः कृणुतो दीर्घमायुः । शतं सहस्रा भेषजानि धत्तः ।
 यज्ञन्नो राजा वरुण उपयातु । तन्नो विश्वे अभि सम्यन्तु देवाः । 103
 तन्नो नक्षत्रं शतभिषग् जुषाणं । दीर्घमायुः प्रतिरद् भेषजानि ॥ 24

25.नक्षत्रं – पूर्वप्रोष्ठपदा**देवता – अजयेकपादः**

अज एकपाद-दुदगात् पुरस्तात् । विश्वा भूतानि प्रतिमोदमानः ।
 तस्य देवाः प्रसवं यन्ति सर्वे । प्रोष्ठपदासो अमृतस्य गोपाः ।
 विभ्राजमान स्समिधान उग्रः । आन्तरिक्ष-मरुहदगन् द्यां ।
 तं सूर्यं देव-मज-मेकपादं ।
 प्रोष्ठपदासो अनुयन्ति सर्वे ॥ 25 / 104

26.नक्षत्रं – उत्तरप्रोष्ठपदा**देवता – अहिर्बुद्धिनयः**

अहिर्बुद्धिनयः प्रथमान एति । श्रेष्ठो देवानामुत मानुषाणां ।
 तं ब्राह्मणा स्सोमपा स्सोम्यासः । प्रोष्ठपदासो अभि रक्षन्ति सर्वे ।
 चत्वार एकमभि कर्म देवाः । प्रोष्ठपदास इति यान् वदन्ति ।
 ते बुद्धिनयं परिषद्यं स्तुवन्तः । अहिं रक्षन्ति नमसोपसद्य ॥ 26

27.नक्षत्रं – रेवती**देवता – पूषा**

पू॒षा रे॒वत्य॑न्वे॒ति प॒न्थां॑ । पु॒ष्टि॒पती॑ प॒शुपा॑ वा॒जब॑स्त्यौ । 105
 इ॒मानि॑ ह॒व्या प्र॑यता जु॒षाणा॑ । सु॒गैर्नो॑ या॒नैरु॑पयातां य॒ज्ञं ।
 क्षु॒द्रान् प॒शून् र॑क्षतु रे॒वती॑ नः । गा॒वो नो॑ अ॒श्वाँ अ॒न्वे॒तु पू॒षा ।
 अ॒न्नँ र॑क्षन्तौ बहु॒धा वि॑रूपं । वा॒जँ स॒नुतां॑ य॒जमा॑नाय य॒ज्ञं ॥ 27

28 नक्षत्रं – अश्विनी**देवता – अश्विनी देवौ**

तद॒श्विना॑-व॒श्वयु॑जोपयातां । शु॒भङ्ग॑मि॒ष्टौ सु॒यमे॑भिर॒श्वैः ।
 स्व॒न्नक्ष॑त्रँ ह॒विषा॑ यजन्तौ । म॒ध्वा संपृ॑क्तौ य॒जुषा॑ सम॒क्तौ । 106
 यौ दे॒वानां॑ भि॒षजौ॑ ह॒व्यवा॑हौ । वि॒श्वस्य॑ दू॒ता-व॑मृतस्य गो॒पौ ।
 तौ नक्ष॑त्रं जु॒जुषा॑णोपयातां । नमो॑ऽश्वि॒भ्यां कृ॑णुमो-ऽश्व॒युग्भ्यां॑ ॥ 28

29.नक्षत्रं – अपभरणी**देवता – यमः**

अप॑ पा॒प्मानं॑ भ॒रणी॑र् भ॒रन्तु॑ । तद् य॒मो रा॒जा भ॑गवान् वि॒चष्टां॑ ।
 लो॒कस्य॑ रा॒जा म॒हतो॑ म॒हान् हि॑ । सु॒गन्तः॑ प॒न्थाम॑भयं कृ॒णोतु॑ ।
 यस्मिन्॑ नक्ष॒त्रे य॒म ए॒ति रा॒जा । यस्मि॑न्नेन-म॒भ्यषि॑ञ्चन्त दे॒वाः ।
 तद॒स्य चि॒त्रँ ह॒विषा॑ य॒जाम॑ । अप॑ पा॒प्मानं॑ भ॒रणी॑र् भ॒रन्तु॑ ॥ 29

30.अमावासि

निवेशनी॑ यत्ते॑ दे॒वा अ॒दधुः॑ ।

Below is the full text of the concised Mantra given in "italics" above.

This concised Mantra is formed by adding the First word/part from the first part of the First para , 2nd word /part from first part of Second para of Full Mantra which is given below. Add the Underlined words of the Full Mantra to arrive at the above concised Mantra. It is more appropriate to chant the full version as given below. Please refer to your Guru for any clarifications/explanations.

नि॒वेश॑नी॒ स॒ङ्ग॑मनी॒ वसू॑नां॒ वि॒श्वा रू॒पाणि॒ वसू॑न्यावे॒शय॑न्ती ।
स॒हस्र॑पोष॒ सु॒भगा॒ ररा॑णा सा न आ गन् व॒र्चसा॑ स॒म्वि॑दाना ।
यत्ते॑ दे॒वा अ॒दधु॑र् भा॒गधे॒य-म॑मा॒वास्ये॑ स॒म्वस॑न्तो म॒हित्वा॑ ।
सा नो॑ य॒ज्ञं पि॒पृहि॑ वि॒श्ववा॑रे॒ रयि॑न्नो धेहि सु॒भगे सु॒वीरं॑ ॥ 30/107

(27)

This Expansion is appearing in TS 3.5.1.1

31.चन्द्रमा

न॒वा न॒वो भ॑वति जा॒यमा॑नो य॒मादि॑त्या अ॒शु-मा॑प्याय॒यन्ति॑ ।

Below is the full text of the concised Mantra given in "italics" above.

This concised Mantra is formed by adding the First word/part from the first part of the First para , 2nd word /part from first part of Second para of Full Mantra which is given below. Add the Underlined words of the Full Mantra to arrive at the above concised Mantra. It is more appropriate to chant the full version as given below. Please refer to your Guru for any clarifications/explanations.

न॒वो॒नवो॑ भ॒वति॑ जा॒यमा॒नोऽ॒ह्नां॑ के॒तु-रु॒षसा॑मेत्य॒ग्रे ।

भा॒गं दे॒वेभ्यो॑ वि द॒धात्या॒यन् प्र॒चन्द्र॑मास्तिरति दी॒र्घमा॒युः ।

यमा॑दि॒त्या अ॒शु-मा॑प्याय॒यन्ति॑ यम॒क्षित॑-म॒क्षित॑यः पिब॒न्ति ।

तेन॑ नो रा॒जा वरु॑णो बृ॒हस्प॑तिरा प्याय॒यन्तु॑ भुव॒नस्य॑ गो॒पाः ।

This Expansion is appearing in TS 2.4.14.1

32. अ॒हो रा॒त्री

ये वि॒रूपे॑ स॒मन॑सा स॒म्व्य॑यन्ती । स॒मानं॑ तन्तुं परि तात॒नाते॑ ।

वि॒भू प्र॒भू अ॒नुभू॑ वि॒श्वतो॑ हुवे । ते नो नक्ष॑त्रे हव॒माग॑मेतं ।

वयं॑ दे॒वी ब्र॒ह्मणा॑ स॒म्वि॑दा॒नाः । सु॒रत्ना॑सो दे॒ववी॑तिं द॒धानाः॑ । 108

अ॒हो॒रा॒त्रे ह॒विषा॑ वर्द्ध॒यन्तः॑ । अति॑ पा॒प्मान॑-मतिमु॒क्त्या॑ गमेम ॥

33. उ॒षा

प्र॒त्युव॑ दृ॒श्याय॑ती । व्यु॒च्छन्ती॑ दुहि॒ता दि॒वः ।

अ॒पो म॒ही वृ॑णुते चक्षु॒षा । तमो॑ ज्योतिष्कृ॒णोति॑ सू॒नरी॑ ।

उ॒दुस्त्रि॑या स्सच॒ते सूर्यः॑ । स॒चा उ॒द्यन्न॑क्ष॒त्र-म॒र्चि॒मत् ।

तवे॒दुषो॑ व्यु॒षि सूर्य॑स्य च । सं भ॒क्तेन॑ गमेमहि ॥ 109

34. नक्षत्रः

तन्नो नक्षत्र-मर्चिमत् । भानुमत्तेज उच्छरत् ।
 उप यज्ञमिहागमत् । प्र नक्षत्राय देवाय । इन्द्रायेन्दुः हवामहे ।
 स न स्सविता सुवथ् सनिं । पुष्टिदां वीरवत्तमं ॥

35. सूर्यः

उदु त्यं चित्रं ॥

Below is the full text of the concised Mantra given in "italics" above.
 This concised Mantra is formed by adding the First word/part from the first part of the First para , 2nd word /part from first part of Second para of Full Mantra which is given below. Add the Underlined words of the Full Mantra to arrive at the above concised Mantra. It is more appropriate to chant the full version as given below. Please refer to your Guru for any clarifications/explanations.

उदु त्यं जातवेदसं देवं वहन्ति केतवः ।
 दृशे विश्वाय सूर्यं ।

चित्रं देवाना-मुदगादनीकं चक्षुर् मित्रस्य वरुणस्याग्नेः । 110
 आऽप्रा द्यावापृथिवी अन्तरिक्षः सूर्य आत्मा
 जगत स्तस्थुषश्च ॥

This Expansion is appearing in T.S.1.4.43.1

36. अदितिः

अदितिर्न उरुष्यतु महीमू षु मातरं ॥

Below is the full text of the concised Mantra given in “italics” above.
See notes above.

अदितिर्न उरुष्य-त्वदितिः शर्म यच्छतु ।

अदितिः पात्वः हसः ॥

महीमू षु मातरः सुव्रताना-मृतस्य पत्नी मवसे हुवेम ।

तुविक्षत्रा-मजरन्ती-मुरूचीः सुशर्माण-मदितिः सुप्रणीतिं ।

This Expansion is appearing in T.S.1.5.11.5

37. विष्णुः

इदं विष्णु प्र तद्विष्णुः ॥

Below is the full text of the concised Mantra given in “italics” above. See notes above

इदं विष्णुर् वि चक्रमे त्रेधा नि दधे पदं ।

समूढमस्य पाः सुरे ॥

प्र तद्विष्णुः स्तवते वीर्याय । मृगो न भीमः कुचरो गिरिष्ठाः ।

यस्योरुषु त्रिषु विक्रमणेषु । अधिक्षियन्ति भुवनानि विश्वा ॥ 111

This Expansion is appearing in TS 1.2.13.1

This Expansion is appearing in TB 2.4.3.4

38. अग्निः

अग्नि॑र् मूर्द्धा॑ भुवः॑ ॥

Below is the full text of the concised Mantra given in "italics" above. See notes above

अग्नि॑र् मूर्द्धा॑ दि॒वः क॒कु॒त्प॒तिः पृ॒थि॒व्या अ॒यं ।

अपा॑ꣳ रेता॑ꣳसि जि॒न्वति॑ ॥

भुवो॑ य॒ज्ञस्य॑ रज॒सश्च॑ ने॒ता यत्रा॑ नि॒यु॒द्धिः सच॑से

शि॒वाभिः॑ ।

दि॒वि मूर्द्धानं॑ दधि॒षे सुव॑र्षां जि॒ह्वा॒मग्ने॑

च॒कृषे॑ ह॒व्यवा॑हं ॥

This Expansion is appearing in T.S.4.4.4.1

39. अनुमती

अनु॑ नो॒-ऽद्यानु॑मति॒-रन्विदनु॑मते॒ त्वं ॥

Below is the full text of the concised Mantra given in "italics" above.
See notes above.

अनु॑ नो॒ऽद्यानु॑मतिर्य॒ज्ञं दे॒वेषु॑ मन्यतां ।
अग्नि॑श्च ह॒व्यवा॑हनो भवतां दा॒शुषे॑ मयः ।

अन्विदनु॑मते॒ त्वं म॒न्यासै॑ शं च नः कृ॒धि ।
क्र॒त्वे द॒क्षाय॑ नो हि॒नु प्र ण॑ आयू॒ष्णि तारि॑षः ।
This Expansion is appearing in TS 3.3.11.3

40. हव्यवाहः (अग्निः)

ह॒व्यवा॑ह॒ऽस्विष्टं॑ ॥

Below is the full text of the concised Mantra given in "italics" above.

ह॒व्यवा॑ह॒मभि॑-माति॒षाहं॑ । र॒क्षो॒हणं॑ पृ॒तना॑सु जि॒ष्णुं ।
ज्योति॑ष्मन्तं दी॒द्यतं॑ पु॒रन्धिं॑ । अ॒ग्निऽस्विष्ट॑कृ॒त-माहु॑वेम ।
स्विष्ट॑मग्ने अ॒भित॑त् पृ॒णाहि॑ । वि॒श्वा दे॒व पृ॒तना॑ अ॒भिष्य॑ ।
उ॒रुन्नः॑ प॒न्थां प्र॑दि॒शन् वि॑भाहि ।
ज्योति॑ष्मद्धे॒ह्य जर॑न्न आयुः ॥ 112/28

This Expansion is appearing in TB 2.4.1.4

1.38 नक्षत्र उपहोम मन्त्राः**T.B.3.1.4.1 to T.B.3.1.5.15 for full item No.1.37****1. कृत्तिका**

अ॒ग्नये॒ स्वाहा॑ कृ॒त्तिका॑भ्य॒ स्स्वाहा॑ ॥

अ॒ंबायै॒ स्वाहा॑ दु॒लायै॒ स्वाहा॑ ॥

नि॒तल्यै॒ स्वाहा॑ ऽभ्र॒यन्त्यै॒ स्वाहा॑ ॥

मे॒घय॑न्त्यै॒ स्वाहा॑ व॒र्ष॒यन्त्यै॒ स्वाहा॑ ॥

चु॒पु॒णी॒कायै॒ स्वाहा॑ ॥

2. रोहिणी

प्र॒जाप॑तये॒ स्वाहा॑ रो॒हि॒ण्यै॒ स्वाहा॑ ॥

रो॒च॒मा॒नायै॒ स्वाहा॑ प्र॒जा॒भ्य॒ स्स्वाहा॑ ॥

3.मृगशीर्षः

सो॒माय॒ स्वाहा॑ मृ॒गशी॑र्षाय॒ स्वाहा॑ ॥

इ॒न्व॒का॒भ्य॒ स्स्वाहा॑ ष॒धी॒भ्य॒ स्स्वाहा॑ ॥

रा॒ज्याय॒ स्वाहा॑-ऽभि॒जित्यै॒ स्वाहा॑ ॥ 113

4. आर्द्रा

रु॒द्राय॑ स्वा॒हाऽऽर्द्रा॑यै॒ स्वाहा॑ ॥
 पि॒न्वमा॑नायै॒ स्वाहा॑ प॒शुभ्य॑ स्स्वाहा ॥

5. पुनर्वसु

अदि॑त्यै स्वा॒हा पु॒नर्व॑सुभ्यां ।
 स्वा॒हा ऽऽभू॑त्यै स्वा॒हा प्र॒जात्यै॑ स्वाहा ॥

6. पुष्यः

बृ॒हस्प॑तये॒ स्वाहा॑ ति॒ष्याय॑ स्वाहा ॥ ब्र॒ह्मव॑र्च॒साय॑ स्वाहा ॥

7. आश्रेषा

सर्पे॑भ्य स्स्वाहा ॥ ऽऽश्रे॑षाभ्य स्स्वाहा ।
 द॒न्दशू॑केभ्य स्स्वाहा ॥

8. मघा

पि॒तृभ्य॑ स्स्वाहा म॒घाभ्यः॑ ।
 स्वा॒हा ऽन॑घाभ्य स्स्वाहा ऽग॒दाभ्यः॑ ।
 स्वा॒हा ऽरु॑न्धतीभ्य स्स्वाहा ॥ 114

9. पूर्व फल्गुनी

अ॒र्य॒म्णे॒ स्वा॒हा॒ फ॒ल्गु॒नी॒भ्या॑ स्वा॒हा॑ ।

प॒शु॒भ्य॒ स्स्वा॒हा॑ ॥

10. उत्तर फल्गुनी

भ॒गाय॑ स्वा॒हा॒ फ॒ल्गु॒नी॒भ्या॑ स्वा॒हा॑ ।

श्रै॒ष्ट्या॒य॒ स्वा॒हा॑ ॥

11. हस्तः

स॒वि॒त्रे॒ स्वा॒हा॒ ह॒स्ता॒य॑ ।

स्वा॒हा॒ द॒द॒ते॒ स्वा॒हा॒ पृ॒ण॒ते॑ ।

स्वा॒हा॒ प्र॒य॒च्छ॒ते॒ स्वा॒हा॒ प्र॒ति॒गृ॒भ्ण॒ते॒ स्वा॒हा॑ ॥

12. चित्रा

त्व॒ष्ट्रे॒ स्वा॒हा॒ चि॒त्रा॒यै॑ स्वा॒हा॑ ।

चै॒त्रा॒य॒ स्वा॒हा॒ प्र॒जा॒यै॑ स्वा॒हा॑ ॥

13. स्वाति

वा॒य॒वे॒ स्वा॒हा॒ नि॒ष्ट्या॒यै॑ स्वा॒हा॑ ।

का॒म॒चा॒रा॒य॒ स्वा॒हा॒ ऽभि॒जि॒त्यै॑ स्वा॒हा॑ ॥

14. विशाखा

इन्द्रा॑ग्नि॒भ्या॒ स्वा॒हा वि॒शा॒खा॒भ्या॒ स्वा॒हा ।
 श्रैष्ठ्या॑य॒ स्वा॒हा ऽभि॒जित्यै॑ स्वा॒हा ॥

15. पौर्णमासि

पौ॒र्ण॒मा॒स्यै॒ स्वा॒हा का॒मा॒य॒ स्वा॒हा ऽग॒त्यै॒ स्वा॒हा ॥ 115 (29)

16. अनूराधा

मि॒त्राय॑ स्वा॒हा-ऽनू॒रा॒धे॒भ्य॒ स्स्वा॒हा ।
 मि॒त्र॒धे॒या॒य॒ स्वा॒हा ऽभि॒जित्यै॑ स्वा॒हा ॥

17. ज्येष्ठा

इन्द्रा॑य॒ स्वा॒हा ज्ये॒ष्ठायै॑ स्वा॒हा ।
 ज्यैष्ठ्या॑य॒ स्वा॒हा-ऽभि॒जित्यै॑ स्वा॒हा ॥

18. मूलं

प्र॒जा॒प॒तये॑ स्वा॒हा मू॒ला॒य॒ स्वा॒हा । प्र॒जा॒यै॑ स्वा॒हा ॥

19. पूर्वाषाढा

अ॒द्भ्य॒ स्स्वा॒हा ऽषा॒ढा॒भ्य॒ स्स्वा॒हा ।
 स॒मु॒द्राय॑ स्वा॒हा का॒मा॒य॒ स्वा॒हा ।
 अ॒भि॒जित्यै॑ स्वा॒हा ॥

20. उत्तराषाढा

वि॒श्वेभ्यो॑ दे॒वेभ्य॑ स्स्वा॒हा ऽषा॒ढाभ्य॑ स्स्वा॒हा ।
 अ॒न॒प॒ज॒य्या॒य॒ स्वा॒हा जि॒त्यै॑ स्वा॒हा ॥ 116

21. अभिजित्

ब्र॒ह्म॒णे॒ स्वा॒हा ऽभि॒जि॒ते॒ स्वा॒हा ।
 ब्र॒ह्म॒लो॒का॒य॒ स्वा॒हा ऽभि॒जि॒त्यै॑ स्वा॒हा ॥

22. श्रवणं

वि॒ष्ण॒वे॒ स्वा॒हा श्रो॒णायै॑ स्वा॒हा ।
 इ॒लो॒का॒य॒ स्वा॒हा श्रु॒ता॒य॒ स्वा॒हा ॥

23. श्रविष्ठा

व॒सु॒भ्य॑ स्स्वा॒हा श्र॒वि॒ष्ठा॒भ्य॑ स्स्वा॒हा ।
 अ॒ग्रा॒य॒ स्वा॒हा प॒री॒त्यै॑ स्वा॒हा ॥

24. शतभिषक्

व॒रु॒णाय॑ स्वा॒हा श॒त॒भि॒ष॒जे॒ स्वा॒हा ।
 भे॒ष॒जे॒भ्य॑ स्स्वा॒हा ॥

25. पूर्व प्रोष्ठपदा

अजायै॑कपदे॑ स्वाहा॑ प्रोष्ठपदे॑भ्य स्स्वाहा॑ । 117

तेजसे॑ स्वाहा॑ ब्रह्मवर्चसाय॑ स्वाहा॑ ॥

26. उत्तर प्रोष्ठपदा

अहये॑ बुद्धि॑नयाय॑ स्वाहा॑ प्रोष्ठपदे॑भ्य स्स्वाहा॑ ।

प्रतिष्ठा॑यै स्वाहा॑ ॥

27. रेवति

पूष्णे॑ स्वाहा॑ रेवत्यै॑ स्वाहा॑ ।

पशु॑भ्य स्स्वाहा॑ ॥

28. अश्विनी

अश्वि॑भ्याऽ स्वाहा॑ ऽश्वयुग्भ्या॑ऽ स्वाहा॑ ।

श्रोत्रा॑य स्वाहा॑ श्रुत्यै॑ स्वाहा॑ ॥

29. अपभरणि

यमा॑य स्वाहा॑ ऽपभरणी॑भ्य स्स्वाहा॑ ।

राज्या॑य स्वाहा॑ ऽभिजित्यै॑ स्वाहा॑ ॥

30. अमावासि

अमा॑वास्यायै॑ स्वाहा॑ कामा॑य स्वाहा॑ ऽगत्यै॑ स्वाहा॑ ॥ 118 (30)

31. चन्द्रमा

च॒न्द्र॒म॒से॒ स्वा॒हा॑ प्र॒ती॒दृ॒श्या॒यै॒ स्वा॒हा॑ ।
 अ॒हो॒रा॒त्रे॒भ्य॒ स्स्वा॒हा॑-॒ऽर्द्ध॒मा॒से॒भ्य॒ स्स्वा॒हा॑ ।
 मा॒से॒भ्य॒ स्स्वा॒हर्तु॑भ्य॒ स्स्वा॒हा॑ । सं॒वँ॒त्स॒रा॒य॒ स्वा॒हा॑ ॥

32. अहो रात्री

अ॒हे॒ स्वा॒हा॑ रा॒त्रि॒यै॒ स्वा॒हा॑ ।
 अ॒ति॒मु॒क्त्यै॒ स्वा॒हा॑ ॥

33. उषा

उ॒ष॒से॒ स्वा॒हा॑ व्यु॒ष्ट्यै॒ स्वा॒हा॑ ।
 व्यू॒षु॒ष्यै॒ स्वा॒हा॑ व्यु॒च्छन्त्यै॒ स्वा॒हा॑ ।
 व्यु॒ष्टायै॒ स्वा॒हा॑ ॥

34. नक्षत्रः

न॒क्ष॒त्रा॒य॒ स्वा॒हो॒दे॒ष्य॒ते॒ स्वा॒हा॑ । 119
 उ॒द्य॒ते॒ स्वा॒हो॒दि॒ता॒य॒ स्वा॒हा॑ । ह॒र॒से॒ स्वा॒हा॑ भ॒र॒से॒ स्वा॒हा॑ ।
 भ्रा॒ज॒से॒ स्वा॒हा॑ ते॒ज॒से॒ स्वा॒हा॑ ।
 त॒प॒से॒ स्वा॒हा॑ ब्र॒ह्म॒व॒र्च॒सा॒य॒ स्वा॒हा॑ ॥

35. सूर्यः

सूर्या॑य स्वा॒हा नक्ष॑त्रेभ्य॒ स्स्वा॒हा ॥

प्रति॑ष्ठायै॒ स्वा॒हा ॥

36. अदितिः

अदि॑त्यै स्वा॒हा प्रति॑ष्ठायै॒ स्वा॒हा ॥

37. विष्णुः

विष्णा॑वे स्वा॒हा यज्ञा॑य स्वा॒हा । प्रति॑ष्ठायै॒ स्वा॒हा ॥ 120

दधिक्राव्णो अकारिषं

TS 7.4.19.4 for para 121

दधि॑क्राव्॒णो अ॒कारि॑षं । जि॒ष्णो॒रश्च॑स्य॒ वाजि॑नः ।

सु॒रभि॑ नो॒ मुखा॑ क॒रत् प्र॒ ण आ॒यू॒षि ता॑रिषत् ।

आपो॑ हि॒ ष्ठा म॒योभु॑वस्ता॒ न ऊ॒र्जे द॑धातन । म॒हे र॒णाय॑ चक्ष॑से ।

यो व॑ शि॒शव॑तमो॒ रस॑स्तस्य॒ भाज॑यतेह॒ नः ।

उ॒शती॑रिव॒ मातरः॑ । तस्मा॑ अ॒रङ्ग॑माम॒ वो यस्य॑ क्षया॒य जि॑न्वथ ।

आपो॑ ज॒नय॑था च॒ नः ॥ 121 (32)

1.39 वरुण सूक्तं**(TS 1.5.11.3)**

उदु॒त्त॒मं॑ वरु॒ण पा॒श-म॒स्मद॒वा॒ध॒मं॑ वि॒म॒द्ध्य॒म॒७ श्र॒थाय॑ ।

अ॒था व॒य॒मा॒दि॒त्य व्र॒ते त॒वा॒ना॒ग॒सो अ॒दि॒त॒ये स्या॒म ॥

(TS 1.2.8.1)

अ॒स्त॒भ॒ना॒द्या-मृ॒ष॒भो अ॒न्त॒रि॒क्ष-म॒मि॒मी॒त व॒रि॒मा॒णं पृ॒थि॒व्या
आ॒ऽसी॒द॒द्वि॒श्वा भु॒व॒ना॒नि स॒म्रा॒ड् वि॒श्वे॒त्ता॒नि वरु॒णस्य॑ व्र॒ता॒नि ॥

(TS 3.4.11.6)

य॒त्किञ्चे॒दँ वरु॒ण दै॒व्ये ज॒नेऽभि॒द्रो॒हं म॒नु॒ष्या-श्च॒रा॒म॒सि ।

अ॒चि॒त्ती॒ य॒त्त॒व ध॒र्मा यु॒यो॒पि॒म मा न॒ स्त॒स्मा॒दे॒न॒सो दे॒व री॒रि॒षः ॥

(TS 3.4.11.6)

कि॒त॒वा॒सो य॒द्-रि॒रि॒पु॒र्न दी॒वि य॒द्-वा घा स॒त्य-मु॒त॒य॒न्न वि॒द्म ।

स॒र्वा ता वि॒ष्य शि॒थि॒रे॒व दे॒वा॒था ते स्या॒म वरु॒ण प्रि॒या॒सः ॥

(TS 1.5.11.3)

अ॒व॒ते॒हे॒डो वरु॒ण न॒मो॒भि॒र॒व य॒ज्ञे॒भि-री॒म॒हे ह॒वि॒र्भिः ।

क्ष॒य॒न्न-स्म॒भ्य-म॒सुर प्र॒चे॒तो रा॒ज॒न्ने॒ना॒ऽसि शि॒श्र॒थः कृ॒ता॒नि ॥

(T.S. 2.1.11.6)

त॒त्वा या॒मि ब्र॒ह्म॒णा व॒न्द॒मा॒न स्त॒दा॒शा॒स्ते य॒ज॒मा॒नो ह॒वि॒र्भिः ।

अ॒हे॒ड॒मा॒नो वरु॒णे॒ह बो॒द्ध्यु॒रु॒श॒ऽस मा न॒ आ॒युः प्र॒ मो॒षीः ॥ 122 (33)

1.40 पवमान सूक्तं**TS 5.6.1.1**

हिरण्यवर्णाः शुचयः पावका यासुजातः कश्यपो यास्विन्द्रः ।
 अग्निं या गर्भदधिरे विरूपास्ता न आपश्शः स्योना भवन्तु ॥
 यासां राजा वरुणो याति मध्ये सत्यानृते अवपश्यन् जनानां ।
 मधुश्चुतश्शुचयो याः पावकास्ता न आपश्शः स्योना भवन्तु ॥
 यासां देवा दिवि कृण्वन्ति भक्षं या अन्तरिक्षे बहुधा भवन्ति ।
 याः पृथिवीं पयसोन्दन्ति शुक्रास्ता न आपश्शः स्योना भवन्तु ॥
 शिवेन मा चक्षुषा पश्यताप शिवया तनुवोपस्पृशत त्वचं मे ।
 सर्वा अग्नीं रप्सुषदो हुवे वो मयि वर्चो
 बलमोजो निधत्त ॥ 123 (34)

TB 1.4.8.1 (for item No. 124 to 129)

पवमानस्सुवर्जनः । पवित्रेण विचर्षणिः । यः पोता स पुनातु मा ।
 पुनन्तु मा देवजनाः । पुनन्तु मनवो धिया । पुनन्तु विश्व आयवः ।
 जातवेदः पवित्रवत् । पवित्रेण पुनाहि मा ।
 शुक्रेण देव दीद्यत् ।
 अग्ने क्रत्वा क्रतूँरनु ॥ 124

य॒त्ते प॒वि॒त्र-म॒र्चि॒षि । अ॒ग्ने वि॒त॒त-म॒न्त॒रा । ब्र॒ह्म ते॒न पु॒नीम॑हे ।
 उ॒भाभ्यां॑ दे॒व स॒वि॒तः । प॒वि॒त्रेण॑ स॒वे॒न च॑ । इ॒दं ब्र॒ह्म पु॒नीम॑हे ।
 वै॒श्वदे॒वी पु॒न॒ती दे॒व्यागा॑त् । य॒स्यै ब॒ह्वी-स्त॑नु॒वो वी॒त॒पृ॒ष्ठाः ।
 तया॑ म॒द॒न्त॒ स्स॒ध॒माद्यै॑षु । व॒य॒ꣳ स्या॑म॒ प॒त॒यो॒र॒यी॒णां ॥ 125

वै॒श्वान॑रो र॒श्मि॒भि॒र्मा पु॒नातु॑ । वा॒तः प्रा॒णेने॑ षि॒रो म॒योभूः॑ ।
 द्या॒वापृ॑थि॒वी प॒य॒सा प॒योभिः॑ । ऋ॒ताव॑री य॒ज्ञिये॑ मा पु॒नीतां॑ ।
 बृ॒ह॒द्भि॒ स्स॒वि॒त॒स्तृ॒भिः । व॒र्षि॑ष्ठैर् दे॒व म॒न्म॒भिः ।
 अ॒ग्ने दक्षैः॑ पु॒नाहि॑मा ।
 येन॑ दे॒वा अ॒पु॒न॒त । ये ना॒पो दि॒व्य॒ङ्क॒शः । तेन॑ दि॒व्येन॑ ब्र॒ह्म॒णा ॥ 126

इ॒दं ब्र॒ह्म पु॒नीम॑हे । यः पा॒व॒मा॒नी-र॒द्धये॑ति ।
 ऋ॒षि॒भि॒ स्सं॒भृ॒तꣳ र॒सं । स॒र्वꣳ स॒ पू॒त॒म॒श्जा॑ति ।
 स्व॒दि॒तं मा॒तरि॑श्व॒ना । पा॒व॒मा॒नीर्यो॑ अ॒द्धये॑ति ।
 ऋ॒षि॒भि॒ स्सं॒भृ॒तꣳ र॒सं । त॒स्मै सर॑स्व॒ती दु॒हे ।
 क्षी॒रꣳ सर्पि॑ र्म॒धू॒द॒कं । पा॒व॒मा॒नी स्स्व॑स्त्य॒यनीः॑ ॥ 127

सु॒दु॒घा॒हि॒ प॒य॒स्व॒तीः । ऋ॒षि॒भि॒ स्सं॒भृ॒तो र॒सः ।
 ब्रा॒ह्म॒णेष्व॒मृत॑ हितं । पा॒व॒मा॒नीर् दि॒शन्तु॑ नः ।
 इ॒मं लो॒कम॑थो अ॒मुं । का॒मा॒न्थ् स॒मर्द्ध॑यन्तु नः ।
 दे॒वीर्दे॒वैः स॒मा भृ॑ताः । पा॒व॒मा॒नी स्स्व॑स्त्ययनीः ।
 सु॒दु॒घा॒हि घृ॒तश्चु॑तः । ऋ॒षि॒भि॒ स्सं॒भृ॒तो र॒सः ॥ 128

ब्रा॒ह्म॒णेष्व॒मृत॑ हितं । येन॑ दे॒वाः प॒वि॒त्रेण॑ । आ॒त्मा॒नं पु॒न॒ते सदा॑ ॥
 तेन॑ स॒हस्र॑धा॒रेण॑ । पा॒व॒मा॒न्यः पु॒नन्तु॑ मा । प्रा॒जाप॑त्यं प॒वि॒त्रं ॥
 श॒तो॒द्याम॑ हिर॒ण्म॒यं । तेन॑ ब्र॒ह्म॒वि॒दो व॒यं ।
 पू॒तं ब्र॒ह्म पु॒नी॒महे॑ । इन्द्र॑ स्सु॒नी॒ती स॒ह मा पु॒नातु॑ ।
 सोम॑ स्स्व॒स्त्या व॒रु॒ण स्स॒मी॒च्या । य॒मो रा॒जा प्र॒मृ॒णाभिः॑ पु॒नातु॑मा ।
 जा॒तवे॑दा मो॒र्जय॑न्त्या पु॒नातु॑ । ओं भूर्भु॒वस्सु॑वः ॥ 129

TB 3.5.11.1

तच्छँ॑यो-रा॒वृणी॑महे । गा॒तुं यँ॑जाय । गा॒तु यँ॑ज॒पत॑ये ।
दै॒वी॑स्व॒स्तिर॑स्तुनः । स्व॒स्तिर् मा॑नु॒षेभ्यः॑ ।
ऊ॒र्ध्वं जि॑गातु भे॒षजं॑ । श॒न्नो अ॑स्तु द्वि॒पदे॑ ।
शं च॑तु॒ष्पदे॑ ॥ 130 (36)

ओं शान्तिः॑ शान्तिः॑ शान्तिः॑ ॥

(उदकशान्ति समाप्तं)

1.41 नक्षत्र सूक्तं (नक्षत्र जप मन्त्राः)

1.नक्षत्रं – कृत्तिका

अ॒ग्नि॒र्नः॑ पा॒तु कृ॑त्ति॒काः । नक्ष॑त्रं दे॒वमि॑न्द्रि॒यं । इ॒दमा॑सां-वि॒चक्ष॑णं ।
 ह॒वि॒रा॒सन् जु॑होत॒न । यस्य॑ भा॒न्ति रश्म॑यो यस्य॑ के॒तवः॑ ।
 य॒स्ये॒मा वि॒श्वा भु॑वनानि सर्वा । स कृ॑त्ति॒का भि॒रभि-स॒म्व॑सानः ।
 अ॒ग्नि॒र्नो दे॒व स्सु॑वि॒ते द॑धातु ॥

अ॒ग्नये॑ स्वा॒हा कृ॑त्ति॒काभ्य॑ स्वा॒हा ॥

अ॒ंबा॒यै स्वा॒हा दु॒लायै॑ स्वा॒हा ॥

नि॒त॒त्यै स्वा॒हा ऽभ्र॑य॒न्त्यै स्वा॒हा ॥

मे॒घ॒य॒न्त्यै स्वा॒हा व॒र॒ष॒य॒न्त्यै स्वा॒हा ॥

चु॒पु॒णी॒कायै॑ स्वा॒हा ॥ 1

(कृत्तिका नक्षत्र देवतायै अग्नये नमः)

2. नक्षत्रं – रोहिणी

प्र॒जा॒प॒ते रो॑हि॒णी वे॑तु॒ पत्नी॑ । वि॒श्वरू॑पा बृ॒हती॑ चि॒त्रभा॑नुः ।
 सा नो॑ य॒ज्ञस्य॑ सु॒वि॒ते द॑धातु । यथा॑ जी॒र्वेम॑ श॒रद॑ स्स॒वीराः॑ ।
 रो॒हि॒णी दे॒व्युद॑गात् पु॒रस्ता॑त् । वि॒श्वा रू॒पाणि॑ प्र॒तिमो॑द॒माना॑ ।
 प्र॒जा॒प॒ति॒ ह॒विषा॑ वर्द्ध॒यन्ती॑ । प्रि॒या दे॒वाना॑-मु॒पया॑तु॒ यज्ञं॑ ॥

प्रजापतये स्वाहा रोहिण्यै स्वाहा ।
 रोचमानायै स्वाहा प्रजाभ्य स्वाहा ॥ 2

(रोहिणी नक्षत्र देवतायै प्रजापतये नमः)

3. नक्षत्रं – मृगशीर्षः

सोमो राजा मृगशीर्षेण आगन् । शिवं नक्षत्रं प्रियमस्य धाम ।
 आप्यायमानो बहुधा जनेषु । रेतः प्रजां यजमाने दधातु ।
 यत्ते नक्षत्रं मृगशीर्षमस्ति । प्रियं राजन् प्रियतमं प्रियाणां ।
 तस्मै ते सोम हविषा विधेम । शन्न एधि द्विपदे शं चतुष्पदे ॥
 सोमाय स्वाहा मृगशीर्षाय स्वाहा ।
 इन्वकाभ्य स्स्वाहौषधीभ्य स्स्वाहा ।
 राज्याय स्वाहा-ऽभिजित्यै स्वाहा ॥ 3

(मृगशीर्ष नक्षत्र देवतायै सोमाय नमः)

4. नक्षत्रं – आर्द्रा

आर्द्रया रुद्रः प्रथमान एति । श्रेष्ठो देवानां पतिरघ्नियानां ।
 नक्षत्रमस्य हविषा विधेम । मा नः प्रजां रीरिषन् मोत वीरान् ।
 हेती रुद्रस्य परि णो वृणक्तु । आर्द्रा नक्षत्रं जुषतां हविर्नः ।

प्र॒मु॒ञ्च॒मा॒नौ॑ दु॒रि॒ता॒नि॒ वि॒श्वा॑ ।

अ॒पा॒घ॒श॒स॒-न्नु॒द॒ता॒म॒रा॒तिं॑ ॥

रु॒द्राय॑ स्वा॒हाऽऽ॒द्रायै॑ स्वा॒हा ॥

पि॒न्व॒मा॒नायै॑ स्वा॒हा प॒शु॒भ्य॑ स्स्वा॒हा ॥ 4

(आर्द्रा नक्षत्र देवतायै रुद्राय नमः)

5.नक्षत्रं – पुनर्वसु

पु॒न॒र्नो॑ दे॒व्यदि॑तिः स्पृ॒णोतु॑ । पु॒न॒र्वसू॑ नः पु॒न॒रेतां॑ य॒ज्ञं ।

पु॒न॒र्नो॑ दे॒वा अ॒भिय॑न्तु॒ सर्वे॑ ॥ पु॒नः॑ पु॒न॒र्वो॑ ह॒विषा॑ य॒जामः॑ ।

ए॒वा न॑ दे॒व्यदि॑तिर॒न॒र्वा । वि॒श्वस्य॑ भ॒र्त्री ज॑गतः प्र॒तिष्ठा॑ ।

पु॒न॒र्वसू॑ ह॒विषा॑ वर्द्ध॒यन्ती॑ । प्रि॒यं दे॒वाना॑-म॒प्येतु॑ पाथः ॥

अ॒दि॒त्यै स्वा॒हा पु॒न॒र्वसु॑भ्यां ।

स्वा॒हा ऽऽभू॑त्यै स्वा॒हा प्र॒जा॒त्यै स्वा॒हा ॥ 5

(पुनर्वसु नक्षत्र देवतायै अदित्यै नमः)

6.नक्षत्रं – पुष्यः

बृ॒हस्प॑तिः प्रथ॒मज्जा॑यमानः । ति॒ष्यं नक्ष॑त्रम॒भि सं॑ब॒भूव॑ ।

श्रे॒ष्ठो दे॒वानां॑ पृ॒तना॑सु जि॒ष्णुः । दि॒शो ऽनु॑ सर्वा अ॒भय॑न्नो अस्तु ।

ति॒ष्यः पु॒रस्ता॑दु॒त म॑द्ध्यतो नः । बृ॒हस्प॑तिर् नः परि॒पातु॑ प॒श्चात् ।

बा॒धेतां॑ द्वेषो॑ अ॒भयं॑ कृ॒णुतां॑ ।

सु॒वीर्य॑स्य॒ पत॑यस्स्याम ॥

बृ॒हस्प॑तये॒ स्वाहा॑ ति॒ष्याय॑ स्वाहा॑ ॥

ब्र॒ह्मव॑र्चसाय॒ स्वाहा॑ ॥ 6

(पुष्य नक्षत्र देवतायै बृहस्पतये नमः)

7. नक्षत्रं – आश्रेषं

इ॒दं स॑र्पे॒भ्यो ह॑वि॒रस्तु॑ जुष्टं॑ । आ॒श्रेषा॑ ये॒षा म॑नु॒यन्ति॑ चे॒तः ।

ये अ॒न्तरि॑क्षं पृ॒थि॒वीं क्षि॑यन्ति । ते न॒ स्सर्पा॑सो ह॒वमा॑गमि॒ष्टाः ।

ये रो॑चने॒ सूर्य॑स्यापि॒ सर्पाः॑ । ये दि॒वं दे॒वी-म॑नु॒ सञ्च॑रन्ति ।

येषा॑मा॒श्रेषा॑ अ॒नु॒यन्ति॑ का॒मं । तेभ्य॑ स्स॒र्पे॒भ्यो म॑धु॒मज्जु॑होमि ॥

स॒र्पे॒भ्य स्स्वाहा॑ ऽऽश्रे॒षाभ्य॑ स्स्वाहा॑ ।

द॒न्द॒शू॒केभ्य॑ स्स्वाहा॑ ॥ 7

(आश्रेषा नक्षत्र देवतायै सर्पेभ्यो नमः)

8.नक्षत्रं – मघा

उप॑हू॒ताः पि॒तरो॑ ये म॒घासु॑ । मनो॑जवस स्सु॒कृतं॑ स्सु॒कृत्याः॑ ।
 ते नो॑ नक्ष॒त्रे हव॑मागमिष्ठाः । स्व॒धाभिर् य॒ज्ञं प्र॑यतं जुषन्तां ।
 ये अ॒ग्निद॑ग्धा येऽन॒ग्निद॑ग्धाः । ये ऽमु॑ल्लोकं पि॒तरः॑ क्षियन्ति ।
 या॒ञ्च वि॒द्म या॒ञ् उ च॑ न प्रविद्म । म॒घासु॑ य॒ज्ञञ् सु॒कृतं॑ जुषन्तां ॥
 पि॒तृभ्य॑ स्स्वाहा म॒घाभ्यः॑ ।
 स्वाहा ऽन॒घाभ्य॑ स्स्वाहा ऽग॒दाभ्यः॑ ।
 स्वाहा ऽरु॒न्धती॑भ्य॒ स्स्वाहा ॥ 8

(मघा नक्षत्र देवतायै पितृभ्यो नमः)

9.नक्षत्रं – पूर्वफल्गुनी

गवां॑ पतिः फल्गु॒नीना॑-मसि त्वं । तद॑र्यमन् वरुण मि॒त्र चारु॑ ।
 तं त्वा व॒यञ् स॑नितारञ् सनी॒नां । जी॒वा जी॑वन्तमुप स॒म्वि॑शेम ।
 येने॒मा वि॒श्वा भु॑वनानि सज्जिता । यस्य॑ दे॒वा अनु॑संय्यन्ति चे॒तः ।
 अ॒र्य॒मा रा॒जाऽज॒र-स्तु॑विष्मान् । फल्गु॒नीना॑-मृष॒भो रो॑रवीति ॥
 अ॒र्य॒म्णे स्वा॒हा फल्गु॒नीभ्या॑ञ् स्वा॒ह- ।
 प॒शुभ्य॑ स्स्वाहा ॥ 9

(पूर्वफल्गुनी नक्षत्र देवतायै अर्यम्णे नमः)

10. नक्षत्रं – उत्तर फल्गुनी

श्रेष्ठो॑ दे॒वानां॑ भ॒गवो॑ भ॒गासि॑ । तत्त्वा॑ वि॒दुः फ॒ल्गुनी॑-स्तस्य॑ वि॒त्तात् ।

अ॒स्मभ्यं॑ क्ष॒त्रम॒जर॑ सु॒वीर्यं॑ । गो॒म-द॒श्व-व॒दुप॑सन्नु॒देह॑ ।

भ॒गो ह॑ दा॒ता भ॒ग इ॒त्प्रदा॑ता । भ॒गो दे॒वीः फ॒ल्गुनी॑-रा॒विवेश॑ ।

भ॒गस्ये॑त्तं प्र॒सवं॑ ग॒मेम॑ । यत्र॑ दे॒वै स्स॒धमा॑दं म॒देम॑ ॥

भ॒गाय॑ स्वा॒हा फ॒ल्गुनी॑भ्या॒ स्वाहा॑ ।

श्रै॒ष्ठया॑य स्वा॒हा ॥ 10

(उत्तरफल्गुनी नक्षत्र देवतायै भगाय नमः)

11. नक्षत्रं – हस्तः

आ॒यातु॑ दे॒व स्स॒वितो॑ प॒यातु॑ । हि॒रण्य॑येन सु॒वृता॑ रथेन ।

व॒हन् ह॒स्तं सु॒भगं॑ वि॒द्वना॑प॒सं । प्र॒यच्छ॑न्तं प॒पु॒रिं पु॒ण्यम॑च्छ ।

ह॒स्तः प्र॒यच्छ॑त्वमृ॒तं व॑सीयः । दक्षि॑णेन प्र॒तिगृ॑ष्णीम ए॒नत् ।

दा॒तार-म॒द्य स॒विता॑ वि॒देय॑ । यो नो॑ ह॒स्ताय॑ प्र॒सुवा॑ति य॒ज्ञं ॥

स॒वित्रे॑ स्वा॒हा ह॒स्ताय॑ । स्वा॒हा द॒दते॑ स्वा॒हा पृ॒णते॑ ।

स्वा॒हा प्र॒यच्छ॑ते स्वा॒हा प्र॒तिगृ॑ष्णते स्वा॒हा ॥

(हस्त नक्षत्र देवतायै सवित्रे नमः) 11

12. नक्षत्रं – चित्रा

त्वष्टा नक्षत्र-मभ्येति चित्रां । सुभ॑ स॒सं यु॒वति॑ रोच॒मानां ।
 निवेशयन्न-मृतान् मर्त्या॑श्च । रूपाणि पि॑शन् भुव॒नानि विश्वा॑ ॥
 तन्नस्त्वष्टा तदु चित्रा विचष्टां । तन्नक्षत्रं भूरि॒दा अस्तु॑ मह्यं ॥
 तन्नः प्रजां वी॒रवती॑ सनोतु । गोभि॒र्नो अश्वै॑ स्समनक्तु य॒ज्ञं ॥
 त्वष्ट्रे॑ स्वाहा चित्रायै॑ स्वाहा ॥
 चैत्राय॑ स्वाहा प्रजायै॑ स्वाहा ॥ 12

(चित्रा नक्षत्र देवतायै त्वष्ट्रे नमः)

13. नक्षत्रं – स्वाती

वायुर् नक्षत्र-मभ्येति निष्च्यां ॥ तिग्मशृ॑ङ्गो वृष॒भो रोरु॑वाणः ।
 समीरयन् भुव॒ना मातरि॑श्वा । अप॒ द्वेषा॑सि नुदता-मरा॒तीः ।
 तन्नो वायस्तदु निष्च्या श्रृ॒णोतु॑ । तन्नक्षत्रं भूरि॒दा अस्तु॑ मह्यं ॥
 तन्नो दे॒वासो अनु॑ जानन्तु कामं ॥ यथा तरे॑म दुरि॒तानि॑ विश्वा ॥
 वायवे॑ स्वाहा निष्च्यायै॑ स्वाहा ॥
 काम॒चाराय॑ स्वाहा ऽभिजि॒त्यै स्वाहा॑ ॥ 13

(स्वाती नक्षत्र देवतायै वायवे नमः)

14. नक्षत्रं – विशाखा

दूर-मस्मच्छत्रवो यन्तु भीताः । तदिन्द्राग्नी कृणुतां तद् विशाखे ।
 तन्नो देवा अनुमदन्तु यज्ञं । पश्चात् पुरस्तादभयन्नो अस्तु ।
 नक्षत्राणा-मधिपत्नी विशाखे । श्रेष्ठाविन्द्राग्नी भुवनस्य गोपौ ।
 विषूच शत्रू-नपबाधमानौ । अपक्षुध-न्नुदतामरातिं ॥

इन्द्राग्निभ्या७ स्वाहा विशाखाभ्या७ स्वाहा ॥

श्रैष्ठ्याय स्वाहा ऽभिजित्यै स्वाहा ॥ 14

(विशाखा नक्षत्र देवतायै इन्द्राग्निभ्यां नमः)

15. पौर्णमासि

पूर्णा पश्चादुत पूर्णा पुरस्तात् ॥ उन्मद्ध्यतः पौर्णमासी जिगाय ।
 तस्यां देवा अधि सम्वसन्तः ॥ उत्तमे नाक इह मादयन्तां ।
 पृथ्वी सुवर्चा युवति स्सजोषाः ॥ पौर्णमास्युदगा-च्छोभमाना ।
 आप्याययन्ती दुरितानि विश्वा ॥ उरुं दुहां यँजमानाय यज्ञं ॥

पौर्णमास्यै स्वाहा कामाय स्वाहा ऽगत्यै स्वाहा ॥ 15

(पौर्णमास्यै नमः)

16.नक्षत्रं – अनूराधा

ऋ॒द्ध्या॒स्म ह॒व्यैर् नम॑सोपसद्य । मि॒त्रं दे॒वं मि॒त्रधे॑यन्नो अस्तु ।
 अ॒नू॒रा॒धा॒न् ह॒विषा॑ वर्द्धयन्तः । श॒तं जी॒वेम॑ शर॒द स्स॒वी॒राः ।
 चि॒त्रं नक्ष॑त्र-मुदगात् पु॒रस्ता॑त् ॥ अ॒नू॒रा॒धा॒स इति॑ यद् वदन्ति ।
 तन्मि॒त्र एति॑ प॒थिभि॑र् दे॒वया॑नैः । हि॒रण्य॑यैर् वित॒तै-रन्त॑रिक्षे ॥

मि॒त्राय॑ स्वाहा-ऽनू॒रा॒धेभ्य॑ स्स्वाहा ॥

मि॒त्रधे॑याय॑ स्वाहाऽभिजित्यै॑ स्वाहा ॥ 16

(अनूराधा नक्षत्र देवतायै मित्राय नमः)

17.नक्षत्रं – ज्येष्ठा

इन्द्रो॑ ज्येष्ठामनु॒ नक्ष॑त्रमेति । यस्मिन् वृ॒त्रं वृ॑त्रतूर्ये॑ ततार ।
 तस्मिन् वय॑-ममृतं दुहा॒नाः । क्षु॒धन्त॑रेम दु॒रितिं॑ दु॒रिष्टिं॑ ।
 पु॒रन्द॑राय वृष॒भाय॑ धृ॒ष्णावे॑ ॥ अ॒षाढा॑य स॒हमा॑नाय मी॒ढुषे॑ ॥
 इन्द्रा॑य ज्येष्ठा मधु॒मद् दुहा॑ना । उ॒रुं कृ॑णोतु॒ यज॑मानाय लो॒कं ॥

इन्द्रा॑य स्वाहा ज्येष्ठायै॑ स्वाहा ।

ज्यैष्ठ्या॑य स्वाहा-ऽभिजित्यै॑ स्वाहा ॥

(ज्येष्ठा नक्षत्र देवतायै इन्द्राय नमः) 17

18.नक्षत्रं – मूलं

मूलं॑ प्र॒जां वी॒र॒वतीं॑ वि॒देय॑ । परा॑च्येतु॒ निर्ऋ॑तिः परा॒चा ।
 गो॒भिर् नक्ष॑त्रं पशु॒भि स्स॑म॒क्तं । अ॒हर् भू॒याद् यज॑मानाय॒ मह्यं॑ ॥
 अ॒हर्नो॑ अ॒द्य सु॒विते॑ दधातु । मूलं॑ नक्ष॒त्रमि॒ति यद् वद॑न्ति ।
 परा॑चीं वा॒चा निर्ऋ॑तिं नु॒दामि॑ । शिवं॑ प्र॒जायै॑ शिव॒मस्तु॑ मह्यं॑ ॥
 प्र॒जाप॑तये॒ स्वाहा॑ मू॒लाय॑ स्वाहा॑ । प्र॒जायै॑ स्वाहा॑ ॥

(मूला नक्षत्र देवतायै प्रजापतये नमः) 18

19.नक्षत्रं – पूर्वाषाढा

या दि॒व्या आपः॑ पय॒सा सं॒बभू॑वुः । या अ॒न्तरि॑क्ष उ॒त पा॒र्त्थि॒वीर्याः॑ ।
 या॒साम॑षाढा अ॒नुय॑न्ति का॒मं ॥ ता न॑ आपः॑ श॒श्वस्यो॑ना भवन्तु ।
 याश्च॑ कू॒प्या याश्च॑ ना॒द्या स्स॑मु॒द्रियाः॑ । याश्च॑ वै॒शन्ती॑रुत प्रा॒सची॑र्याः ।
 या॒साम॑षाढा मधु॒ भक्ष॑यन्ति । ता न॑ आपः॑ श॒श्वस्यो॑ना भवन्तु ॥
 अ॒द्भ्य स्स्वाहा॑ ऽषा॒ढाभ्य॑ स्स्वाहा॑ ।
 स॒मु॒द्राय॑ स्वाहा॑ का॒माय॑ स्वाहा॑ ।
 अ॒भिजि॑त्यै स्वाहा॑ ॥ 19

(पूर्वाषाढा नक्षत्र देवतायै अद्भ्यो नमः)

20.नक्षत्रं – उत्तराषाढा

तन्नो॑ विश्वे॑ उप॑शृण्वन्तु॑ दे॒वाः । तद॑षाढा॒ अभि॑ सम्॒यन्तु॑ य॒ज्ञं ।
 तन्नक्ष॑त्रं प्रथ॒तां प॑शु॒भ्यः । कृ॒षिर् वृ॒ष्टिर् य॑ज॒मानाय॑ कल्प॒तां ।
 शु॒भ्राः क॒न्या यु॒वतय॑ स्सुपे॒शसः॑ । क॒र्मकृ॑त स्सु॒कृतो॑ वी॒र्या॑वतीः ।
 विश्वा॑न् दे॒वान् ह॒विषा॑ वर्द्धय॒न्तीः ।
 अ॒षाढाः का॒म मु॑प॒यान्तु॑ य॒ज्ञं ॥

वि॒श्वेभ्यो॑ दे॒वेभ्य॑ स्स्वाहा॑ ऽषा॒ढाभ्य॑ स्स्वाहा॑ ॥

अ॒न॒प॒ज॒य्याय॑ स्वाहा॑ जि॒त्यै स्वाहा॑ ॥ 20

(उत्तराषाढा नक्षत्र देवतायै विश्वेभ्यो देवेभ्यो नमः)

21.नक्षत्रं – अभिजिद्

यस्मिन्॑ ब्र॒ह्मा ऽभ्य॑जय॒त् सर्व॑मेतत् । अमु॑ञ्च॒ लोक॑मिद॒मू च॑ सर्वं॑ ।
 तन्नो॑ नक्ष॒त्र-म॑भिजिद् विजित्य॑ । श्रियं॑ दधा॒त्वह॑णीय॒मानं॑ ।
 उ॒भौ लो॒कौ ब्र॑ह्म॒णा स॑ज्जि॒तेमौ॑ । तन्नो॑ नक्ष॒त्र-म॑भिजिद् विचि॑ष्टां ।
 तस्मिन्॑ वयं॑ पृ॒तना॑ स्संजयेम॑ । तन्नो॑ दे॒वासो॑ अनु॒जान॑न्तु॒ कामं॑ ॥

ब्र॒ह्म॒णे स्वाहा॑ ऽभि॒जिते॑ स्वाहा॑ ॥

ब्र॒ह्म॒लो॒काय॑ स्वाहा॑ ऽभि॒जित्यै॑ स्वाहा॑ ॥ 21

(अभिजित् नक्षत्र देवतायै ब्रह्मणे नमः)

22.नक्षत्रं – श्रवणं

शृ॒ण्व॒न्ति॑ श्रो॒णा-म॒मृत॑स्य गो॒पां । पु॒ण्या॑मस्या॒ उप॑शृ॒णोमि॑ वाचं॑ ॥
 म॒हीं दे॒वीं वि॒ष्णु॑पत्नी-म॒जूर्या॑ । प्र॒तीची॑मेना॒ ह॒विषा॑ यजामः ।
 त्रे॒धा वि॒ष्णु-रु॒रुगा॑यो विच॒क्रमे॑ । म॒हीं दि॒वं पृ॒थि॒वी-म॒न्तरि॑क्षं ।
 तच्छ्रो॒णैति॑ श्रव॑ इच्छ॒माना॑ ।

पु॒ण्य॒ꣳ इ॒लोकं॑ य॒जमा॑नाय कृ॒ण्वती॑ ॥

वि॒ष्णवे॑ स्वाहा॑ श्रो॒णायै॑ स्वाहा॑ । इ॒लोका॑य स्वाहा॑ श्रु॒ताय॑ स्वाहा॑ ॥

22 (श्रवण नक्षत्र देवतायै विष्णवे नमः)

23.नक्षत्रं – श्रविष्ठा

अ॒ष्टौ दे॒वा व॑सव॒ स्सो॒म्यासः॑ । च॒तस्रो॑ दे॒वीर॑जराः श्रवि॒ष्ठाः ।
 ते य॒ज्ञं पा॑न्तु रज॒सः प॑रस्तात् । स॒म्व॒त्सरी॑ण-म॒मृत॑ꣳ स्व॒स्ति ।
 य॒ज्ञं नः॑ पा॑न्तु व॒सवः॑ पु॒रस्ता॑त् । द॒क्षि॒णतो॑-ऽभि॒यन्तु॑ श्रवि॒ष्ठाः ।
 पु॒ण्य॒न्नक्ष॑त्रम॒भि स॑म्वि॒शाम॑ । मा नो अ॒राति॑-र॒घश॑ꣳसा॒गन् ॥

व॒सुभ्य॑ स्स्वाहा॑ श्रवि॒ष्ठाभ्य॑ स्स्वाहा॑ ।

अ॒ग्राय॑ स्वाहा॑ प॒रीत्यै॑ स्वाहा॑ ॥ 23

(श्रविष्ठा नक्षत्र देवतायै वसुभ्यो नमः)

24.नक्षत्रं – शतभिषक्

क्षत्रस्य राजा वरुणो ऽधिराजः । नक्षत्राणां शतभिषग् वसिष्ठः ।
 तौ देवेभ्यः कृणुतो दीर्घमायुः । शतं सहस्रा भेषजानि धत्तः ।
 यज्ञन्नो राजा वरुण उपयातु । तन्नो विश्वे अभि सम्यन्तु देवाः ।
 तन्नो नक्षत्रं शतभिषग् जुषाणं । दीर्घमायुः प्रतिरद् भेषजानि ॥
 वरुणाय स्वाहा शतभिषजे स्वाहा ॥
 भेषजेभ्य स्स्वाहा ॥ 24

(शतभिषक् नक्षत्र देवतायै वरुणाय नमः)

25.नक्षत्रं – पूर्वप्रोष्ठपदा

अज एकपादुदगात् पुरस्तात् । विश्वा भूतानि प्रतिमोदमानः ।
 तस्य देवाः प्रसवं यन्ति सर्वे । प्रोष्ठपदासो अमृतस्य गोपाः ।
 विभ्राजमान स्समिधान उग्रः । आऽन्तरिक्ष-मरुहदगन् द्यां ।
 तं सूर्यं देव-मज-मेकपादं । प्रोष्ठपदासो अनुयन्ति सर्वे ॥
 अजायैकपदे स्वाहा प्रोष्ठपदेभ्य स्स्वाहा ।
 तेजसे स्वाहा ब्रह्मवर्चसाय स्वाहा ॥ 25

(पूर्वप्रोष्ठपदा नक्षत्र देवतायै अजाय एकपदे नमः)

26.नक्षत्रं – उत्तरप्रोष्ठपदा

अहि॑ बु॒द्धि॒नयः॑ प्रथ॑मान एति । श्रेष्ठो॑ दे॒वाना॑मु॒त मा॑नु॒षाणां॑ ।
 तं ब्रा॒ह्म॒णा स्सो॑मपा स्सो॒म्यासः॑ । प्रो॒ष्ठप॑दासो अ॒भि र॑क्षन्ति सर्वे ॥
 चत्वार॑ एक॒मभि॑ कर्म दे॒वाः । प्रो॒ष्ठप॑दास इति या॒न् वद॑न्ति ।
 ते बु॒द्धि॒नियं॑ परिषद्य॑ स्तु॒वन्तः॑ । अहि॑ रक्षन्ति नम॑सोपसद्य ॥

अ॒हये॑ बु॒द्धि॒नयाय॑ स्वाहा॑ प्रो॒ष्ठप॑दे॒भ्य स्स्वाहा॑ ।

प्र॒तिष्ठा॑यै स्वाहा ॥ 26

(उत्तरप्रोष्ठपदा नक्षत्र देवतायै अहये बुद्धिनियाय नमः)

27.नक्षत्रं – रेवती

पू॒षा रे॒वत्य॑न्वेति पन्थां॑ । पु॒ष्टि॒पती॑ पशु॒पा वाज॑बस्त्यौ ।
 इ॒मानि॑ ह॒व्या प्र॑यता जुषाणा । सु॒गैर्नो॑ या॒नैरु॑पयातां य॒ज्ञं ।
 क्षु॒द्रान् प॒शून् र॑क्षतु रे॒वती॑ नः । गा॒वो नो॑ अश्वा॒न् अ॒न्वेतु॑ पू॒षा ।
 अ॒न्नं र॑क्षन्तौ बहु॒धा वि॑रूपं । वाज॑ स॒नुतां॑ य॒जमा॑नाय य॒ज्ञं ॥

पू॒ष्णे स्वाहा॑ रे॒वत्यै॑ स्वाहा॑ ।

पशु॑भ्य स्स्वाहा ॥ 27

(रेवती नक्षत्र देवतायै पूष्णे नमः)

28 नक्षत्रं – अश्विनी

तद॒श्विना॑-व॒श्वयु॑जोपयातां । शु॒भङ्ग॑मि॒ष्टौ सु॑यमे॒भिरश्वैः॑ ॥
 स्व॒न्नक्ष॑त्रं ह॒विषा॑ यजन्तौ । म॒ध्वा संपृ॑क्तौ यजु॒षा स॑म॒क्तौ ।
 यौ दे॒वानां॑ भि॒षजौ॑ ह॒व्यवा॑हौ । वि॒श्वस्य॑ दू॒ता-व॑मृतस्य गो॒पौ ।
 तौ नक्ष॑त्रं-जुजुषा॒णोप॑यातां । नमोऽश्वि॒भ्यां कृ॑णुमो-ऽश्वयु॒ग्भ्यां ॥

अ॒श्विभ्या॑ स्वाहा ऽश्वयु॒ग्भ्या॑ स्वाहा ॥

श्रो॒त्राय॑ स्वाहा श्रु॒त्यै स्वाहा ॥ 28

(अश्विनी नक्षत्र देवतायै अश्विभ्यां नमः)

29.नक्षत्रं – अपभरणी

अप॑ पा॒प्मानं॑ भ॒रणी॑र् भ॒रन्तु॑ । तद् य॒मो रा॒जा भ॑ग॒वान् वि॑च॒ष्टां ।
 लो॒कस्य॑ रा॒जा म॒हतो॑ म॒हान् हि॑ । सु॒गन्तः॑ प॒न्थाम॑भयं कृ॒णोतु॑ ।
 यस्मिन्॑ नक्ष॒त्रे य॒म ए॒ति रा॒जा ॥ यस्मिन्ने॒न-म॑भ्यषि॒ञ्चन्त॑ दे॒वाः ।
 तद॒स्य चि॒त्रं ह॒विषा॑ यजाम । अप॑ पा॒प्मानं॑ भ॒रणी॑र् भ॒रन्तु॑ ॥

य॒माय॑ स्वाहा ऽप॒भर॑णी॒भ्य स्स्वाहा॑ ॥

रा॒ज्याय॑ स्वाहा ऽभि॒जित्यै॑ स्वाहा ॥ 29

(अपभरणी नक्षत्र देवतायै यमाय नमः)

30.अमावासि

निवेशनी सङ्गमनी वसूनां विश्वा रूपाणि वसून्यावेशयन्ती ।
 सहस्रपोषं सुभगा रराणा सा न आगन् वर्चसा सम्विदाना ।
 यत्ते देवा अदधुर् भागधेय-ममावास्ये सम्वसन्तो महित्वा ।
 सा नो यज्ञं पिपृहि विश्ववारे रयिन्नो धेहि सुभगे सुवीरं ॥
 अमावास्यायै स्वाहा कामाय स्वाहा ऽगत्यै स्वाहा ॥ 30

(अमावास्यै नमः)

31.चन्द्रमा

नवोनवो भवति जायमानोऽह्नां केतुरुषसा-मेत्यग्रे ।
 भागं देवेभ्यो वि दधात्यायन् प्रचन्द्रमास्तिरति दीर्घमायुः ।
 यमादित्या अंशुमाप्याययन्ति यमक्षित-मक्षितयः पिबन्ति ।
 तेन नो राजा वरुणो बृहस्पति राप्याययन्तु भुवनस्य गोपाः ॥
 चन्द्रमसे स्वाहा प्रतीदृश्यायै स्वाहा ।
 अहोरात्रेभ्य स्स्वाहा-ऽर्द्धमासेभ्य स्स्वाहा ।
 मासेभ्य स्स्वाहर्तुभ्य स्स्वाहा । संवत्सराय स्वाहा ॥ 31

(चन्द्रमसे नमः)

32. अहो रात्री

ये वि॒रूपे॑ सम॒नसा॑ सम॒व्यय॑न्ती । सम॒नं तन्तुं॑ परि तातनाते ॥
वि॒भू प्र॒भू अनु॒भू वि॒श्वतो॑ हुवे । ते नो नक्ष॑त्रे हवमागमेतं ।
वयं दे॒वी ब्र॒ह्मणा॑ सम॒विद॑ानाः । सुर॒त्नासो॑ दे॒ववी॑तिं दधानाः ।
अ॒होरा॒त्रे ह॒विषा॑ वर्द्धयन्तः । अति॑ पा॒प्मान॑-मतिमुक्त्या गमेम ॥

अ॒हे स्वा॒हा रा॒त्रियै॑ स्वा॒हा ॥

अति॑मुक्त्यै स्वा॒हा ॥ 32

(अहो रात्राभ्यां नमः)

33. उषा

प्रत्यु॑व दृ॒श्याय॑ती । व्यु॒च्छन्ती॑ दुहि॒ता दि॒वः ।
अपो॑ म॒ही वृ॑णुते चक्षु॒षा । तमो॑ ज्योतिष्कृ॒णोति॑ सू॒नरी॑ ॥
उदु॒स्त्रिया॑स्सचते सूर्यः । सचा॑ उ॒द्यन्नक्ष॑त्र मर्चि॒मत् ।
तवेदु॑षो व्यु॒षि सूर्य॑स्य च । संभ॑क्तेन गमेमहि ॥

उष॑से स्वा॒हा व्यु॒ष्ट्यै॑ स्वा॒हा ॥

व्यू॒षुष्यै॑ स्वा॒हा व्यु॒च्छन्त्यै॑ स्वा॒हा ॥

व्यू॒ष्टायै॑ स्वा॒हा ॥ 33

(उषसे नमः)

34. नक्षत्रः

तन्नो नक्षत्र-मर्चिमत् । भानुमत्तेज उच्छरत् ।
 उप यज्ञमिहागमत् । प्र नक्षत्राय देवाय । इन्द्रायेन्दुः हवामहे ।
 स न स्सविता सुवथ् सनिं । पुष्टिदां वीरवत्तमं ॥
 नक्षत्राय स्वाहोदेष्यते स्वाहा ॥ उद्यते स्वाहो-दिताय स्वाहा ॥
 हरसे स्वाहा भरसे स्वाहा ॥ भ्राजसे स्वाहा तेजसे स्वाहा ॥
 तपसे स्वाहा ब्रह्मवर्चसाय स्वाहा ॥ 34

(नक्षत्राय नमः)

35. सूर्यः

उदु त्यं जातवेदसं देवं वहन्ति केतवः । दृशे विश्वाय सूर्य ॥
 चित्रं देवाना-मुदगादनीकं चक्षुर् मित्रस्य वरुणस्याग्नेः ।
 आप्रा द्यावापृथिवी अन्तरिक्षः सूर्य आत्मा जगत स्तस्थुषश्च ॥
 सूर्याय स्वाहा नक्षत्रेभ्य स्स्वाहा ॥
 प्रतिष्ठायै स्वाहा ॥ 35

(सूर्याय नमः)

36. अदितिः

अ॒दि॒ति॒र्न उ॒रु॒ष्य-॒त्वदि॒तिः श॒र्म य॒च्छतु॑ । अ॒दि॒तिः पा॒त्व॒ ह॒सः ।
 म॒ही॒मू॒षु मा॒तर॒ सु॒व्र॒ता॒ना-मृ॒तस्य॑ प॒त्नी म॒व॒से हु॒वे॒म ।
 तु॒वि॒क्ष॒त्रा-म॒ज॒र॒न्ती-मु॒रू॒ची सु॒श॒र्मा॒ण-म॒दि॒ति सु॒प्र॒णी॒तिं ॥
 अ॒दि॒त्यै स्वा॒हा ॥ प्र॒ति॒ष्ठा॒यै स्वा॒हा ॥ 36 (अ॒दि॒त्यै नमः॑)

37. विष्णुः

इ॒दं वि॒ष्णु॒र् वि च॒क्रमे॑ त्रे॒धा नि द॒धे प॒दं । स॒मू॒ढ॒मस्य॑ पा॒ सुरे॑ ।
 प्र॒तद्वि॒ष्णुः स्त॒व॒ते वी॒र्या॑य । मृ॒गो न भी॒मः कु॒च॒रो गि॒रि॒ष्ठाः ।
 य॒स्यो॒रु॒षु त्रि॒षु वि॒क्रम॑णेषु । अ॒धि॒क्षि॒यन्ति॑ भु॒व॒ना॒नि वि॒श्वा ॥
 वि॒ष्ण॒वे स्वा॒हा य॒ज्ञाय॑ स्वा॒हा ।
 प्र॒ति॒ष्ठा॒यै स्वा॒हा ॥ 37 (वि॒ष्ण॒वे नमः॑)

38. अग्निः

अ॒ग्नि॒र् मूर्द॑धा दि॒वः क॒कु॒त्प॒तिः पृ॒थि॒व्या अ॒यं ।
 अ॒पा रे॒ता॒सि जि॒न्व॒ति ।
 भु॒वो य॒ज्ञस्य॑ र॒ज॒सश्च ने॒ता य॒त्रा नि॒यु॒द्धिः स॒च॒से शि॒वा॒भिः ।
 दि॒वि मूर्द॑धा॒नं द॒धि॒षे सु॒व॒र्षां जि॒ह्वा॒म॒ग्ने च॒कृ॒षे ह॒व्य॒वा॒हं ॥
 (अ॒ग्नये॑ नमः) 38

39. अनुमती

अनु॑ नो॑ ऽद्यानु॑मतिर्य॑ज्ञं दे॒वेषु॑ मन्यतां ।
 अ॒ग्निश्च॑ ह॒व्यवा॑हनो भवतां दाशु॑षे मयः ।
 अ॒न्विदनु॑मते त्वं म॒न्यासै॑ शं च नः कृ॒धि ।
 क्र॒त्वे द॒क्षाय॑ नो हि॒नु प्र॒ ण॒ आयू॑ष्षि तारिषः ॥

(अनुमत्यै नमः) 39

40. हव्यवाहः (अग्निः)

ह॒व्यवा॑हम॒भि-मा॑तिषाहं॑ । र॒क्षो॒हणं॑ पृ॒तना॑सु जि॒ष्णुं ।
 ज्यो॑तिष्मन्तं दी॒द्यतं॑ पु॒रन्धिं॑ । अ॒ग्निञ्च॑ स्वि॒ष्टकृ॑त-माहु॒वेम॑ ।
 स्वि॒ष्ट-म॒ग्ने अ॒भित॑त् पृ॒णाहि॑ । वि॒श्वा दे॒व पृ॒तना॑ अ॒भिष्य॑ ।
 उ॒रुन्नः॑ पन्थां॑ प्र॒दिशन्॑ वि॒भाहि॑ ।
 ज्यो॑तिष्मद्धे॒ह्य जर॑न्न आयुः ॥ (अग्नये नमः) 40

नक्षत्रदेवताभ्यो नमः

ओं शान्तिः॑ शान्तिः॑ शान्तिः॑